

## WU-ZOMO-LA MATIU SI NJMUNSA

*Yesu doho niaa*

*Luuk 3.23-28*

<sup>1</sup> Yesu doho niaa ne nla. U naabalimaba ne fa nna Abiraham ari Devit.

<sup>2</sup> Abiraham ne fa lul Aizik. Aizik ma sii lul Jekob. Jekob ma sii lul Juda ari u naanbiirin.

<sup>3</sup> Juda ma sii lul Peres ari Zera. (Ba naan yirin ne fa Tama.) Peres ma bira sii lul Hezuron. Hezuron ma sii lul Ram.

<sup>4</sup> Ram ma sii lul Amiinadab. Amiinadab ma sii lul Naasun. Naasun ma sii lul Salimon.

<sup>5</sup> Salimon ma sii lul Buas. (Buas naan yirin ne fa Rehab.) Buas ma sii lul Obed. (Obed ma naan yirin ne fa Rut.) Obed ma sii lul Jesi.

<sup>6</sup> Jesi ma bira sii lul kuoro Devit. Devit ma fa lul Solomon (Solomon ma naan fa nna Uraya haala ne. Uraya suu an ka Devit jonjo jaa.)

<sup>7</sup> Solomon ma sii lul Rihabam, Rihabam ma sii lul Abaaja, Abaaja ma sii lul Asa.

<sup>8</sup> Asa ma sii lul Jihosafat, Jihosafat ma sii lul Joram, Joram ma sii lul Uzaya.

<sup>9</sup> Uzaya ma sii lul Jotam, Jotam ma sii lul Ehas, Ehas ma sii lul Hizikaya.

<sup>10</sup> Hizikaya ma sii lul Manaasi, Manaasi ma sii lul Emon, Emon ma sii lul Jusaya.

<sup>11</sup> Jusaya ma sii lul Jekonaya ari u naanbiirin. Bua-la le ne ba ken Iziral tinnaa mu Babilon.

<sup>12</sup> Ba fa si kenj Iziral tinɲaa kaa mu Babilonj ɲii, u ɲii harinɲ le ne Jekonaya lul Sialitel, Sialitel ma sii lul Zerubabil.

<sup>13</sup> Zerubabil ma sii lul Abayat, Abayat ma sii lul Elayakim, Elayakim ma sii lul Azɔ.

<sup>14</sup> Azɔ ma sii lul Zadɔk, Zadɔk ma sii lul Akim, Akim ma sii lul Elayat.

<sup>15</sup> Elayat ma sii lul Eliyeza, Eliyeza ma sii lul Matanɲ, Matanɲ ma bira sii lul Jekɔb.

<sup>16</sup> Jekɔb ma sii lul Josef, Josef ne saa jaa Mɛeri. U ne lul Yesu, nii-la ba sii yire Kirisito.

<sup>17</sup> A suomi Abiraham si he u miisinɲ le a kaa kuko Devit si he u miisinɲ le, ba di u nihiliereba kala fa ɲaa fii ari banese ne. Devit si he u miisinɲ le a kaa kuko bua-la le ba fa si kese Iziral tinɲaa kaa mu Babilonj, Devit nihiliereba kala ma fa ɲaa fii ari banese ne, a bira chinɲ bua-la le ba si kese Iziral tinɲaa kaa mu Babilonj a kaa kuko bua-la le ba si lul Kirisito, nialinɲ ba si kese kaa mu Babilonj nihiliereba ma fa ɲaa fii ari banese ne.

### *Yesu lullunɲ bua le*

#### *Luuk 2.1-7*

<sup>18</sup> Nla ne ba ɲaa a lul Yesu Kirisito. Josef ne fa sugɛ u naanɲ Mɛeri duu jaa. Ka di ba-na jaa dɔɲɔ, Mɛeri na duu kenɲ luoronɲ ne. Wia Din-zɔɲ-la ne he pu.

<sup>19</sup> Josef fa ɲaa ni-pula ne. U fa bi che duu hiise Mɛeri niaa tuɔɲ. Nii ne u kenɲ u tuɔɲ le duu viau.

<sup>20</sup> U fa sii biine ɲii, Wia tinɲdaara dɔɲɔ kɔ u teenɲ ari duosoo tuɔɲ a bula pu a bul, “Josef, Devit doho nuu, si leɲe di fawullunɲ keninɲ ɲ sii

che di η jaa Mæeri, bæe wiaa luoru-la u si kenε  
ηaa Wia Diη-zoη-la nε hε pu.

<sup>21</sup> U jaη lul baal, η jaη hε u yiriη Yesu, bæe  
wiaa u nε jaη laa u niaa haacheba ta.”

<sup>22</sup> Wiin deen kala ηaa di wialiη la Tiina Wia  
fa si bula ku ηaa wutitii. U fa to u nialiη sii bul  
wiaa, Wia Diη-zoη-la doluη lε nε a bul nii.

<sup>23</sup> Wialiη u fa si bula nε ηla:

“Ha-tolo kubala ha si bi baal jin jaη keη luoruη  
a lul bie.

Ba jaη hε u yiriη Imanuel.”

(U yiri-la bubuoη nε Wia hε la teen.)

<sup>24</sup> Josef si sii doη lε, u ηaa nii Wia tinđaari-la si  
bula pu a jaa Mæeri.

<sup>25</sup> U si jaau nii, ba duu bi doηo jin, ka u lul u  
ha-toli-bie. Nii nε Josef hε u yiriη Yesu.

## 2

### *Wu-jinnaa mu na Yesu*

<sup>1-2</sup> Ba lul Yesu Betilehem lε nε. Ta-bie-la fa hε  
Judiya tinteen lε nε. Bua deen lε baal kubala  
baa yire Herod nε fa ηaa tintee-la kuoro. Ba si  
lul Yesu, wu-jinnaa lii taη-bubuoη a ko  
Jerusalem a piεε, “Juu tinηaa kuoru-la ba si  
lula hε nii nε? La na u cheηwuluη taη-bubuoη  
nε a ko di la chuolu.”

<sup>3</sup> Kuoro Herod fa si nii wiin deen, fawulluη  
keη ba di Jerusalem niaa kala kiηkeη kiηkeη.

<sup>4</sup> Nii nε u yire nialiη si kpu pusuη pipi Wia  
kuhiasiη ari Wia teniη kerichiba-la ba ku hilimi.  
U piεεba a bul, “Nii nε ba jaη lul Kirisito, nii-la  
Wia si liisa?”

<sup>5</sup> Njii nɛ ba bula pu a bul, “Ba jaŋ lulu Betilehem, Judiya tinteen ɛ. Nɔa nɛ nialin sɔi bul wiaa, Wia Diŋ-zɔŋ-la dolun ɛ nmunse:

<sup>6</sup> Wia si,

‘Betilehem ŋaa ta-bie nɛ Judiya tinteen ɛ.

Ama Judiya tinteen kala ɛ, Betilehem niaa nɛ ŋaa ni-balaa,

bɛɛ wiaa ba tuɔŋ nɛ Iziral kuoro jaŋ lii,

nii-la si jaŋ beŋ mi niaa, Iziral tinŋaa.’ ”

<sup>7</sup> Njii nɛ Herɔd luɔra yire wu-jinna-la si lii taŋ-bubuɔŋ a kaa mu faa a pieseba di ba dagu bua-la titia ɛ cheŋwul-la si lia. Ba daga pu.

<sup>8</sup> Njii nɛ Herɔd taba di ba mu Betilehem, an bula piba a bul, “Má mu che bile ari siifiesin. ‘Di ma nɛ nau, má len di mi ma jin ŋii niin ɛ, a ma mu chuɔlu.”

<sup>9</sup> Ba si nii ŋii, ba lii jon wonbiin aa mu. Cheŋwul-la ba fa si na taŋ-bubuɔŋ bira laa ba sipaan.

<sup>10</sup> Ba bira si na cheŋwul-la, ba tuɔŋ kala tɔre, ba juɔɔɛ.

<sup>11</sup> Ba si mu yi lee-la bii-mulo-la si he, cheŋwul-la chin dia-la nyun. Ba mu juu dia-la a na bii-mulo-la ari Mɛeri, u naan. Ba tuu kpirimi u sipaan a chuɔlu. Njii nɛ ba puri ba chugusun a liise kiaa pu: Selime, tii-keli-zɔŋ baa yire franŋinseŋs ari tii-keli-zɔŋ dɔŋɔ baa yire mɛɛ.

<sup>12</sup> Njii nɛ titanin Wia bula piba duosoo tuɔŋ ari ba sí miira mu Herɔd teen. Njii nɛ ba sii a to wonbii-wogo a miira mu ba jaŋ.

*Josef ari Mɛeri fá mu Ijipiti tinteen*

13-14 Ba si miira jon ba wonbiinj a viiri, Josef piñ don a duosi a na Wia tinđara di u ko u teen a bula pu, “Sii a jon bii-mulo-la ari u naan a fá mu Ijipiti tinteen a he dime see di mi bira bula piñ di η lii dime, beε wiaa Herod che di u kpu bii-mulo-la ne.” Nii ne u sii a jon bii-mulo-la ari u naan a mu Ijipiti tinteen titaniñ. U he dime ne deen deen Herod ku suu.

15 Wiinj deen ηaa di wii-la Wia fa si to nialinj sii bul wiaa, Wia Diñ-zon-la dolun ε ku ηaa wutitii. U fa bula ari u jan yire u bie duu lii Ijipiti tinteen ko.

### *Ba kpu hanbolibiisi-la Betilehem ε*

16 Herod si na ari wu-jinna-la nyisu ne, u faasa na baaniñ. Wu-jinna-la fa si dagu bua-la ε ba si lul Yesu, u jin ηii. Nii ne u ta u laali-yuoroo di ba mu Betilehem ta-biisi-la kala si gollu chu a kpu hanbolibiisi-la kala si ha bi jisinj balia kiele.

17 A tin ηla wiaa wii-la Jerimaya fa si bula ku ηaa wutitii ne. U fa ηaa nialinj sii bul wiaa, Wia Diñ-zon-la dolun ε dono ne.

18 Wialinj u fa si bula ne ηla: U si,  
 “Niaa nii yel Rama ε,  
 niaa faasa yel ne.  
 Haal kubala ba sii yire Rechil yel u  
 hanbiisinj wiaa ne.

U yele, u bi tɔɔ,  
 beε wiaa ba kala suba ne.”

### *Josef ari Mæri mu Nazaret*

19-21 Nii ne Herod ku suu. U si suba ηii, Josef bira duoso a na Wia tinđara di u ko u teen a bula pu, “Sii a keñ bii-mulo-la ari u naan a

miira mu Iziral tinteen. Nialaa fa sfi che di ba kpu bii-mulo-la, ba suba ne." Nii ne u ken bile ari u naan a kaa mu Iziral tinteen a he dime.

<sup>22</sup> Ama Josef si nia ari Herod suba, ka u bie Akiliyas dii kuoron Judiya tinteen le, fawullun fa kenu ari u si jan hon dime. Nii ne Wia bira bula pu duosoo tuon duu mu hon Galilii tinteen le.

<sup>23</sup> U si mu Galilii tinteen, u mu hon tan kubala le baa yire Nazaret. U naa nii di wialin nialin fa sfi bul wiaa, Wia Din-zon-la dolun le naa wutitii ne. Ba fa bula a bul, "Ba jan kenu yire Nazaret tiina."

### 3

*Joon Wia lii-foori-la bul Wia wiaa  
Maak 1.1-8; Luuk 3.1-18; Joon 1.19-28*

<sup>1</sup> Bua-la le Joon Wia lii-foori-la sii ko Judiya tinteen a juu giri-bine tuon a suomo bubul Wia wiaa pipi niaa.

<sup>2</sup> U bula piba a bul, "Ma birima lii ma haacheba le, bee wiaa Wia kuorii-la kpage ne!"

<sup>3</sup> Nialin fa sfi bul wiaa, Wia Din-zon-la dolun le donjo ma fa bul Joon wiaa ne. U yirin ne fa Azaaya. U fa si,

"Nuu ne chin giri-bine tuon aa heele bul,

'Ma ko a wase wonbiin bil di la Tiina ko a tuto.

Ma naa nii duu ne ko, u di-venin jan pin worun.' "

<sup>4</sup> Joon gennin fa naa buntanja punaa ne ba kaa sua, a ken tenbiin voo u tija, u kudiilee ma ne fa nyanirikaba ari tuun.

<sup>5</sup> Niaa lii Jerusalem ari Judiya tinteen kala ari tasi-la kala si golli Joodan fuo-la a ko u teenj.

<sup>6</sup> Ba dage ba haacheba an tuu Joodan fuo-la, u foba Wii-chuole liinj.

<sup>7</sup> Joon na Farisii tinnaa ari Sadusii tinnaa di ba yuga a kuko u teenj duu foba Wii-chuole liinj. U si naba, u bula piba a bul, “Ma niaa deenba wu-nyaalaa nage dinnaa ne. Ma biina ma jan wuo fa lel chee-la Wia si jan dii nuu-kala sariyaa?”

<sup>8</sup> Maa nya wialinj si jan dage ari ma birima lii ma haacheba le ne

<sup>9</sup> an si biina a bul Abiraham si nya ma naabalima nii, Wia bi jan dogisema. Mi jan bula pima ari Wia paala jan wuo nya di tabiaa deenba ma si na birime Abiraham doho niaa.

<sup>10</sup> Na ba kenj saanj jee ne a nya siri di ba kerii tiisij lo. Tia-la kala si bi nen-zonjoo ka nen, ba jan kere lo a he nyinij.

<sup>11</sup> Mi-na foma Wii-chuole liinj a dage ari ma birima lii ma haacheba le ne, ama nii-la si jan to mi harinj ko, u ne jan jonj Wia Din-zonj-la a he ma donsunj le an jonj nyinij he donsunj ma le. U ne yuga kiimi. U paala bi maga di mi kori u nenjenjese maa.

<sup>12</sup> U jan kori mii-chaari-gbana duu nmoo u miaa kala dere, u jan kenj gbana-la a kaa chaare a liise mii-biinj a he u vire le an jonj jorunj a he nyinij le. Nyin-la bi jan dise.”

*Joon fo Yesu Wii-chuole liinj  
Maak 1.9-11; Luuk 3.21-22*

<sup>13</sup> Bua-la ɛ Jɔɔŋ fa sɪi bul Wia wiaa aŋ fufo niaa Wii-chuoɛ liiŋ nii, Yesu sii lii Galilii tinŋteen a kɔ Jɔɔŋ teen duu fou Wii-chuoɛ liiŋ Jɔɔdaŋ fuo-la ɛ.

<sup>14</sup> Ama Jɔɔŋ si nii nii, u wiwalime di Yesu keŋ u tuɔbiinaa birime. Nii ne Jɔɔŋ bula pu a bul, “N ne maga di ŋ fomi Wii-chuoɛ liiŋ, aŋ ka ŋ kɔ di mi ne foŋ Wii-chuoɛ liiŋ nii.”

<sup>15</sup> Nii ne Yesu bula pu a bul, “Naa nii mi si bula piŋ. Nla ne la jaŋ wuo to a ŋaa wii-la kala Wia sɪi cho.” Nii ne Jɔɔŋ sei a fou Wii-chuoɛ liiŋ.

<sup>16</sup> Jɔɔŋ si fo Yesu Wii-chuoɛ liiŋ dɛɛ, u guu lii lii-la tuɔŋ ku lii di wia nyuŋ kpaa balia. U na Wia Diŋ-zɔŋ-la duu ku tuu a nage kokomo a togiliu ɛ.

<sup>17</sup> Ka u nii nuu yiikoro wia nyuŋ a bul, “Mi Bii-chooluŋ ne ŋla, mi tuɔŋ tɔɛ u nyuŋ.”

## 4

### *Sitaani magise Yesu*

#### *Maak 1.12-13; Luuk 4.1-13*

<sup>1</sup> Wia Diŋ-zɔŋ-la si ku togili Yesu ɛ nii, u kenu kaa juu giri-bine tuɔŋ di Sitaani magisu.

<sup>2</sup> Yesu fa si he giri-bine tuɔŋ nii, u vɔɔ niin titaŋiŋ ari wiiheye kala tapulaa mahiŋ balia, nii ne losuŋ kenu woruŋ.

<sup>3</sup> Nii ne Sitaani kɔ u teen a bula pu a bul, “Di ŋ ne ŋaa Wia Bie, ŋaa di tabiaa deenba birime boroboro di ŋ dii.”

<sup>4</sup> Nii ne Yesu bula pu a bul, “Ba ŋmuŋse Wia teniŋ tuɔŋ a bul,

‘Kudiilee dunɗunɗa dee bi nuhuobiine miisinj ka  
pa,  
ama Wia niinɗ wialinɗ u sfi bul nfi pi  
nuhuobiine miisinj.’ ”

<sup>5</sup> Nii ne Sitaani kenɗ Yesu a kaa mu Jerusalem a  
kaa mu jil Wia-dia nyu-gbaɗa

<sup>6</sup> an bula pu a bul, “Di η ne ηaa Wia Bie, jon η  
titia a yuo daha a tuu chigisi tinɗeenɗ. Ba  
ηmunɗe Wia teninɗ tuɗon ari

‘Wia janɗ bul η wiaa a pi u tinɗaaraa  
di ba ku cheme keninɗ,  
di η sɨ jon η naanɗ ηmoo tabiaa a kerɨ.’ ”

<sup>7</sup> Nii ne Yesu bula pu a bul, “Ba bira ηmunɗe  
Wia teninɗ seme donɗo a bul,

‘U bi maga di η mimagise η Tiina Wia.’ ”

<sup>8</sup> Nii ne Sitaani bira kenɗ Yesu a kaa jil peel-bal  
kubala nyunɗ a dagu dunia kuorunɗ fine ari u  
zomunɗ

<sup>9</sup> an bula pu a bul, “Mi janɗ jonɗ kiaa deenɗa  
kala pinɗ di η ne janɗ tuu kpirimi a chuɗlemi.”

<sup>10</sup> Nii ne Yesu bula pu a bul, “Sitaani, mu  
dime, Wia teninɗ tuɗon ba ηmunɗa di ba  
chuchuɗle la Tiina Wia dunɗunɗa ne a timaa  
pu.”

<sup>11</sup> Nii ne Sitaani viiri anɗ ka Yesu. Nii ne Wia  
tinɗaaraa ku tima pu.

*Yesu suomi u tinɗinɗaa Galilii le  
Maak 1.14-15; Luuk 4.14-15*

<sup>12</sup> Bua deenɗ le ba kenɗ Jonɗ Wia lii-foori-la kaa  
mu to dia. Yesu si nii nii, u sii Judiya le a mu  
Galilii tinɗeenɗ.

13 U bira bi Nazaret le hono an sii a mu hon tan kubala baa yire Kapenam le. Tan-la kpage Galilii mugi-bal-la ne a he Zebulun ari Nafitali tinteenj.

14 Wiinj deenj naa di wialinj Azaaya fa si bula ku naa wutitiiba ne.

15 Azaaya fa naa nii-la sii bul wiaa, Wia Din-zon-la dolun le ne. U fa bul wiaa a pi Zebulun ari Nafitali doho niaa le a chaase mugi-balinj diiraa, Joodan seme, a he Galilii tinteenj le. Ba naa nialinj si bi Juu tinnaa naa ne.

16 U bula piba a bul,  
 “Nialinj si he biriminj tuonj,  
 ba jan na pulun-bal.  
 Tintee-la ma le niaa si bi Wia chuole,  
 pulumun jan pose piba.”

17 Yesu si he Kapenam le, u suomi u tintinnaa a bul Wia wiaa pi niaa a bul, “Ma birima lii ma haacheba le, bee wiaa, Wia kuorii-la kpaga ne.”

*Yesu yire chenfilikpuuraa banese  
 Maak 1.16-20; Luuk 5.1-11*

18 Yesu fa si jon Galilii mugi-bal-la niinj a vinenj, u na naanbiirinj balia. Ba fa naa chenfilikpuuraa ne. Donjo yirin ne fa Saamonj. U yirin donjo ma ne fa Piita. U naanbie ma yirin ne Anduru. U naba di baa kpu chenfilee fuo-la le ari ba jonba.

19 Nii ne Yesu bula piba a bul, “Ma ko mi teenj a to mi harinj. Mi jan dagema nii ma si jan kikese niaa.”

20 Lima lima ba jon ba jonba ta an to u harinj.

<sup>21</sup> Nii ne u bira ven a mu na naanbiirin balia, ba yiraa ne Jeems ari Joon. Ba fa naa Zebidii biirin ne. U naba di ba di ba nyimma fa he ba liin daboro tuon ne. Ba ken ba jonba naa siri di ba yuo.

<sup>22</sup> Nii ne Yesu yireba. Ba guu sii a len ba liin daboro ari ba nyimma an to Yesu harin.

*Yesu bul Wia wiaa pi niaa an pe vaareba*

*Luuk 6.17-19*

<sup>23</sup> Nii ne Yesu galle Galilii tinteen kala a didage niaa ba Wii-chuole diisin le a bubul Wia wu-zom-la wiaa ari Wia kuorii-la wiaa a pi niaa an pe vivaare niaa nyanyal-yiriba kala.

<sup>24</sup> Yesu wiaa teeli Siiria tinteen kala. Nii ne niaa ken ba nyanyal tinnaa kala ko u teen. Ba ken nyanyal-yiriba kala, jin-bononoo fa ken donsun, nialin donsun faa tel kunjonsun, donsun ma fa naa gberikere ne a ko. Yesu vaareba kala.

<sup>25</sup> Ni-dan to Yesu harin. Ba donsun lii Galilii tinteen ari ta-gentisin fii tinteyee. Donsun ma lii Jerusalem si he Judiya tinteen le, donsun ma lii Jodan fuon cholo seme don.

## 5

*Nii la si jan naa a ken tuoton*

*Luuk 6.20-23*

<sup>1-2</sup> Yesu si na di niaa yuga nii, u jil peelin nyun a hon dime. U si hono, u haritooro ko u teen. U suomo bul wiaa a didageba aa bul,

<sup>3</sup> "Wia jan pe nialin si bi Wia jin worun le.

Ba ne jan dii Wia kuorii-la.

- 4 Wia jaŋ pe nialin sí yel le.  
U jaŋ len di ba tuosaa pin di-bala.
- 5 Wia jaŋ pe nialin si bi ba titia ka dage.  
Ba jaŋ dii Wia kuorii-la tintee-falii-la le.
- 6 Wia jaŋ pe nialin si faasa che tuo-pula a nage  
losuŋ koo lii-nyuasun si keŋ niaa ŋ chiche  
kudiilee koo liin ŋii.  
Wia jaŋ ŋaa di ba keŋ tuo-pula.
- 7 Wia jaŋ pe nialin sí fá niaa nennige le.  
U ma jaŋ fába nennige.
- 8 Wia jaŋ pe nialin si keŋ tuo-pula le.  
Ba jaŋ na Wia.
- 9 Wia jaŋ pe nanjejeeree le.  
U jaŋ keŋba yire u biirin.
- 10 Wia jaŋ pe nialin ba sí dōgisu le a tin wutitii  
ari tuo-pula wiaa.  
Ba jaŋ he Wia kuorii-la tuon.
- 11 Di niaa ne tuusema an pe to ma naasin  
dudōgisema an nyia wu-nyiarin pipima a tin ma  
si ŋaa mi haritooro wiaa, Wia ma jaŋ pema le.
- 12 Má len di ma tuon tōre, di ma jujuose, be  
wiaa ma time jaŋ yuge Wia-jaŋ le. Ba si to ma  
naasin dudōgisema ŋii, ŋii titia ne ba fa dōgise  
nialin si laa sipaan bubul wiaa, Wia Diŋ-zon-la  
dolon le.

*Ma nage yisin a nage chaanin maa*

*Maak 9.50; Luuk 14.34-35*

13 Ma nage yisin ne nuu-kala teen. Yisin sima,  
ama di u ne sebise, ŋ bira bi jaŋ wuo ŋaa duu  
sin. U ŋaa ku-tōō ne. Ba jonō ta niaa nunuose.

14 Ma ma nage chaanin ne dunia niaa kala  
teen. Tan kala si chin peelin nyun, u bi wuo faa.

15 Nuu-kala síi che pulumun̄ u dia le, u bi jan̄ nyige chaaniñ bil u dia le a keñ gbaña a chu to, koo u bi jan̄ jon̄ chaan̄-la he godo bubuon̄ maa. U yie jon̄o bil kua nyun̄ ne, di nuu-kala si he dia-la tuon̄ nina pulumun̄.

16 Nii titia ne ma ma maga di ma chaane niaa teen̄ di ba wuo na wu-zom̄o-la ma síi ñaa di ba wuo denne ma Nyimma si he Wia-jan̄ le.

*Yesu dage niaa wii-la ba si ñmun̄sa bil di ba tuto*

17 Ma biina mi ko di mi jon̄ wialin̄ Moosis fa si ñmun̄sa bil di niaa tuto ta nee? Koo ma biina mi ko di mi jon̄ wialin̄ niaa si dagema Wia Din̄-zon̄-la dolun̄ le ta nee? Ai, mi bi ko di mi jon̄ba ta, ama mi ko di mi dage ba bubuon̄ titia ne.

18 Wutitii ne mi bulaa pima, dunia ari wia nyun̄ si jan̄ he dime ñii a dieni, wialin̄ Moosis fa si ñmun̄sa bil di niaa tuto, ba bi jan̄ keriba mua ma ta see di kuñ-kala si he dunia le dere.

19 Nii wiaa nii-la kala si keri wialin̄ mua ma ta an̄ dage u don̄sun̄ tin̄ñaa di ba to ñii, u tiina ne jan̄ ñaa ni-bie Wia kuorii-la tuon̄. Nii-la ma kala síi to wialin̄ a dage u don̄sun̄ tin̄ñaa di ba ma to ñii titia, u tiina jan̄ yuge Wia kuorii-la tuon̄.

20 Mi jan̄ bula pima, see di ma keñ tuo-pula a kii Wia tenin̄ kerichiba ari Farisii timma-la a ññaa wialin̄ Wia síi che, di ñii dee, ma bi jan̄ wuo juu Wia kuorii-la tuon̄.”

*Yesu bul wiaa a tige baaniñ nanin̄ le*

21 Nii ne Yesu bira dage u haritooroo a bul, “Ma nia ari faafaa kala ne Moosis bula pi niaa a

bul di ba sí niaa kpu. U fa bula di nii-la kala ne kpu nuu, ba jaŋ kenu kaa mu dii u sariya.

<sup>22</sup> Ama leele mi jaŋ bula pima, nii-la kala si na baaniŋ u naaŋbie nyuŋ, ba jaŋ kenu kaa ku dii u sariya. Nii-la ma kala si yire u naaŋbie a bul di u ŋaa ni-peipei, ba jaŋ kenu kaa mu nialiŋ si hilime vuure wiaa teen. Nii-la ma kala si yire u naaŋbie a bul di u ŋaa ni-toɔ ne, u tiina jaŋ mu juu Wia nyiniŋ.

<sup>23</sup> Di ŋ ne keŋ puna mu Wia koruŋ di ŋ kpu a nyiga pu aŋ liise mu yi ari ŋ naaŋbie tuɔŋ cheye ŋ nyuŋ,

<sup>24</sup> leŋ puna-la koru-la nyuŋ aŋ miira mu ma di ŋ naaŋbie siŋ, ka di ŋ-na miira mu di ba kpu puna-la a pi Wia.

<sup>25</sup> Di nuu ne samin a kenin kaa mu sariya didiilin, ŋ ŋaa kukeri a bul wii-la wase wonbiin le lima lima aŋ-na mu. Di nii dee, u jaŋ kenin kaa he sariya didiire nisiŋ le. Sariya didiire ma jaŋ kenin kaa he porisiba nisiŋ le. Ba ne jaŋ kenin mu to dia.

<sup>26</sup> Di ba kenin mu to dia, ŋ bi jaŋ wuo lii see ŋ tiŋ chin-la kala ba si kere piŋ.

### *Yesu bul wiaa a tige haalaa chenin le*

<sup>27</sup> Ma nia di ba dagema di ma sí niaa haalaa che.

<sup>28</sup> Ama mi jaŋ bula pima, nuu-kala si na haala a cho duu kenu piŋ, u tiina juu Wia haache le ne u tuɔŋ le.

<sup>29</sup> Di ŋ na-diin siin ní che duu kenin he haache le, liisa ta. N si jaŋ juu Wia kuorii-la

tuon ari sii-togo, u ne kpia ba si jonun yuo he Wia nyinin le ari siaa balia.

<sup>30</sup> Di η na-diin nisin nii che duu kenin he haache le, kere ta. N si jan juu Wia kuorii-la tuon ari na-kuon, u ne kpia η si ken η yaraa kala an juu Wia nyinin.

*Yesu dage niaa haala vianin wiaa*

*Mat. 19.9; Maak 10.11-12; Luuk 16.18*

<sup>31</sup> Ba bira dagema a bul,

‘Di nuu nii che duu via u haala, u maga duu ηmunse tenin pi haal-la ari u jan viau.’

<sup>32</sup> Ama leele mi jan bula pima a bul, baal-na kala si via u haala, u naa haal-la juu Wia haache le ne, see di haal-la ka naa ha-choron wu-naalaa, ka u bala-na viau. Di haal-la ne bira mu jaa baal don, baal-la si jaau, u ma juu Wia haache le ne.

*Yesu bula pi niaa di ba si ηmiesu*

<sup>33</sup> Ma bira nia di ba bula pi la naabalimaba a bul,

‘Di η ne ηmiesa ari η jan naa wii pi Wia, si leje di wii-la ta,

ama naa wii-la η si si η jan naa a pi Wia.’

<sup>34</sup> Ama leele mi jan bula pima, di ma ne che di ma naa wii, ma si ηmiesu. Ma si Wia ηmiesu, bee wiaa u nii bej dunia kun-kala.

<sup>35</sup> Koo ma si tinteen ma ηmiesu, bee wiaa Wia naasin di-wiesin ne nii. Koo ma si Jerusalem ma ηmiesu, bee wiaa kuori-balin jan ne nii.

<sup>36</sup> Ma paala si ma nyun ma ηmiesu, bee wiaa ma paala bi jan wuo naa di ma nyu-punaa biri koo ba pulle.

<sup>37</sup> Ama ma-na yaa bul, 'Oo' koo 'Ai' dunɗuna a lii nii hariŋ. Di η ne seye, leŋ u sene ŋaa wutitii. Di η bira bi seye maa, leŋ duu ŋaa wutitii. Di nii dunɗuna dee, u lii Sitaani ne.

*Di nuu ne ŋaa wu-bɔŋ η le, sɪ wu-bɔŋ-la joŋo tɪmu*  
*Luuk 6.29-30*

<sup>38</sup> Ma nia ari Moosis fa bula a bul,  
'Di nuu ne tɔɔ η siin pure,  
η ma tɔɔ u siin pure,  
di nuu ne ηmoo η nyilin churi,  
η ma ηmoo u nyilin churi.'

<sup>39</sup> Ama leele mi jaŋ bula pima a bul, di nuu ne ŋaa wu-bɔŋ η le, sɪ wu-bɔŋ-la joŋo tɪmu. Di nuu ne falle η na-diin chanƙpaŋin le, keŋ η na-gua chanƙpaŋin ma kaa birima pu duu falle.

<sup>40</sup> Di nuu ne samin kaa juu kɔɔti duu laa η geri-balin, wuri η geri-bie ma pe pu.

<sup>41</sup> Di nuu ne fugun di ma duu ven meel-daa, leŋ di ma ven meel-daasin balia.

<sup>42</sup> Di η ne keŋ kun, di nuu piесе chiche, joŋo pu. Di nuu ne kɔ η teen a chiche kun duu chin, di η ne kene, joŋo chimu.

*Yesu bula ari la cho la diŋɗoŋɗo*  
*Luuk 6.27-28, 32-36*

<sup>43</sup> Ma nia ari Moosis fa si di ma cho ma dɔŋsun tiŋŋaa aŋ bere ma diŋɗoŋɗo.

<sup>44</sup> Ama leele mi jaŋ bula pima, má cho ma diŋɗoŋɗo a chuɔle Wia pipi nialin si to naasin dɔgisema.

<sup>45</sup> Di ma ne ŋaa nii, ma jaŋ wuo ŋaa ma Nyimma Wia si he Wia-jaŋ biirin. U leŋe Wia pɔse hihe ni-bɔŋɗo ari ni-zɔŋɗo kala le ne a

leŋ duonunŋ nii pipi ni-zoŋŋoɔ ari ni-boŋŋoɔ kala.

<sup>46</sup> Di ŋ ne cho nialinŋ si choŋ dunduna, ŋ bi jan keŋ time Wia-jan le. Lanpoo lilaaraa ma paala ŋinaa ŋii ne.

<sup>47</sup> Di ŋ ne tuose ŋ naanbiirinŋ dunduna chuchuoŋe, ŋ bi worunŋ ka ŋaa. Nialinŋ si bi Wia jinŋ ma paala ŋinaa ŋii ne.

<sup>48</sup> U maga di ma ŋaa tuo-pul timma ne a sí kuŋ-kala che ka, ari ma Nyimma si he Wia-jan si ŋaa Tuo-pul Tiina ŋii.”

## 6

*Yesu dageŋa ŋii la si jan ŋaa a joŋ kiaa pi niaa*

<sup>1</sup> Yesu bira dage u haritooro a bul, “Di ŋ níi che di ŋ ŋaa wu-zoŋ a pe ŋ doŋo tiina le, sí wu-zoŋ-la joŋo ŋaau le niaa tuoŋ. Di ŋ ne ŋaa ŋii, ŋ bi time keŋe ŋ Nyimma si he Wia-jan le teenŋ.

<sup>2</sup> Di ŋ ne joŋ kuŋ pe nuu le, sí leŋe di niaa jinŋ. Nialinŋ síi dage ba titia yie ŋaa ŋii Wii-chuoŋe diisinŋ le ari wonbii-porununŋ le. Ba ŋaa ŋii di niaa beŋeba le ne. Wutitii ne mi bulaa pima, ba laa ba time ne.

<sup>3</sup> Di ŋ níi joŋ kuŋ a pe nuu le, sí leŋe di ŋ nanɔoŋ-fieminŋ paala jinŋ.

<sup>4</sup> Leŋ duu ŋaa wu-faali. Di ŋ ne ŋaa ŋii, ŋ Nyimma Wia jan tuminŋ. U níi na wii-la ŋ si ŋaa.”

*Yesu dage ŋii la si jan chuchuoŋe Wia  
Luuk 11.2-4*

<sup>5</sup> Njii ne Yesu bira bul, “Di ma nfi chuole Wia, ma si nialin si dage ba titia nagu. Ba yie cho di ba chin Wii-chuole diisin le ari wonbiee seme a chuchuole Wia di nuu-kala naba. Wutitii ne mi bulaa pima, ba paala laa ba time ne.

<sup>6</sup> Ama di ma nfi che di ma chuole Wia, ma juu ma diisin a ken borusun to an sul ma Nyimma-la ma si buu na. U-na na wii-la ma si faa njinaa ne, u jan tinma.

<sup>7</sup> Di ma nfi chuole Wia, ma si faasa bul wiaa yuge, ari nialin si bi Wia jin si njaa nii. Ba biina ari ba si chuole Wia deen deen nii, Wia jan nii.

<sup>8</sup> Ma siba nagu. Ma Nyimma paala jin kialin ma si che ne, ka ma-na pipiesu nii.

<sup>9</sup> Nla ne u maga di ma chuole Wia: Ma bul, ‘La Nyimma Wia si he Wia-jan, len di n yirin yire.

<sup>10</sup> Len di n kuorii-la ko.

Len di niaa sei n niin tinteen deen le ari ba si sei Wia-jan le nii.

<sup>11</sup> Pila la jinin niin kudiilin

<sup>12</sup> an jon la haacheba chela, ari la ma si jon la donsun tinjaa haacheba cheba nii.

<sup>13</sup> Liisela wii-la si jan kenla he haache tuon le,

liisela wu-bonnon le, [bee wiaa kuorii-la ari dolun ari yiri-la nja n kiaa ne, leele a kaa mu deen deen. Ami.]’

<sup>14</sup> Di ma donsun tinjaa ne nja wiaa cheima le an ka ma jon cheba, ma Nyimma Wia si he Wia-jan le ma jan jon wialin ma si nja chei a chema.

15 Ama di ma ne bi wialin ma donsun tinɲaa si ɲaa cheima le jonɔ cheba, ma Nyimma Wia ma bi jan jon wialin ma si ɲaa chei a chema.”

*Yesu dage niaa nii-vɔbuɲ wiaa*

16 Nii ne Yesu si, “Di ma ne vɔɔ niin, ma si siaa kaa chei a nage nialin si dage ba titia. Ba yie gugolle ari losun a ken siaa kala chei di nuu-kala na a jin ari baa vɔɔ niin ne. Wutitii ne, mi bulaa pima, ba-na paala laa ba time kala dere ne.

17 Di ma ne vɔɔ niin, ma siaa a chaase ma nyun,

18 di niaa si wuo jin ari maa vɔɔ niin ne see ma Nyimma Wia dunɲa, Nii-la ma si bi na. U-na na wii-la ma si faa ɲaa ne, u jan tinɲa.”

*Yesu dage nii la si jan ɲaa a ken kuorun Wia-jan le*

*Luuk 12.33-34*

19 Yesu bira bula, “Ma si kiaa che bil ma titia le dunia deen le. Dunia le pugumaa jan dii donsun an ka donsun ma su, gaaraa ma jan juu gaa donsun.

20 Ama ma che kiaa bil ma titia le Wia-jan le, lee-la pugumaa si bi jan wuo dii. Ba bi jan su maa, gaaraa ma bi jan wuo gaaba.

21 Ma tuobiinaa yie he lee-la ma kiaa si he ne.

*Yesu dage niaa a tige pulun-la le*

*Luuk 11.34-36*

22 N siaa ne ɲaa ɲ yaraa pulumun. Di ɲ siaa ne zomɔ, ɲ yaraa kala ken pulumun ne,

23 ama di η siaa bi zɔŋ, η yaraa kala he birimiŋ tuɔŋ nɛ. Di puluŋ-la nɛ kɔ birime birimiŋ, birimiŋ lim lɛ nɛ η he ŋii.

*Yesu dage niaa di ba sí ba titia walimu a tige kudiilee ari genniŋ wiaa lɛ  
Luuk 16.13; 12.22-31*

24 Nuu-kala bi jaŋ wuo tiŋ tiŋtiŋŋaa a pi kuhiasiŋ balia. U jaŋ cho dɔŋɔ aŋ bere dɔŋɔ. U jaŋ tuto dɔŋɔ niŋ wiaa woruŋ aŋ via dɔŋɔ niŋ wiaa. Ŋ ma saa bi jaŋ wuo to Wia aŋ bira cho dunia kiaa maa.

25 Mi bulaa pima, ma sí ma titia walimu a tige kudiile-la ma si jaŋ dii a keŋ doluŋ koo kialin ma si jaŋ nyunyua. Ma sí ma titia ma walimu a tige genni-la lɛ ma síi che di ma lilaale. Ma miisiŋ nɛ kii kudiilee, ma yaraa ma kii genniŋ.

26 Má bee na diibiisiŋ si he wia nyuŋ a fifil. Ba bi pɛrɛ, ba bi kiaa kuŋ, ba ma bi kiaa ka tuɔlɛ virisiŋ lɛ, ka la Nyimma Wia si he Wia-jaŋ lɛ pipiba kudiilee. Ma nɛ paala keŋ liiba a kii diibiisiŋ.

27 Di ma níi walime ma titia kiaa deenba wiaa, bua-la lɛ ma miisiŋ si jaŋ dɛrɛ, u bi jaŋ keŋ tapul-bala ma pɛ pima.

28 Di ma nɛ saa bi tapul-bala ma wuo kaa pɛ ma miisiŋ lɛ tapulii-la ma si jaŋ suu, bɛɛ nɛ saa tii kiaa deenba wiaa wiwalimɛma? Má bee na tii-filaa si he giriŋ lɛ. Ba bi tiŋ, ba bi genniŋ ma yɛrɛ a lilaale,

29 ama ba zɔmɔ nɛ woruŋ. Kuoru kubala nɛ fa he dime. Baa yirɛ Solomɔŋ. U fa si he u

miisinj ɛ, u keɲ kɪaa nɛ woruɲ. Ama u gennin fa bi zomɔ mage tii-filaa deenba.

<sup>30</sup> Wia nɛ yie ɲaa yaɲ nyu a waa a zɔɲ, ka u bi dieni aɲ hihil. Di u nɛ hɪla, ba yie nyige nyininj. Di Wia nɛ wuo ɲaa yaɲ zɔɲ ɲii, bɛɛ nɛ tii ma biine ari u bi jaɲ wuo pɪma kudiilee ari gennin? Ma yarida bi yuge.

<sup>31</sup> Ma saa sɪ leɲe di ma walime ma titia kudiile-la ma si jaɲ dii ari ku-la ma si jaɲ nyua ari ku-la ma si jaɲ laale wɪaa.

<sup>32</sup> Nialɪɲ si bi Wia jɪɲ dunia deen ɛ, ba nɛ yie walima chiche kɪaa deenba. Ma Nyimma si he Wia-jaɲ ɛ jɪma ari maa che kɪaa deenba kala nɛ.

<sup>33</sup> ɲii wɪaa mɔ laa sipaanj a che kialɪɲ si he Wia kuorii-la tuɔɲ a che ɲii ma si jaɲ ɲaa a keɲ tuɔ-pula u sipaanj. U jaɲ joɲ kuɲ-kala si ka a pɛ pɪma.

<sup>34</sup> Ma saa sɪ ma titia walimu a tiɲ chieminj wɪaa. Chɛɛ kala keɲ u wiwalimia nɛ. Ma sɪ wii dɔɲ kala kaa pɛ chɛɛ kala wiwalimii ɛ.

## 7

*Yesu si di la sɪ la dɔɲsun tiɲɲaa wɪaa laa jɪɲ  
Luuk 6.37-38, 41-42*

<sup>1</sup> Ma sɪ ma dɔɲsun tiɲɲaa wɪaa laa jɪɲ. Di ma nɛ ɲaa ɲii, Wia ma bi jaɲ joɲ cheerinj pɪma.

<sup>2</sup> Wia jaɲ dii ma sariya ari ɲii titia ma sɪi ɲaa ma dɔɲsun tiɲɲaa ɛ. ɲii titia ma si joɲo to ma dɔɲsun tiɲɲaa ɛ, ɲii titia nɛ Wia ma jaɲ joɲo toma ɛ.

<sup>3</sup> ɛɛ nɛ ɲ jaɲ wuo na daa-bie si tel ɲ naanbie siin ɛ aɲ bi daa-bal-la si tel ɲ titia siin ɛ ka na?

<sup>4</sup> N bi jaŋ wuo bula pi ŋ naaŋbie a bul duu len di ŋ liise daa-bie-la si he u siin le, aŋ ka daa-bal-la si he ŋ titia siin le.

<sup>5</sup> N-na kaŋfugi tiina, laa sipaan liise daa-bal-la si he ŋ titia siin le, ka ŋ siaa wuo na, nii ne ŋ ma jaŋ wuo pe ŋ naaŋbie le a liise daa-bie-la si he u siin le a pu.

<sup>6</sup> Ma sí ku-zoŋŋoo joŋo pi vahin, ma ma sí ma ku-zoŋŋoo joŋo bil toonun sipaan. Di ma ŋaa nii, ba jaŋ nuose ari ba naasin aŋ toma harin a diŋma.

*Má che kias, ma jaŋ na*  
*Luuk 11.9-13*

<sup>7</sup> Sul kias, ŋ jaŋ laa.

<sup>8</sup> Che kias, ŋ jaŋ na. Du boro, ba jaŋ kaa suro pin. Nii-la kala si sul kias Wia teen, u yie laa ne. Nii-la sí che kias, u yie na ne. Nii-la ma si du boro, ba yie kaa suro pu ne.

<sup>9</sup> Di ŋ bie ne piése a chiche boroboro, ŋ jaŋ sii a joŋ tabiin puu?

<sup>10</sup> Koo duu ka che cheŋfilin, ŋ jaŋ joŋ dimin a puu? Ai, ma bi jaŋ ŋaa nii.

<sup>11</sup> Di la ne bomo aŋ joŋ ku-zoŋŋoo aa pi la biirin, e ne la Nyimma si he Wia-jaŋ a keŋ wu-zoŋŋoo bi jaŋ joŋ ku-zoŋŋoo a pi nialaa si sula chichee?

<sup>12</sup> Wii-la ŋ si cho di niaa joŋo ŋjaan le, ŋ ma ŋaa kukeri a joŋ nii titia a ŋjaaba le. Wialin Moosis fa si ŋmunsa bil di niaa tuto ari nialin fa sí bul wiaa, Wia Diŋ-zoŋ-la dolun le, wu-nyun ne wiin deen.”

*Má to boi-bie a mu Wia-jaŋ  
Luuk 13.24*

<sup>13</sup> Yesu bira bul, “Má to boi-bie a mu Wia-jaŋ. Boi-la ba si to aa mu Wia nyiniŋ, u jalia ne, woŋbii-la ma veniŋ bi hei. Niaa yuga ne a tuto woŋbii-la.

<sup>14</sup> Ama Wia-jaŋ boiŋniin muuro ne, woŋbii-la ma síi mu lee-la, u veniŋ heye. Niaa baŋmene dunɗun ne yie wuo na woŋbii-la a to.

*Yesu bul wiaa a tiŋ nialiŋ si nyia wiaa a bul di ba  
ŋaa nialiŋ síi bul wiaa, Wia Diŋ-zɔŋ-la doluŋ le  
Luuk 6.43-44*

<sup>15</sup> Má pɔ ma titia le ari nialiŋ si nyia wiaa a bul di ba ŋaa nialiŋ síi bul wiaa, Wia Diŋ-zɔŋ-la doluŋ le ne. Ba jaŋ kɔ ma teen ari ni-zomɔ ba siaa le, ama ba tuɔŋ le, ba ŋaa ni-bomɔ ne a nage gunɗurusuŋ si yie keŋe kiaa chichan.

<sup>16</sup> Ma jaŋ to ba wu-ŋaalaa le ne a jinba. Sojaamin bi chichueŋ ka neŋ, soɗuŋ-gbene ma bi tutogo nanbilaa ka neŋ.

<sup>17</sup> Tia-la kala si keŋ yarifiɛlaa, uu neŋ neŋ-zɔŋɔɔ ne, ama tia-la si bi yarifiɛlaa keŋe níi neŋ neŋ-lɔrunuŋ.

<sup>18</sup> Tia-la si keŋ yarifiɛlaa bi neŋ-lɔrunuŋ wuo neŋ, tia-la si bi yarifiɛlaa keŋe ma bi neŋ-zɔŋɔɔ wuo neŋ.

<sup>19</sup> Tia-la kala si bi neŋ-zɔŋɔɔ ka neŋ, ba jaŋ kere ta a joŋo yuo he nyiniŋ tuɔŋ.

<sup>20</sup> Nii le ne ma jaŋ to a jin nialiŋ síi nyia wiaa a bul di ba ne ŋaa nialiŋ síi bul wiaa, Wia Diŋ-zɔŋ-la doluŋ le.

*Nuu-kala dee bi jaŋ juu Wia kuorii-la tuɔŋ  
Luuk 13.25-27*

<sup>21</sup> Nuu-kala si yiremi, ‘mi Tiina, mi Tiina,’ dee bi jaŋ juu Wia kuorii-la tuɔŋ, see nialin sɪi ŋaa wialin mi Nyimma si he Wia-jaŋ si daga.

<sup>22</sup> Di Wia sariya che-diilin ne yie, niaa jaŋ yuge a bul, ‘La Tiina, la Tiina, la bul Wia wiaa a pi niaa ŋ dolun le aŋ kiri jinsin niaa le ŋ dolun le, la ŋaa wu-magilaa ma a yuge ŋ dolun le.’

<sup>23</sup> Ama mi jaŋ bula piba a bul, ‘Mi paala bima jin. Ma wu-bɔŋ ŋiŋaaraa, má surisa lii mi teen!’ ”

*Yesu mage namaga a tige di-saaraa balia le  
Luuk 6.47-49*

<sup>24</sup> Yesu bira si, “Nii-la kala si kɔ mi teen a jegile nii mi niin wiaa deenba mi si bula pima a tutoba, mi jaŋ dagema ŋii u si naga. U nage wu-jinna si saa u dia ne. U saau kpaginyilin nyun ne.

<sup>25</sup> Nii ne duonun nii. Liin su lerin kala, pelin ma lu a ŋmoo lii-la a yage dia-la, ka dia-la bi tele, bee wiaa ba saau worun ne kpaginyilin nyun.

<sup>26</sup> Ama nii-la ma kala si jegile nii mi niin wiaa deenba mi si bula pima aŋ biba to, u nage ni-yaarin si saa u dia ne. U saau hagili-bunbugulo tuɔŋ ne.

<sup>27</sup> Nii ne duonun nii. Liin su lerin kala, pelin ma lu a ŋmoo lii-la yage dia-la, dia-la kala tel wuru.”

<sup>28</sup> Yesu si bul wiaa deenba dere, ba ŋaa ni-dan-la kala wu-kpunkpere.

<sup>29</sup> U biba daga a nage ba Wia teniŋ kerichiba sfi dageba nii. U si dageba nii, u keŋ wii-la doluŋ ne.

## 8

*Yesu vaare gbege*

*Maak 1.40-45; Luuk 5.12-16*

<sup>1</sup> Yesu si bul wiaa deenba dere, u lii peelin nyuŋ a ku tuu. Nii ne ni-dan tuto u hariŋ.

<sup>2</sup> Gbege kubala ma ko u teen a tuu kpirimi u sipaan aŋ sul Yesu a bul, "Kuhian, di ŋ ne cho, ŋ jaŋ wuo ŋaa di mi duori."

<sup>3</sup> Nii ne Yesu liise u nisiŋ a digu aŋ bul, "Mi cho ne. Duori." Nii ne yawiil-la guu leŋ baal-la.

<sup>4</sup> Nii ne Yesu bula pu a bul, "Si wiin deen bula pi nuu-kala. Ama keŋ ŋ titia mu dage nii-la si kpu pusun pipi Wia duu kpu pusun a pi Wia a piŋ ari Moosis fa si dagema nii. Di ŋ ne ŋaa nii, niaa jaŋ na ari ŋ bira bi disinniŋ kene."

*Yesu vaare Rom kuhian dia tintinna*

*Luuk 7.1-10*

<sup>5</sup> Nii ne Yesu sii mu Kapenam di Rom laali-yuoroo kuhian ku chemu a sulu duu peu le a bul,

<sup>6</sup> "Mi kuhian, mi dia tintinnu nii wiilu a piŋ dia le. U bi wuo ven a nina heen woruŋ."

<sup>7</sup> Nii ne Yesu bula pu a bul, "Mi jaŋ ku ŋaa duu duori."

<sup>8</sup> Ama baal-la bula pu a bul, "Mi Tiina, mi bi maga di ŋ ku juu mi dia. N-na yaa suri ŋ niin dunduŋa a bul di mi tintinni-la duori, u jaŋ duori.

<sup>9</sup> Mi ma paala to mi laali-yuoroo nihiasin̄ niin̄ n̄. Laali-yuoroo d̄n̄sun̄ ma tuto mi ma niin̄. Di mi n̄ bul di nia deen̄ mu daha, u yie mu n̄. Di mi ma n̄ si di nia deen̄ k̄o daha, u yie k̄o n̄. Di mi n̄ bul pi mi yomo duu n̄aa deen̄, u yie n̄aa n̄.

<sup>10</sup> Yesu si nii wiaa deen̄ba, u n̄aa wu-kpun̄kpere. N̄ii n̄ u bula pi ni-dan̄-la fa s̄ii to u harin̄ a bul, “Wutitii n̄ mi bulaa pima, mi ha bi yarida deen̄ doho na Iziral tin̄teen̄ n̄aa tuon̄.

<sup>11</sup> Mi bulaa pima, n̄aa jan̄ yuge a lii tan̄-bubuon̄ ari tan̄-sem̄e kala a k̄o a hon̄ Wia kuorii-la tuon̄ di ba di Abiraham ari Aizik ari Jekob dii kudiilee,

<sup>12</sup> ama nialin̄ fa si maga di ba h̄e Wia kuorii-la l̄e an̄ bi jua, ba jan̄ jon̄ba yuo ta jeen̄ harin̄ di ba h̄e birimin̄ tuon̄ a pina yiyel an̄ didin̄ ba nyilaa.”

<sup>13</sup> N̄ii n̄ Yesu bula pi laali-yuori-hian̄-la a bul, “Mu dia, n̄ si n̄aa yarida ari wii-la, u jan̄ n̄aa.” Bua-la titia l̄e laali-yuori-hian̄-la tin̄tinni-la duori.

*Yesu vaare n̄aa yuge*

*Maak 1.29-34; Luuk 4.38-41*

<sup>14</sup> N̄ii n̄ Yesu mu Piita dia. U si jua, u na di u hiili-haala pina a wiile, u yaraa kala lin̄.

<sup>15</sup> N̄ii n̄ Yesu digi u nisin̄ l̄e. U yaraa fa si lima n̄ii, u fīle. U sii n̄aa kudiilee piba ba dii.

<sup>16</sup> Didaanin̄ si yie, ba ken̄ n̄aa yuge a kaa k̄o Yesu teen̄. Jin̄sin̄ n̄ ken̄ n̄aa d̄n̄sun̄. Yesu bul wiaa a kiri jin̄-bom̄o-la ta an̄ vaare nialin̄ kala fa s̄ii wiilu.

17 U ηaa wiinj deenj di wialinj Azaaya fa si bula ku ηaa wutitii. Azaaya fa ηaa nii-la sii bul wiaa, Wia Din-zon-la dolunj ε ne. U fa bula a bul, “U ne laa la nyanyalaa kala a चुण a kaa mu ta.”

*Nialinj si maga di ba to Yesu harinj*

*Luuk 9.57-62*

18 Yesu si na di ni-danj-la ku gollu, u ηaa ba di u haritooroo chol fuonj cholo donj.

19 Nii ne Wia teninj kerichi kubala ko u teenj a bula pu a bul, “Mi kuhianj, mi ηaa siri di mi to η harinj a mu lee-na kala η sii mu ne.”

20 Nii ne Yesu bula pu a bul, “Jollunj kenj buasunj ne a jujuu, diibiisinj ma kenj dellinj a jujuu, ama mi-na Nuhuobiine Bie bi di-pininj kene di mi pina wiesi.”

21 Niaa donsunj ma fa sii to Yesu harinj, ba tuonj kubala ma bula pu a bul, “Kuhianj, lenj mi laa sipaanj mu hugi mi nyimma.”

22 Nii ne Yesu bula pu a bul, “To mi harinj anj lenj di suununj huhugi ba titia suununj.”

*Yesu ηaa lii-pelinj kere*

*Maak 4.35-41; Luuk 8.22-25*

23 Nii ne Yesu juu liinj daboro. U haritooroo to u harinj a ma mu juu,

24 di pel-duo kubala suomo a lulu ηii a ku ηmoo liinj. Nii ne lii-pelinj to liinj daboro-la. Liinj daboro-la faa che duu tuu liinj bubuonj. Ama Yesu fa pinj donj ne.

25 Nii ne u haritooroo mu chisu a bula pu a bul, “La Tiina, laala ta, laa che di la suu ne.”

26 Nii ne Yesu pieseba a bul, “Bee ne tii fawullunj kenjma? Ma yarida bi yuge.” Nii ne u

sii kpia pel-la ɛ aŋ bula pi fuo-la maa duu fiela piŋ, lerinŋ kala guu ŋaa fuii.

<sup>27</sup> U ŋaa nuu-kala wu-kpuŋkpere. Nii ne ba pipiese doŋo, “Ni-bee ne ŋla? Peliŋ ari lii-peliŋ kala tuto u niinŋ.”

*Yesu kiri jiŋsiŋ baalaa balia ɛ*

*Maak 5.1-20; Luuk 8.26-39*

<sup>28</sup> Nii ne Yesu sii mu tinŋtee kubala baa yire Gadara. Lee-la fa he fuoŋ cholo ne. Di baalaa balia lii vaamaa tuoŋ a ku chemu. Jiŋsiŋ ne fa keŋ baala-la. Ba nyinyaase. Nuu-kala fa bi woŋbii-la wuo to.

<sup>29</sup> Ba si na Yesu, ba guu ŋmoo niinŋ a piɛsu, “Bee ne ŋ chiche di ŋ ŋaala ɛ Wia Bii? N ko di ŋ doŋisela nee, ka bua-la ha bi yiee?”

<sup>30</sup> Di toonuŋ ma he lee-la a yuge a goŋlo didii kiasa.

<sup>31</sup> Nii ne jiŋsi-la sul Yesu a bul, “Di ŋ ní che di ŋ kirila di la lii, leŋ di la mu juu toonuŋ deenba.”

<sup>32</sup> Nii ne Yesu bula piba a bul, “Má lii.” Nii ne ba lii baala-la ɛ a mu juu toonu-la. Nii ne toonu-la kala sii fá a lii peel-la nyuŋ a tuu tel muga tuoŋ a suu.

<sup>33</sup> Too-daara-la fá a juu taŋ-la tuoŋ a bul wii-la kala si ŋaa a pi niaa ari wii-la si ŋaa baala-la fa si keŋ jiŋsiŋ ɛ.

<sup>34</sup> Nii ne nuu-kala si he taŋ-la ɛ lii a mu duu na Yesu. Ba si mu nau, ba sulu duu lii ba tinŋteenŋ ɛ.

## 9

*Yesu vaare gberike*

*Maak 2.1-12; Luuk 5.17-26*

<sup>1</sup> Nii ne Yesu sii juu liiŋ daboro a miira chol a mu u jaŋ,

<sup>2</sup> di niaa chuŋ gberiku kubala si piŋ u boŋo nyuŋ a kaa ko Yesu teen. Yesu si na ari ba ŋaau yarida woruŋ, u bula pi gberiku-la a bul, “Sii fawulluŋ fá mi bii, mi joŋ ŋ haacheba cheŋ ne.”

<sup>3</sup> Nii ne Wia teniŋ kerichiba-la doŋsuŋ pipiese doŋo a bul, “Baala deen tuuse Wia joŋŋoo ne.”

<sup>4</sup> Ama Yesu jiŋ wii-la ba fa sii biinu a pieseba a bul, “Be ne tii maa biine wu-boŋuŋ deen?”

<sup>5</sup> Mi si jaŋ bul di mi joŋ u haacheba cheu ne koo mi si jaŋ bul duu sii a chuoli u boŋo a viiri, ba tuŋ kubee ne ŋaa moli?

<sup>6</sup> Mi jaŋ dagema ari mi-na Nuhuobiine Bie keŋ doluŋ dunia le di mi wuo joŋ haacheba che niaa.” Nii ne u bula pi gberiku-la a bul, “Sii a joŋ ŋ boŋo a mu dia.”

<sup>7</sup> Baal-la guu duori a sii a mu dia.

<sup>8</sup> Ni-daŋ-la si na nii, fawulluŋ keŋba. Ba denne Wia ari u si wuo joŋ doluŋ nii a pi nuhuobiinee.

*Yesu yire Matiu*

*Maak 2.13-17; Luuk 5.27-32*

<sup>9</sup> Yesu si lii lee-la aa veŋ, u na lanpoo lilaaru kubala baa yire Matiu. U fa hoŋ u tiŋtinni-dia le ne. Nii ne Yesu yiru a bula pu duu sii to u hariŋ. U sii a to u hariŋ.

<sup>10</sup> Nii ne Yesu juu Matiu dia, ba di u haritooro kala, a hoŋo didii kiasa. Lanpoo

lilaaraa yuga ari haache diiree ma a kɔ, ba kala didii kialin.

<sup>11</sup> Farisii tinḡaa dɔḡsun naba a piɛɛ Yesu haritooroo a bul, “Bɛɛ nɛ tii ma kuhian ari lanḡpoo lilaaraa ari haache diiree kala hɔnɔ didii kiaa?”

<sup>12</sup> Yesu nii wii-la ba si bula a miira bula piba a bul, “Nialin si ken yarifiɛlaa, ba bi daalusun ḡḡḡaara ka che, see nialin sii wiilu.

<sup>13</sup> Má mu a beḡ Wia tenin tuɔḡ a na wii-la ba si ḡḡḡsa bubuɔḡ. Ba ḡḡḡsa, ‘Wia si, mi cho di ma fifá niaa nennige nɛ a kii ma si kpu pusun pipimi.’

Mi kɔ di mi yirɛ haache diiree nɛ di ba len ba haacheba. Nialin si ken tuɔ-pula mi sipaan dee mi kɔ di mi yirɛ.”

*Yesu dage nii-vɔbuḡ wiaa*

*Maak 2.18-22; Luuk 5.33-39*

<sup>14</sup> Nii nɛ Joɔḡ Wia lii-foori-la haritooroo kɔ Yesu teen a piɛsu a bul, “Bɛɛ nɛ tii la di Farisii tinḡaa vuvɔɔ niin an ka ḡ haritooroo-na bi niin vɔɔ?”

<sup>15</sup> Nii nɛ Yesu piɛɛba a bul, “Di nuu nɛ mu jaa haal kaa kɔ, ka ba duu nanḡḡsun ḡḡḡ, u nanḡḡsu-la tuɔḡ jan chei? Ai. Ama cheɛ dɔḡ nɛ hɛ dime, ba jan ken baal-la kaa mu lee, an ka di u nanḡḡsu-la vɔɔ niin.”

<sup>16</sup> Nii nɛ u bira mage namaga a piba a bul, “Nuu-kala bi jan jon ḡriɛ-falin a kaa tɔ ḡri-binin. N nɛ ḡaa ḡii, ḡ jan chei ḡri-falii-la.

<sup>17</sup> Nii titia nɛ nuu ma bi jan jon si-huon a hɛ pupoi-kpaan ɛ. N nɛ ḡaa ḡii, pupoi-la jan yerɛ, di sin-la kala bisa ta. Si-huon maga di ḡ jonu hɛ

pupoi-zomunj le ne, di sinj-la ari pupoi-la kala zonj.”

*Yesu chise Juu tinjaa kuhianj tolo suunj le anj pe vaare haal kubala*

*Maak 5.21-43; Luuk 8.40-56*

<sup>18</sup> Yesu fa sii bul wiaa nii, Juu tinjaa kuhianj kubala ko u teenj a tuu kpirimi u sipaanj anj bula pu a bul, “Mi tolo ne yie suu leele, ama ku jonj nj nisinj danj le duu duori.”

<sup>19</sup> Nii ne Yesu to u harinj, ba di u haritooroo kala.

<sup>20</sup> Ba sii mu nii, di haal kubala ma he dime. U fa kenj tinj jisinj fii ari balia ne, ka u po u bi dere. Nii ne u ko a bal Yesu harinj a digi u gerinj niipininj le

<sup>21</sup> anj bul u titia le, “Di mi ne digi u gerinj maa, mi janj duori.”

<sup>22</sup> Nii ne Yesu miira daase a nau a bula pu a bul, “Mi tolo, si fawullunj fa, nj yarida ne njaa nj duori.” Haal-la guu duori bua-la titia le.

<sup>23</sup> Nii ne ka Yesu-na juu Juu tinjaa kuhianj-la dia. U jua di yo-daaraa china aa yel.

<sup>24</sup> Nii ne Yesu bula piba di nuu-kala lii, di tolo-la bi suba, di u ta pinj donj ne. Nii ne ba kala mumomu.

<sup>25</sup> Ama ba si kiri nialinj kala ba lii, Yesu mu juu tolo-la dia a kenj u nisinj le, u sii.

<sup>26</sup> Wiinj deenj Yesu si njaa, u teeli tinjee-la kala.

*Yesu vaare nyulimaa balia*

<sup>27</sup> Yesu si lii Juu tinjaa kuhianj-la dia-la le aa venj, nii ne nyulimaa balia sii a tuto u harinj anj



<sup>37</sup> Nii ne u bula pi u haritooroo a bul,  
 “Ku-kumaa yuga ne baga le di ba kuŋ, ama  
 tinntinnaa bi yuge di ba kuŋ kialin.

<sup>38</sup> Má saa sul baga-la tiina duu he tinntinnaa  
 yuge di ba tin tinntimii-la.”

## 10

*Yesu yire u haritooroo fii ari balia*  
*Maak 3.13-19; Luuk 6.12-16*

<sup>1</sup> Nii ne Yesu yire u haritooroo fii ari balia a  
 he donjo le a piba dolun di ba wuo kikiri jinŋin  
 aŋ pe vivaare niaa nyanyal-yiriba kala.

<sup>2</sup> Nialin u si liisa yiraa ne nla: Saamon, ba fa  
 kenu yiyire Piita ma ne, ari u naanbie Anđuru,  
 ari Jeems, si naa Zebidii bie, ari Joŋ. Joŋ fa  
 naa Jeems naana ne.

<sup>3</sup> U bira liise Filip, ari Batolomi, ari Tomas, ari  
 Matiu lanpoo lilaari-la, ari Alifyas bie Jeems,  
 ari Tadiyas,

<sup>4</sup> ari Saamon Zelot, ari Judas Isikarot, nii-la si  
 ku naa zenbe tiina a yalle Yesu.

*Yesu tin u haritooroo fii ari balia*  
*Maak 6.7-13; Luuk 9.1-6*

<sup>5</sup> Niaa deenba fii ari balia, Yesu ne tinba ba  
 lii. Nla ne u bula piba aŋ ka ba lii: “Ma sí nialin  
 si bi juu tinnaa naa tinteen mu. Ma sí Samaria  
 tinteen ma mu.

<sup>6</sup> Ama má mu Iziral niaa teen, niaa deenba  
 lele nage piesee si lele ne a bira bi dia wenin jin.

<sup>7</sup> Má mu a bul Wia kuorii-la wiaa piba a bul  
 duu kpaga ne.

<sup>8</sup> Má vaare nyanyal tiŋŋaa a chise suunuŋ a vaare gbegisiŋ a kiri jiŋ-bonŋoɔ niaa le. Ma ne ŋaa ŋii, ma sí time kala laa, bæe wiaa ma ma bi kuŋ-kala time aŋ laa.

<sup>9</sup> Ma sí moribiee ma joŋo he ma geri-fesiniŋ le.

<sup>10</sup> Ma ma sí sulli-gbaŋsiŋ koru a kaa ven wonbii-la a sí genniŋ tuŋ-bulia koo neŋteŋŋee tuŋ-bulia laalu, ma sí daaŋtiga ma koru. Di tiŋtinna ne tima, u maga di ba tiŋmu ne.

<sup>11</sup> Di ma ne mu yi ta-bal koo ta-bie, má juu taŋ-la tuoŋ a bee che nii-la si jaŋ wuo laama bil a chuchua dii-bala-la le hali di bua-la ma si jaŋ lii taŋ-la le yi.

<sup>12</sup> Di ma ne mu juu dia kala, má laa sipaan chuole dia-la niaa a bul, ‘Dia deen niaa jaŋ hoŋ ari yarifielaa.’

<sup>13</sup> Di ba ne laama, ba jaŋ keŋ yarifielaa. Di ba ne bima laa, yarifiela-la jaŋ miira ko ma teen.

<sup>14</sup> Di ma mu nuu-kala teen, duu po di ma sí juu a bi ma wialiŋ ma jegilee nii, má lii dia-la le koo taŋ-la le a kpesi ma naasiŋ hagila ta. Ba jaŋ jiŋ ari ba ŋaa wii ne a cheima le.

<sup>15</sup> Mi bulaa pima ari sariya che-diiliŋ, Wia jaŋ doŋise taŋ-la niaa a kii bua-la le u si doŋise Sodom niaa ŋii.”

*Hee-la si jaŋ ko*

*Maak 13.9-13; Luuk 21.12-17*

<sup>16</sup> Nii ne Yesu bira bul, “Má jegile nii, ma nage pie-biisiŋ ne. Mii tiŋma di ma guoli guŋgurusuŋ tuoŋ. Má saa keŋ wu-jimiŋ a nage

diŋŋaa si keŋ wu-jimiŋ nii a leŋ di ma siaa fiele a nage kokosun siaa si fiele nii.

17 Má keŋ ma titia worun ni-bonŋoɔ deenba teen. Ba jaŋ keŋma kaa mu nialiŋ si yie hilime vuvuure wiaa teen di ba dii ma sariya. Ba jaŋ viirima Wii-chuoŋe diisiŋ ɛ.

18 A tiŋ mi wiaa, ba jaŋ keŋma kaa mu kuoroo ari taŋ kuhiasiŋ sipaan di ma dii mi danŋsia, ba di nialiŋ si bi Juu tiŋŋaa ŋaa kala teen.

19 Di ba ne keŋma kaa mu di ba dii ma sariya, ma sí leŋe di ma boisiŋ joŋ wialiŋ ma si jaŋ bul ɛ a laa ma titia. Bua-la ɛ Wia jaŋ joŋ wu-jimiŋ a he ma nyun ɛ.

20 Wialiŋ ma si jaŋ bul, ma dee bi jaŋ bul. Ma Nyimma Wia jaŋ leŋ di u Diŋ-zon-la toma ɛ a bul wiaa pima.

21 Naanbiiriŋ jaŋ keŋ doŋo a kaa mu tia di ba kpu. Nyimmaba ma jaŋ ŋaa nii ba biiriŋ ɛ. Biiriŋ ma jaŋ ŋaa nii a ma keŋe ba nyimmaba ari ba naanba a kaa mu pa di ba kpu.

22 Nuu-kala jaŋ berema a tiŋ mi wiaa. Ama nii-la kala si nyalime a mu deŋe, Wia jaŋ laau ta.

23 Di ba ní doŋisema taŋ-la ɛ, má lii a fá mu taŋ doŋo. Mi bulaa pima ari ma bi jaŋ wuo tiŋ tiŋtimii-la deŋe Iziral tasiŋ kala ɛ, ka di mi-na Nuhuobiine Bie-na ko.

24 Sukuuri bie bi u kerichi ka kii, nii-la sí tiŋ tiŋtiŋŋaa nuu doŋ teen ma bi yuga kii nii-la teen u sí tiŋ tiŋtimii-la. Tiŋtinna bi u kuhian ka kii.

25 Ama di nii-la ne gunne tiŋtimii-la deŋe, u maga di ba di nii-la sí dagu kala mage doŋo ne.

Di ba ne saa keŋ dia tiina kaa yire Belizibul,  
 ŋii-na ba jaŋ he yiri-boŋŋɔɔ a pi u dia niaa kala.

*Nii-la si maga di la fá*

*Luuk 12.2-9*

<sup>26</sup> Nii wiaa, ma sí nuhuobiinee fá. Wii-kala si faa jaŋ ku lii pulumuŋ, niaa ma jaŋ nii wii-la si ŋaa wu-faali.

<sup>27</sup> Wii-kala mi si bula pima birimiŋ tuɔŋ, u maga di ma bulu pulumuŋ tuɔŋ. Wii-kala bira ba si muŋso bula pima birimiŋ tuɔŋ, má heele bulu lusuŋ nyuŋ.”

<sup>28</sup> Nii ne Yesu bira bul, “Ma sí nialiŋ si jaŋ wuo kpu ma yaaraa fá, niaa deenba bi ma dima wuo kpu. Ama má fá Wia. U ne keŋ doluŋ duu wuo joŋ ma yaraa ari ma diŋsiŋ kala a he Wia nyiniŋ tuɔŋ. Mi bula pima, má fifáu.

<sup>29</sup> Zaarikokobiisiŋ balia dee ba yie joŋo yalle kɔbu koo? Ama ba tuɔŋ kubala ma bi jaŋ tel tiŋteen, see ma Nyimma Wia seye.

<sup>30</sup> Wia paala jin ma nyu-punaa kala ma niin ne.

<sup>31</sup> Nii wiaa, ma sí leŋe di fawulluŋ keŋma. Ma ne paala kii zaarikokobiisiŋ a yuge.

<sup>32</sup> Nii-la kala si jaŋ wuo bul niaa tuɔŋ ari u ŋaa mi nuu ne, mi ma jaŋ bul ŋii a tigeu le mi Nyimma Wia si he Wia-jaŋ le sipaan.

<sup>33</sup> Ama nii-la kala si viami niaa tuɔŋ, mi ma jaŋ viau mi Nyimma Wia si he Wia-jaŋ le sipaan.

*Yesu si duu bi dunia kɔ di niaa siŋ, see di ba yuo dɔŋɔ.*

*Luuk 12.51-53; 14.26-27*

34 Ma fa biina di mi kɔ dunia di niaa siŋ nɛɛ? Ai, yuosuŋ nɛ mi kaa kɔ.

35 Mi kɔ di niaa pɔrɛ dɔŋɔ ɛ nɛ. Bie jaŋ keŋ u nyimma di ba yuo dɔŋɔ. Tolo ma jaŋ keŋ u naaŋ di ba guraa yuo dɔŋɔ. Bii-haala ma jaŋ keŋ u bala naaŋ di ba guraa yuo dɔŋɔ.

36 Nuu diŋdɔŋŋɔɔ paala jaŋ hɛ u dia-niaa tuɔŋ.

37 Nii-la kala si cho u nyimma ari u naaŋ a kiimi, u bi maga duu ŋaa mi haritooru. Nii-la kala ma si cho u bie koo u tolo a kiimi, u bi maga duu ŋaa mi haritooru.

38 Nii-la kala si bi u titia daa-geɛɛ baase a to mi hariŋ, u bi maga duu ŋaa mi haritooru.

39 Nii-la kala sii che u titia miisiiŋ, u jaŋ joŋ u miisiiŋ ta. Ama nii-la kala si via u miisiiŋ ta a tiŋ mi wiaa, u jaŋ keŋ miisiiŋ.

*Time-la Wia si jaŋ joŋo tiŋla.*

*Maak 9.41*

40 Nii-la kala si keŋma woruŋ, u tiina keŋmi ma woruŋ nɛ. Nii-la ma kala si keŋmi woruŋ, u keŋ Tiina ma si tiŋmi woruŋ nɛ.

41 Nii-la kala si laa Wia tiŋtinna dɔŋɔ a kɛnu woruŋ u dia ɛ a tiŋ u si ŋaa Wia tiŋtinna wiaa, u jaŋ laa u time. Time-la Wia si jaŋ joŋo tiŋmu, u jaŋ mage time-la Wia si jaŋ tiŋ u tiŋtinni-la. Nii-la kala ma si laa tuɔ-pul tiina bil a tiŋ u si ŋaa tuɔ-pul tiina wiaa, time-la Wia si jaŋ joŋo tiŋmu, u jaŋ mage time-la u si jaŋ joŋo tiŋ tuɔ-pul tiina-la.

42 Nii-la ma kala si ŋaa lii-fiela pi mi haritooro deenba tuon ku-bie a tin u sii to mi hariŋ wiaa, u tiina ma jaŋ laa u time.”

## 11

*Joon Wia lii-foori-la tin niaa ba ko Yesu teen  
Luuk 7.18-35*

<sup>1</sup> Yesu si bul wiaa deenba a pi u haritooro fii ari balia-la deere, u lii lee-la a mu duu dage niaa aŋ pe bul Wia wiaa tasi-la si kpage lee-la.

<sup>2</sup> Joon Wia lii-foori-la fa si he sarika le a nii wialin Kirisito fa sii ŋaa, u tin u haritooro donsun Yesu teen

<sup>3</sup> di ba mu piese Yesu a bul, “Bula pila, ŋ ne nii-la Joon fa si si u jaŋ ko, koo la haa gberɛ nuu ma don nee?” Nii ne ba mu piesu.

<sup>4</sup> Ba si piese deere, Yesu bula piba a bul, “Má miira mu Joon teen a bula pu wialin kala ma si na a nii maa.

<sup>5</sup> Má bula pu di nyulimaa siaa suri ne, gberikɛɛ viven, gbegisin ma duduori. Tanŋaa ninii wiaa, nialin si suba sisii suun le. Summoo ma wuo ninii Wia wu-zonɔɔ.

<sup>6</sup> Nialin si bi kaa lere ari mi ne ŋaa nii-la Wia si tima, ba tuon jaŋ tɔre.”

<sup>7</sup> Nii ne Joon haritooro-la viiri. Nii ne Yesu suomo bul Joon wiaa a pipi ni-dan-la. U pieseba, “Ma si mu Joon teen tin-tee-hilii-la le, bee ne ma fa gberɛ di ma na? Ma mu di ma na yaŋ pelin si kaa viviisi nee? Ai.

<sup>8</sup> Bee ne saa ma lii di ma na? Ma lia di ma na nuu si laale geri-zonɔɔ nee? Ai. Bee na nialin

si yie laale gennin deenba, ba yie juu kuori-diisin ne aa nii sima.

<sup>9</sup> Má saa dagemi ku-la ma si mua di ma na. Ma mua di ma na nii-la síi bul wiaa, Wia Diŋ-zoŋ-la dolun ɛ neɛ? Oo, mi jaŋ bula pima ari ma na nuu duu kii nii-la síi bul wiaa, Wia Diŋ-zoŋ-la dolun ɛ ne.

<sup>10</sup> U-na Joŋ wiaa ne ba ŋmuŋsa bil Wia tenin tuŋ a bul di Wia si, 'Má jegile nii mi teen, mi jaŋ tin mi tinɗaara duu laa ŋ sipaan a mu a wase wonbiin bilin ɛ.'

<sup>11</sup> Nii ne Yesu bira bula pi niaa a bul, "Wutitii, mi bulaa pima, Joŋ, Wia lii-foori-la ne kii nuu-kala ba si lula. Ama nii-la si ŋaa ni-bie Wia kuorii-la tuŋ, u ne yuga kii Joŋ.

<sup>12</sup> A chin bua-la ɛ Joŋ si suomo bubul Wia wiaa a kaa kuko tapulun deen, niaa keŋ Wia kuorii-la wiaa yuyuo doŋo ne, nii ne ni-duorun wiwalime di ba kaa loriko laa.

<sup>13</sup> Ka di Joŋ-na ko, nialin fa síi bul wiaa, Wia Diŋ-zoŋ-la dolun ɛ fa bul Wia kuorii-la wiaa ne. Wialin Wia si leŋe ba ŋmuŋsa bil di niaa tuto ma dage nii ne.

<sup>14</sup> Di ma ne ŋaa yarida, ma sei wialin ba si bula. Joŋ ne ŋaa Ilaaja, nii-la wiaa ba fa si bula duu jaŋ ko.

<sup>15</sup> Digilaa tinŋaa, má wuoli ma digilaa a nii wiaa deenba."

<sup>16</sup> Nii ne Yesu bira bul, "Beɛ ne mi jaŋ keŋ jinin niaa kaa magise? Ba nage hanbiisin síi gbieli yobo tuŋ ne. Doŋsun yie kpia doŋo ɛ a bula piba a bul,



24 Mi bulaa pima, sariya che-diiliŋ Wia jaŋ fá Sodom niaa nennige a kii Kapenam niaa.”

*Yesu bula pi niaa di ba kɔ u teenj a na wiese  
Luuk 10.21-22*

25 Bua-la titia le Yesu guu yire, “Mi Nyimma, ŋ ne ŋaa wia nyuŋ ari tinteenj kala Tiina. Mii lolluŋ ari ŋ si keŋ wialin ŋ si joŋo faa a dage nialin si bi wiaa jin, aŋ bi joŋo dage nialin si keŋ wu-jiminj.

26 Mi Nyimma, mii lolluŋ. N titia tuotoruŋ le ne ŋ ŋaa nii.”

27 Nii ne u bira bul, “Mi Nyimma joŋ kuŋ-kala doluŋ ne pimi. Mi Nyimma dunđuŋa ne jin nii mi si naga. Mi ma dunđuŋa ne jin nii mi Nyimma ma si naga. Nu-u-kala bira buu jin, see nialin dunđuŋa mi sii cho di mi daga.”

28 Nii ne Yesu bira bula pi niaa, “Má kɔ mi teenj, ma nialin kala si lolɔ, aŋ ka wiaa nyagema bil. Mi jaŋ pima wiese.

29 Má laa mi chuga a chuŋ aŋ gunne mi teenj, beɛ wiaa mi keŋ mi titia muuri ne, mi siaa ma fiele. Di ma ŋaa nii, ma jaŋ na wiese.

30 Chuga-la mi si jaŋ joŋo chuŋma jaŋ ŋaa chugi-moli, u bi yuŋ.”

## 12

*Ba piɛɛ Yesu che-wiesii-la wiaa.*

*Maak 2.23-28; Luuk 6.1-5*

1 U bi diene aŋ ka Yesu ari u haritooroo sii to nyonso бага tuonj che-wiesii-la cheɛŋ. Losuŋ fa keŋ Yesu haritooroo. Nii ne ba suomo kiile nyonso-la aa chaŋ.

<sup>2</sup> Farisii tinɲaa si na wiin deen ɲii, ba piese Yesu a bul, “N bi naa? Che-wiesii-la kisin ne ba chichei ɲii.”

<sup>3</sup> Nii ne Yesu pieseba a bul, “Ma bi wii-la Devit fa si ɲaa karimaa? Losun fa si kenu ba di u harin niaa,

<sup>4</sup> u mu juu Wia-dia a jon boroboro-la ba fa si kaa ku bil Wia sipaan a chogo dii, an jono pi u harin niaa maa, ba ma dii. U fa ɲaa kisin ne di ni-wogo dii boroboro-la, see nialin si kpu pusun pipi Wia dunɲa. Nii-na u fa bi maga di Devit ari u harin niaa dii kudiile-la.

<sup>5</sup> Koo ma ha bi wialin Moosis fa si ɲmunsa bil di la tuto karimaa? Che-wiesii-la cheen kala nialin si kpu pusun pipi Wia kuhiasin fa yie chei la kisin Wia-dia le. Ama ba fa si ɲaa ɲii che-wiesii-la cheen, u bi haache ɲaa.

<sup>6</sup> Mi bulaa pima ari kun ne he ma tuon leele a yuga kii Wia-dia.

<sup>7</sup> Wia tenin tuon, ba ɲmunsa di Wia si,  
‘Mi cho di ma fifa niaa nennige ne a kii ma si  
kpu pusun pipimi.’

Di ma ne fa senen jin wiin deen bubuon, ma fa bi jan jon cheerin pi nialin si bi wii cheye.

<sup>8</sup> be wiaa mi-na Nuhuobiine Bie ne ɲaa che-wiesii-la Tiina ɲii.”

*Yesu vaare baal kubala nisij si suba*

*Maak 3.1-6; Luuk 6.6-11*

<sup>9</sup> Nii ne Yesu lii lee-la a mu juu Wii-chuole dia,

<sup>10</sup> di baal kubala ne ɲii. U nisij suba ne. Niaa donsun ma fa he dime a chiche di ba bul Yesu teen ari u cheye ne. Nii ne ba piesu a bul, “U

kenj wonʒbiinj neε di la vaare nyanyal tinɲaa che-wiesii-la cheεnj koo?”

<sup>11</sup> Nii ne Yesu piesεba a bul, “Di ma kuɲ ne kenj piesu duu tel viliɲ le che-wiesii-la cheεnj, ɲ jaɲ liisu koo ɲ jaɲ leɲu dime duu suu? Ma jaɲ liise.

<sup>12</sup> Nuhuobiine ne paala kii piese. Di la ne saa ɲaa wu-zoɲɲoo che-wiesii-la cheεnj, la bi che-wiesii-la kisiɲ-la cheye.”

<sup>13</sup> Nii ne u bula pi na-suu-la tiina a bul, “Kenj ɲ nisiɲ tiεne.” U kaa tiεne. U fiela a nage u nisi-la doɲo.

<sup>14</sup> Nii ne Farisii tinɲaa lii lee-la a mu vuure ɲii ba si jaɲ ɲaa a kpu Yesu.

*Yesu bul wiaa a tige u titia le*

<sup>15</sup> Yesu si nia di ba vuure di ba kpuu ɲii, u lii lee-la. Ni-danj to u hariɲ. Nii ne u vaare nialiɲ fa sii wiilu kala

<sup>16</sup> aɲ bula piba di ba si leɲ di wiinj deenj teeli lerinj kala.

<sup>17</sup> U ɲaa wiinj deenj di wialiɲ Azaaya fa si bula ku ɲaa wutitii. Azaaya fa ɲaa nii-la sii bul wiaa, Wia Diɲ-zoɲ-la doluɲ le ne.

<sup>18</sup> U fa si,  
 “Mi Tinɲinna ne ɲla, nii-la mi si liisa,  
 nii-la mi si cho, mi tuoɲ tore u nyuɲ.  
 Mi jaɲ joɲ mi Diɲ-zoɲ-la heu le.

U jaɲ bul mi sariya diiniɲ wiaa a pi dunia niaa kala.

<sup>19</sup> U bi jaɲ kaa lere, u bi jaɲ kpia goɲ maa.

U bi jaɲ ɲiɲaa goɲ wonʒbiee le di niaa ninii.

<sup>20</sup> U siaa jaɲ fiεle nialiɲ si ɲaa puwuoloo teenj, a kenj zile ni-pugunuɲ ma teenj.

U jan pɛsɛ halii, see wutitii-la Wia sɪi chɛ yuo  
dii lerinɔ kala.

<sup>21</sup> U lɛ nɛ dunia niaa kala jan jon ba yiɛlaa hɛ.”

*Yesu ari Belizibul*

*Maak 3.20-30; Luuk 11.14-23*

<sup>22</sup> Nii nɛ niaa dɔnsun kɛn baal kubala kaa kɔ  
Yesu teenɔ. Jinsin nɛ fa kɛn baal-la. U fa nyulima  
an pɛ tanɔ. Yesu vaare baal-la. Nii nɛ u wuo  
wɪaa bubul an nina maa.

<sup>23</sup> Yesu si nɛaa nii, u fa nɛaa ni-dan-la kala  
wu-kpunɔkpere. Nii nɛ ba pipiɛsɛ dɔnɔ a bul,  
“Devit bie nɛ nɛlaa?”

<sup>24</sup> Farisii tinnaa fa si nii nii, ba bul, di jinsin  
kuoro Belizibul nɛ pu dolun, nii nɛ tii u wuo  
kikiri jinsin nii.

<sup>25</sup> Yesu wuo jin ba tuɔbiinaa a bula piba a bul,  
“Di tan niaa nɛ hɛ dime a bi nii-bala kɛnɛ, ba  
tan-la jan tel. Di jan niaa koo naanɔbiirinɔ ma nɛ  
bi nii-bala kɛnɛ, ba dia jan tel.

<sup>26</sup> Nii nɛ di Sitaani kiri Sitaani, u ma tan bi  
jan wuo chinɔ.”

<sup>27</sup> Nii nɛ Yesu bira piɛsɛba a bul, “Di Belizibul  
nɛ pimi dolun mi kaa kiri jin-bɔnɔnɔɔ niaa lɛ,  
kubɛɛ nɛ saa jon dolun pi niaa deenɔba sɪi to ma  
harinɔ ba ma kikiri jin-bɔnɔnɔɔ niaa lɛ? Niaa  
deenɔba titia daga ari maa nyia nɛ. Ba jima ari  
Sitaani bi u titia wuo guraa yuo.

<sup>28</sup> Wia dolun nɛ mi kaa kiri jin-bɔnɔnɔɔ niaa  
lɛ. Wiinɔ deenɔ nɛ daga ari Wia kuorii-la paala kɔ  
ma teenɔ nɛ.

<sup>29</sup> Nuu tuo si jan juu ni-duonɔ dia a gaa u kiaa,  
see duu kɛn ni-duo-la vɔɔ, an-na juu paa u kiaa.

<sup>30</sup> Nuu-kala si bi mi nuu ηaa, u lii mi harin ne. Nii-la kala si bi mi le pe di la kiri kiasa hihe dɔŋɔ le, u kaa pisa tita ne.

<sup>31</sup> Mi bulaa pima ari Wia jan jon niaa haacheba ari wu-bɔmɔ-la ba sii bul a cheba, ama nii-la kala si tuuse Wia Din-zɔŋ-la jonηoo, Wia bi jan jonɔ che u tiina.

<sup>32</sup> Nii-la kala si bul wu-bɔŋηoo a mu tige mi-na Nuhuobiine Bie le, Wia jan jonɔ cheu, ama nii-la kala si tuuse Wia Din-zɔŋ-la jonηoo, Wia bi jan jonɔ che u tiina leele a kaa mu wuu.”

*Tia ari u nenene.*

*Luuk 6.43-45*

<sup>33</sup> Nii ne Yesu bira bul, “Di η nii che tia nen nen-zɔŋηoo, see di η ken tia-la si ken yarifielaa. Di η ne ken tia-la si bi yarifielaa kene, see duu ninen nen-lɔrunun. Tia-la nenene ne yie dage tia-la yiri u si ηaa.

<sup>34</sup> Ma ni-bɔŋηoo deenba, di ma ne bɔmɔ, ee ne ma jan wuo ηaa a bubul wu-zɔŋηoo? N tuobiinaa si ken wii-la ne, u ne η niin bubul.

<sup>35</sup> Ni-zomun ken tuobiin-zɔŋηoo ne aa ηaa wu-zɔmɔ-la u sii biinu. Ni-bomun ma ken tuobiin-bɔŋηoo a maa ηaa wu-bɔmɔ-la u sii biinu u tuɔŋ le.

<sup>36</sup> Mi bulaa pima ari sariya che-diilin nuu-kala paala jan dage wu-bɔmɔ-la u niin si bula.

<sup>37</sup> Wialin titia ma si bula ne jan dii ma sariya a dage di ma ken tuɔ-pulaa koo ma bi tuɔ-pulaa kene.”

*Nialin che di Yesu ηaa wu-magilaa*

*Maak 8.11-12; Luuk 11.29-32*

38 Nii ne Wia teniŋ kerichiba doŋsun ari Farisii tinŋaa doŋsun ma ko Yesu teenŋ a bula pu a bul, “La kuhian, laa che di ŋ ŋaa wu-magil ne di la na.”

39 Nii ne Yesu bul, “Jiniŋ niaa ŋaa ni-bomo ne, ba bi Wia ka fá. Ma si di mi ŋaa wu-magiliŋ. Ai, mi bi ŋaa. Wu-magiliŋ ma sii che, ma bi jaŋ wuo nau, see wu-magil-la Wia fa si ŋaa a tige Jona le.

40 Jona fa si he chenfilii-bal-la tuoŋ tapulaa batori wiiheye ari titaŋiŋ kala, ŋii titia ne mi-na Nuhuobiine Bie ma jaŋ he vaaminŋ tuoŋ tapulaa batori, wiiheye ari titaŋiŋ kala.

41 Sariya che-diiliŋ, Ninive niaa ma jaŋ sii a joŋ cheeriŋ pima woruŋ. Bua-la le Jona ma fa si mu bul Wia wiaa pi Ninive niaa, ba birima lii ba haacheba le ne a to Wia. Mi jaŋ bula pima ari nuu ne he ma tuoŋ a yuga kii Jona, ka ma bi sei di ma jegile nii u wiaa.”

42 Nii ne Yesu bira bul, “Haal kubala ne fa he dime. U dii kuoruŋ tinŋtee kubala le baa yire Siiba. U sii lii u jaŋ le a mu di-bolii duu jegile nii kuoru kubala wu-jimiŋ. U yiriŋ ne fa Solomonoŋ. U fa keŋ wu-jimiŋ kiŋkeŋ kiŋkeŋ. Sariya che-diiliŋ haal-la jaŋ sii a joŋ cheeriŋ a pi jiniŋ niaa woruŋ. Mi jaŋ bula pima ari nuu ne he ma tuoŋ, u yuga kii Solomonoŋ, ka ma bi sei di ma jegile nii u wiaa.”

*Yesu bul wiaa a tige jin-bonhoo le  
Luuk 11.24-26*

<sup>43</sup> Nii ne Yesu bira bula pi niaa a bul, “Di jin-bon ne lii nuu le, u yie gollo tintee-hilin le ne a chiche di-wiesin, an bi na.

<sup>44</sup> U si bi lee na nii, u yie bul u titia le a bul, ‘Mi jan miira mu lee-la mi si lia.’ U jan miira mumu, di disinnin tuo dia-la le, ba wase u kala zon.

<sup>45</sup> Nii ne u jan miira lii a ken jin-bonnon balipe, kialin si bomo kiiu, ba ma ku juu a peu le. Nii harin le ne baal-la yie kperi a kii bunbun-la. Nii titia ne u ma jan naa ma jinin ni-bonnon deenba le.”

*Yesu bul wiaa a tige u naan ari u naanbiirin le  
Maak 3.31-35; Luuk 8.19-21*

<sup>46</sup> Yesu fa si bul wiaa pipi nialin nii, u naan ari u naanaa ko u teen a ku chin jeen harin a chiche di ba nau. [

<sup>47</sup> Nii ne nuu bula pu a bul, “Bee na, n naan ari n naanaa ne chin jeen harin a chiche di ba nan.”

<sup>48</sup> Nii ne Yesu miira pieseba a bul, “Kubee ne naa mi naan ari mi naanaa?”]

<sup>49</sup> Nii ne u liise u nisin a dage u haritooro an bul, “Mi naan ari mi naanbiirin ne nla:

<sup>50</sup> Nii-la kala si naa wii-la mi Nyimma Wia si he Wia-jan le si cho, u ne naa mi naana ari mi dihaala ari mi naan.”

## 13

*Yesu mage namaga a tige baal-la si duu kias le  
Maak 4.1-9; Luuk 8.4-8*

<sup>1</sup> Tapulii-la titia Yesu lii dia-la ɛ ba di u haritooroo fa si hõõ, a sii mu mugi-baliñ niin a hõñ dime duu dage niaa.

<sup>2-3</sup> Niaa yuge a ku gollu chu. Ba si yuga nii, u sii mu juu liin daboro tuõñ a hõñ liin tuõñ, ka ni-dañ-la chin muga niin. Nii ne u mage namagaba a dageba wiaa yuge. U namagaba-la dõñõ ne ñla: Yesu si, “Baal kubala ne sie a keñ u ku-doho kaa lii duu mise.

<sup>4</sup> U sii mise nii, ku-doho-la dõñsun tel wonbiin tuõñ. Diibiisin ku tuõsa dii.

<sup>5</sup> Dõñsun ma tuu tel kpaginyilin nyun. Hagila si bi yuge nii, ka ba guu nyu.

<sup>6</sup> Ba naapoloo bi tinteen jua. Wia põse a kpuba, ba suu, bæe wiaa ba naapoloo bi tinteen jua.

<sup>7</sup> Ku-doho-la dõñsun ma tel sõsun tuõñ. Ba nyu, sõsu-la ma nyu a nyaga kpu. Ba bi wasa.

<sup>8</sup> Ama ku-doho-la dõñsun ma lii tel tintee-zõmun ɛ a nyu a waa a wase worun. Dõñsun he biee zõlõ zõlõ, dõñsun ma mahin batori batori, dõñsun ma mara ari fii fii.”

<sup>9</sup> Yesu si mage namaga-la dexe, nii ne u bul, “Digilaa tinnaa, má wuoli ma digilaa a nii wiaa deenba.”

*Yesu dage u haritooroo wii-la si tii u yie mimage namagaba*

*Maak 4.10-12; Luuk 8.9-10*

<sup>10</sup> Nii ne Yesu haritooroo kõ u teen a piestu a bul, “Bæe ne tii ñ yie keñ namagaba a didage niaa?”

11 Nii ne Yesu bula piba a bul, “Ma niaa deenba ne Wia dage u kuorii-la wiaa bubuon pa, wialin fa si faa, ama ni-dan kala dee.

12 Nii-la kala si to Wia niin wiaa, Wia jan faasa peu le worun. Nii-la ma si bi Wia niin wiaa ka to, Wia bi jan peu le. U si peu le mua-la maa, u jan laa u kua.

13 Wii-la si tii mi yie mimage namagaba ne nla: Ba yie nyilimi nyilimi ne an bi kun-kala wuo na, a jijegili wiaa an bi wii-kala ka nii an bi wialin bubuon ma wuo jin.

14 Wia si to Azaaya le a bul wialin, ba wiaa ne u bul nii. Ba ku nja wutitii. Azaaya fa nja nii-la sii bul wiaa, Wia Din-zon-la dolun le ne. U fa bula a bul,

‘Niaa deenba jan jegili jegili wiaa an bi wii-kala bubuon wuo jin,

ba jan nyilimi nyilimi an bi kun-kala wuo na,

15 be wiaa ba bi wu-jimin ke ne Wia teen, ba via Wia niin wiaa ne,

ba to ba digilaa ma ne di ba si wii-kala nii a ken ba siao ma to di ba si kun-kala na.

Wia si di nii dee, ba fa jan nina,

ba digilaa ma fa ninii wiaa.

Ba fa jan jin wiaa bubuon

a birima ko mi teen di mi vaareba.’

16 Ma-na, ma tuon toro ari ma wuo nina wialin kala ma sii na a wuo nii wialin maa.

17 Mi bulaa pima ari nialin fa sii bul wiaa, Wia Din-zon-la dolun le, ari nialin donsun fa sii to Wia, ba yuga a cho di ba nina wialin ma sii na

an̄ bi wuo na, a ma fa cho di baa nii wialin̄ ma siī nii, an̄ ka ba bi wuo nii.

*Yesu dage ku-duuro namaga-la bubuon̄*

*Maak 4.13-20; Luuk 8.11-15*

<sup>18</sup> Má jegili a nii ku-duuro namaga-la bubuon̄.

<sup>19</sup> Nialin̄ si yie nii Wia niin̄ wialin̄ a mu tige Wia kuorii-la le an̄ bi ba bubuon̄ jin̄, ba nage ku-doho-la si tel won̄biin̄ le ne. Sitaani yie guu ko a ken̄ wialin̄ a liiri ba tuosaa le.

<sup>20</sup> Kialin̄ ma si tel kpaginyilin̄ nyun̄ ma ne n̄aa nialin̄ si yie guu a laa Wia niin̄ wialin̄ dii ari tuotorun̄.

<sup>21</sup> Ama ba bi boye kene a nage naapoloo si bi tin̄teen̄ jua. Ba jan̄ sei wii-la a tou mu mage nii. Di heen̄ ne juuba, koo di ba to naasin̄ dudogiseba a tin̄ wii-la wiaa, ba tuon̄ guu lii wii-la le. Ba jon̄ ta.

<sup>22</sup> Kialin̄ si tel sosun̄ tuon̄ ma ne n̄aa nialin̄ si yie nii Wia niin̄ wialin̄, ama dunia kiaa wiaa walimeba, ba cho di ba jigi aa che kun̄-kala. A tin̄ wiaa deen̄ba, ba bi sei di ba to wialin̄. Wialin̄ bi doho kene ba teen̄.

<sup>23</sup> Kialin̄ si tel tin̄tee-zomun̄ le ma ne n̄aa nialin̄ si yie nii Wia niin̄ wialin̄ a jin̄ ba bubuon̄, wialin̄ ken̄ doho kin̄ken̄ kin̄ken̄ ba teen̄, don̄sun̄ nen̄ zolo zolo, don̄sun̄ mahin̄ batori batori, don̄sun̄ ma mara ari fii fii.”

*Yesu mage namaga a tige бага si ken̄ yan̄ le.*

<sup>24</sup> Nii ne Yesu bira mage namaga don̄o a piba a bul, “Wia kuorii-la nage baala si sie ne a duu miirin̄ u бага le.

<sup>25</sup> Titan kubala niaa kala si piŋ don, u diŋdɔmɔ keŋ yaŋ kaa mu dɔu he бага-la le an viiri.

<sup>26</sup> Miiri-la si suomo nyu a ninen, yaŋ-la ma nyu.

<sup>27</sup> Nii ne baal-la tintinnaa mu a na бага-la a miira ku bula pi baal-la a bul, 'La kuhian, η dɔu ku-zɔŋŋɔɔ ne η бага-la le, ka nii ne yaŋ-la ma nyu бага-la le?'

<sup>28</sup> Nii ne ba kuhian-la bula piba a bul, 'U naga ari mi diŋdon ne ŋaa nii.' Nii ne u tintinna-la piesu a bul, 'Ŋŋ che di la mu a churi yaŋ-la ta nee?'

<sup>29</sup> Nii ne baal-la bul, 'Ai, má len di miiri-la bii. Di ma ne mua di ma churi yaŋ-la leele, ma jaŋ pe churi miiri-la dɔŋsuŋ ma ta.

<sup>30</sup> Di miiri-la ne bia, mi jaŋ len di nialin sii mu бага di ba laa sipaan churi yaŋ-la a vɔɔ a nyige, an-na kuŋ miiri-la kaa ku he mi vire le.' "

*Yesu mage namaga a mu tige ku-doho kubala baa yire masitad le*

*Maak 4.30-32; Luuk 13.18-19*

<sup>31</sup> Nii ne Yesu bira mage namaga dɔŋɔ a bul di Wia kuorii-la nage baal kubala ne si jon ku-doho kubala baa yire masitad a dɔu u бага le.

<sup>32</sup> Ku-doho-la bi wii maga. U ne muuro kii ku-doho-na kala si he dime. Ama duu ne nyua, u yie waa a birime tia ne a yuga kii бага ku-duuloo kala kala. Nii ne diibiisin yie sageu le a sua ba dellin u naakelee le.

*Yesu mage namaga a mu tige si-burun ɛ  
Luuk 13.20-21*

<sup>33</sup> Yesu bira mage namaga donɔ a piba a bul,  
“Wia kuorii-la nage si-burun nɛ ba si kaa hiɛ  
munun ɛ. Haala jon munun a hɛ tasi-gbanja  
tuon a jon si-burun a kaa kuosi. U dieni mua, ka  
mun-la sii puora su tasi-gbanja-la kala.”

*Yesu dage niaa namagaba  
Maak 4.33-34*

<sup>34</sup> Di Yesu nɛ fa bul wii-kala pipi ni-dan-la,  
namaga nɛ u yie mage. U bi jan bul wii di u bi  
namaga maga.

<sup>35</sup> U nɛa nɛi di wialin nuu fa si bula, Wia  
Din-zon-la dolun ɛ, ku nɛa wutitii nɛ. U fa si,  
“Di mi nɛ bul wiaa pipi niaa, mi jan mage  
namagaba, mi jan bul wialin si nɛa wu-faalaa a  
chin dunia di-suomun a piba.”

*Yesu dage namaga-la u si maga a tige yan ɛ  
bubun*

<sup>36</sup> Yesu si ta ni-dan-la, ba viiri, ka u sii juu dia.  
Nii nɛ u haritooroo ko u teen a piesu a bul,  
“Dagela namaga-la n si maga a tige baga yan ɛ  
bubun.”

<sup>37</sup> Nii nɛ Yesu bul, “Nii-la si duu miiri-la nɛ  
nɛa mi-na Nuhuobiine Bie.

<sup>38</sup> Baga-la ɛ u si duu miiri-la, u nɛ nɛa dunia.  
Miiri-la ma nɛ nɛa nialin si jan juu Wia  
kuorii-la tuon. Yan-la ma si nyu baga-la ɛ nɛ  
nɛa Sitaani niaa.

<sup>39</sup> Din-don-la si duu yan-la nɛ nɛa Sitaani.  
Miiri-la ma kumun nɛ nɛa dunia diderin. Nialin  
ma si kun miiri-la nɛ nɛa Wia tin-daaraa.

40 Nii ba si hiesi yan-la a nyige, nii titia ne jan naa dunia diderin.

41 Mi-na Nuhuobiine Bie, mi jan tin mi tin daaraa di ba juu Wia kuorii-la tuon a tuose nialin si naa haache tinnaa, ari nialin kala si naa wu-bonho.

42 a jono yuo a he Wia nyinin tuon. Lee-la ne ba jan yel an pe didin ba nyilaa.

43 Ka di tuopul tinnaa tutul ari wii-posun sii tul nii la Nyimma Wia kuorii-la tuon. Digilaa tinnaa, ma wuoli ma digilaa a nii wiaa deenba.”

### *Baal-la si pere бага a mol kias*

44 Yesu bira bul, “Wia kuorii-la nage na ne: Baal kubala ne mu a pipere бага a na di selime he бага-la le. U si na selime-la, u gbaa to, u tuon kala faasa tere kinke. Nii ne u mu yalle u kias kala a ke moribie-la a kaa mu yoo бага-la.”

### *Yesu bira mage namaga a mu tige busiin le*

45 Yesu bira si di Wia kuorii-la nage bayala si mua di u yoo busiaa ne.

46 U si na dono duu faasa zon kinke, u miira mu jon u kias kala u si kene a yalle a yoo busii-la.

### *Yesu mage namaga a tige jon le*

47 Yesu bira si di Wia kuorii-la nage jon ne, ba si jono yuo he mugi-balin tuon. U kese chenfile-yiriba kala.

48 Di chenfilee ne suo, chenfile-kpuura-la yie kaa lere lii mugi-balin niin ne a tuose chenfile-la. Ba yie tuose ku-zonho he ba kias le an jon kialin si bi zon a yuo ta.

<sup>49</sup> Nla ne saa u jaŋ nage dunia diderij. Wia tinɗaaraa jaŋ lii a tuɔse ni-bɔŋŋɔɔ ni-zɔŋŋɔɔ tuɔŋ

<sup>50</sup> a jonɓa yuo he Wia nyininj le. Dime ne ba jaŋ yel aŋ didinj ba nyilaa.

*Yesu mage namaga a tige baal-la si keŋ kiasa u vire le*

<sup>51</sup> Nii ne Yesu piɛse u haritooro a bul, “Ma jinj wiaa deenɓa kala bubuɔŋ neɛ?” Nii ne ba si, “Oo.”

<sup>52</sup> Nii ne Yesu bula piba a bul, “Wiinj deenɓa daga ari nii-la kala si gunne Wia teninj woruŋ a ku ŋaa Yesu haritooru a ŋaa siri duu juu Wia kuorii-la tuɔŋ, u tiina nage dia tiina si yie chaare mii-binaa ari mii-falaa ne u vire le.”

*Ba via Yesu Nazaret le*  
*Maak 6.1-6; Luuk 4.16-30*

<sup>53</sup> Yesu si mage namaga deenɓa deɛɛ, u sii Kapenam le

<sup>54</sup> a miira mu Nazaret. Nii ne u mu dage niaa Wii-chuɔle dia le. Nialinj kala si nii wialinj u si bula, ba hiriki. Nii ne ba pipiɛse dɔŋɔ, “Nii ne baala deenɓa na wu-jiminj deenɓa ari wu-duoruŋ deenɓa kala ŋaaninj?”

<sup>55</sup> Josef, kapinɗa-la bie dee nii? Mɛɛri dee bi u naaŋ ŋaa? Jeems ari Josef ari Saamɔŋ ari Judas u naaŋbiirinj dee nii?

<sup>56</sup> Ba di u dihaalaa kala dee daha nii? Nii le ne saa u na wiaa deenɓa kala?”

<sup>57</sup> Nii ne ba na baaninj u nyuŋ. Nii ne Yesu bula piba a bul, “Nii-la sii bul wiaa, Wia Diŋ-zɔŋ-la doluŋ le, duu ne mu lee-kala, ba yie zizilu ne, aŋ ka u jaŋ-niaa siinj buu ka su.”

58 A tinj ba si bi yarida kene wiaa, u bi wu-duorun wuo nja yuge lee-la.

## 14

*Jɔɔŋ Wia lii-foori-la suba*

*Maak 6.14-29; Luuk 9.7-9*

<sup>1</sup> Bua-la le ne Galilii kuoro Herod nii Yesu wiaa.

<sup>2</sup> U bula pi u nanzɔɔba ari Jɔɔŋ Wia lii-foori-la ne nii. Wia ne chisu suun le, nii ne tii u ken dolun a wuo njjaa wu-magilaa deenba.

<sup>3</sup> Herod-la fa sie a mu jaa haal kubala. U yirin ne Herodias. U fa nja u njana Filip haala ne. U laa jaa.

<sup>4</sup> Nii ne Jɔɔŋ bula pi Herod a bul, “N si ken n njana haala laa jaa nii, u bi wonbiin nja.”

<sup>5</sup> Nii ne Herod faa che duu kpu Jɔɔŋ, ama u faa fá Juu tinjaa ne. Nii wiaa u nja ba kenu to dia. Juu tinjaa fa si di Jɔɔŋ nja nii-la síi bul wiaa, Wia Din-zɔŋ-la dolun le ne.

<sup>6</sup> Nii ne Herod che-lulun tapulun bira yi. U yire u niaa di ba ku gbieli. Herodias tolo ma ko a gua ba kala sipaan, Herod ben a chou.

<sup>7</sup> Nii ne u bula pi tolo-la a bul, “Mi njmiesa, mi jan pin kun-kala n síi che.”

<sup>8</sup> Nii ne tolo-la mu bul wiin deen a pi u naan an piesu, “Mi bul di mii che bæe kun ne?” Nii ne u naan bula pu duu bul duu che duu keru Jɔɔŋ Wia lii-foori-la nyun a he pirata le ne a pu. Tolo-la bul nii.

<sup>9</sup> Kuoro si nii wii-la, u tuon kala chei. Ama u si njmiesa nii, niaa kala nii. Nii ne u bul di ba nja nii tolo-la síi che.

10 U ηaa ba mu keru Jooη nyuη sarika le,

11 a he pirata le a kaa ku pi tolo-la. Nii ne u laa a kaa mu pi u naan.

12 Jooη haritooro-la si nii wii-la, ba sii ku laa u ku-suun a kaa mu hugi. Nii ne ba mu bula pi Yesu wialin si ηaa.

*Yesu pi niaa bui banon kudiilee*

*Maak 6.30-44; Luuk 9.10-17; Jooη 6.1-14*

13 Yesu si nii Jooη wiaa, u sii lee-la u fa si he a juu liin daboro a mumu niaa si tuo lee-la, u dunɗunɗa. Ama niaa nii Yesu wiaa a lii ba jan le a ven naasin le a kiri u hariη.

14 Yesu si mu lii liin daboro-la le, u na ni-dan di ba hono gberu. Nennige kala kenu. Nii ne u vaare nialin sii wiilu.

15 Didaanin ku yi, u haritooro ko u teen a bula pu a bul, "Tan bire ne. Lerin deen ηaa girin ne. Ta nialin di ba mu tasi-la si kpage daha a yoo kudiilee a dii."

16 Nii ne Yesu bul, "Ma si leηe di ba viiri. Má-na mu che kudiilee piba di ba dii."

17 Nii ne u haritooro-la bul, "Ku-la kala la si ke ne ne boroboroba banon ari cheηfilee balia."

18 Nii ne Yesu bul, "Má kaa ko pimi."

19 U ηaa nialin tuu hon yan nyuη. Nii ne u laa boroboroba banon-la ari cheηfilee-la balia a wula beη wia nyuη an lolle Wia an kaa choge choge a pi u haritooro. U haritooro laa kpa nialin.

20 Nu-kala dii a voge. Ka u haritooro-la paa ku-kaan-biisin a su sinjin fi ari balia.

21 Nialinj fa si dii boroboro-la, ba tuonj baalaa fa n̄aa bui banonj n̄e.

*Yesu venj liinj nyunj*

*Maak 6.45-52; Joonj 6.15-21*

22 Nii n̄e Yesu lenj u haritooroo laa sipaanj mu juu liinj daboro a duoro chol muga cholo, anj ka duu ta ni-dan-la di ba viiri.

23 U si ta ni-dan-la ba viiri, u mu jil peelinj nyunj duu chuol̄e Wia. Nii n̄e wia tuu juu, duu dun̄dun̄a n̄e ha h̄e peel-la nyunj.

24 Bua-la l̄e di liinj daboro-la yi liinj tutuobaaninj. Lii-pelinj kaa viviisi, ba fa chaase pel-la n̄e.

25 Siipuuraa, Yesu sii venj liinj nyunj a mumu u haritooro-la teenj.

26 Ba si nau duu venj liinj nyunj, fawullunj ken̄ba. Ba bul di ni-dima n̄e. Fawullunj si ken̄ba nii, ba n̄mun̄moo niinj.

27 Nii n̄e Yesu guu bula piba a bul, “Má nyire ma boȳe. Mi-na n̄e. Ma sí len̄e di fawullunj ken̄ma.”

28 Nii n̄e Piita bul, “Mi Tiina, di n̄ n̄e, bul di mi lii k̄o n̄ teenj lii-la nyunj.”

29 Nii n̄e Yesu bul duu k̄o. U si bul nii, Piita lii liinj daboro-la tuonj a venj liinj nyunj aa mu Yesu teenj.

30 Ama Piita si bee na lii-pel-la, fawullunj k̄enu. U suomo tutuu lii-la bubuonj. Nii n̄e u faasa n̄moo niinj a bul, “Mi Tiina, laami ta.”

31 Yesu guu liise u nisinj a yia a k̄enu anj bula pu, “N̄ yarida bi yuge. B̄ee n̄e tii n̄ bi mi wiaa laa dii?”

<sup>32</sup> Ba si mu juu liinj daboro-la dɛrɛ, pel-la kɛrɛ.

<sup>33</sup> Nialinj kala si hɛ liinj daboro-la tuɔŋ tuu kpirimi a chuɔlɛ Yesu aŋ bul, “Wutitii, ŋ nɛ ŋaa Wia Bie.”

*Yesu vaarɛ nyanyal tiina Genezaret lɛ*  
*Maak 6.53-56*

<sup>34</sup> Nii nɛ ba chol a ku yi taŋ kubala baa yirɛ Genezaret.

<sup>35</sup> Nii nɛ nialinj si hɛ lee-la yie jin Yesu. Nii nɛ ba mu paa ba nyanyal tinŋaa kala si hɛ tasi-la si gollɛ Genezaret a kaa kɔ Yesu teenj.

<sup>36</sup> Ba sulu duu leŋ di nialinj sɛi wiilu digi u gerinj niipiniŋ lɛ. Di ba nɛ dige, ba yie duori.

## 15

*Yesu bul wiaa a tige niaa naabalimaba wonɓiin lɛ*

*Maak 7.1-13*

<sup>1</sup> Nii nɛ Farisii tinŋaa dɔŋsunj ari Wia teninj kerichiba lii Jerusalem a kɔ Yesu teenj a piɛsu a bul,

<sup>2</sup> “Bɛɛ nɛ tii ŋ haritooroo chichei la naabalimaba kisinniŋ lɛ? Bɛɛ nɛ tii ba bi ba nisaa ka sɔŋ ŋii la naabalimaba si dagela aŋ didii kudiilee?”

<sup>3</sup> Nii nɛ Yesu ma piɛɛba a bul, “Bɛɛ nɛ tii ma yie via Wia wonɓiin aŋ tuto ma naabalimaba wonɓiin?”

<sup>4</sup> Wia bula di ma fifá ma nyimmaba ari ma naaŋba, a bira bul di nuu nɛ sii a bul wu-bɔŋ a tige u nyimma ari u naaŋ lɛ, di ba kpu tiina.

<sup>5</sup> Ama ma-na daga ari nuu ne keŋ kuŋ a mage duu joŋo pe u nyimma koo u naaŋ le, tiina mu a bula piba duu jaŋ joŋ ku-la pi Wia.

<sup>6</sup> U si ŋaa ŋii, u bira bi maga duu pe u nyimma ari u naaŋ le. A tiŋ ŋii wiaa, ma via Wia niinŋ wiaa aŋ to ma naabalimaba woŋbiinŋ ne.

<sup>7</sup> Ma ŋaa kaŋfugi timma ne. Azaaya kiaa sima ne, wialinŋ u si bula a tigema le. Azaaya fa ŋaa nii-la sii bul wiaa, Wia Diŋ-zoŋ-la doluŋ le ne.

<sup>8</sup> U fa si,  
'Wia si, niaa deenba keŋ niinŋ ne a pipimi zile, ka ba tuoŋ liimi.

<sup>9</sup> Ba yie chuolemi pei ne aa dage nuhuobiine weninŋ aŋ bul di Wia ne bula.  
Nuhuobiine weninŋ ne baa to aŋ via Wia niinŋ wiaa.' "

*Kialinŋ si yie ŋaa nuhuobiine keŋ disinninŋ  
Maak 7.14-23*

<sup>10</sup> Nii ne Yesu yire niaa ba ko. U bula piba a bul, "Má jegile nii woruŋ.

<sup>11</sup> U bi naga ku-la si yie to nuhuobiine niinŋ tuu ne yie ŋaa u keŋ disinninŋ, ama ku-la si yie to u niinŋ lii ne keŋ disinninŋ."

<sup>12</sup> Nii ne Yesu haritooro ko u teenŋ a bula pu a bul, "N jima ari ŋ chei Farisii timma-la tuoŋ ne ŋ si bul ŋii?"

<sup>13</sup> Nii ne u bula piba a bul, "Tia-la kala mi Nyimma si he Wia-jaŋ si yie bi choŋso, ba jaŋ kaa churo ta.

<sup>14</sup> Ma si leŋe di ba wiaa wiima, ba ŋaa nyulimaa ne a laa nyulimaa sipaanŋ. Di nyulima

ne saa keŋ u nyulunɔ dɔŋɔ daanɔ ɛ, ba kala balia janɔ tuu buɔtuonɔ.”

15 Nii ne Piita bul, “Dageɔa namaga-la bubuonɔ.”

16 Nii ne Yesu bul, “Ma ma ha bi wu-jimin keɛɛ?”

17 Ma bi wiinɔ deenɔ bubuonɔ jinɔ? Kuɔ-na kala si juu nuhuobiine niinɔ, u yie juu u luoronɔ ne a bira to u yaraa lii.

18 Ama wialinɔ si yie to ɔ niinɔ lii, ba yie lii ɔ tuonɔ ɛ ne. Wiaa deenba ne yie ɔaa niaa keɔ disinninɔ.

19 ɔ tuonɔ ɛ ne ɔ yie biine wu-bɔŋɔɔ ɔaaninɔ a mu kpu niaa, a mu che niaa haalaa, a ɔaa ba-chɔrunɔ ari ha-chɔrunɔ wu-ɔaalaa, aa gaa, aa nyia wiaa a tige niaa ɛ, a chichei niaa yirinɔ.

20 Wiaa deenba ne yie ɔaa niaa keɔ disinninɔ. Ama di nuu ne dii kiaa anɔ bi u nisinɔ sɔmɔ ari ma naabalimaba si dage ɔii, ɔii bi janɔ wuo ɔaa di tiina keɔ disinninɔ.”

### *Yesu vaare Keenanɔ tiina*

#### *Maak 7.24-30*

21 Nii ne Yesu sii lee-la a mu Taya ari Saadonɔ tinɔteenɔ.

22 Di haal kubala si he lee-la ko u teenɔ. U fa ɔaa Keenanɔ tiina ne. U si ko u teenɔ, ɔii ne u bul, “Mi Tiina Devit bii, fami nennige. Jinsinɔ ne keɔ mi tolo. U nina heɔɔ worunɔ.”

23 Ama Yesu bi wii-kala bula u teenɔ. ɔii ne u haritooro ko u teenɔ a bula pu duu lenɔ di haal-la viiri, di u to ba harinɔ a ɔinɔaa gonɔ ne.

24 Nii ne Yesu bula piba a bul, “Wia tinmi di mi ko che keŋe piese-la si lele ne Iziral tinŋaa dunɗun ne ŋii.”

25 Nii ne haal-la ku tel u naasiŋ le aŋ bul, “Mi Tiina, pemi le.”

26 Nii ne Yesu bula pu a bul, “Ŋ ne keŋ haŋbiisiŋ, ŋ bi jaŋ joŋ ba kudiilee a yuo pi vahin.”

27 Nii ne haal-la bul, “Mi Tiina, u ŋaa wutitii ne, ama vahi-la tinŋaa sii dii kialin, kialin si tel tinteen ne, ba ma jaŋ paa didii.”

28 Nii ne Yesu bula pu a bul, “Ŋ ŋaa haal-la si keŋ yarida kinkeŋ ne. Wii-la ŋ sii che, mi jaŋ ŋaa piŋ.” Bua-la titia le u tolo-la duori.

### *Yesu vaare niaa yuge*

29 Nii ne Yesu bira sii lee-la a to Galilii muga-la diirin mu. U jil peelin nyun a hoŋ dime.

30 Nii ne ni-daŋ ko u teen a keŋ gberikee ari nyulimaa ari taŋŋaa ari nyanyal tinŋaa doŋsun a kaa ko bil Yesu naasiŋ le. U vaareba.

31 Ni-daŋ-la si na taŋŋaa di ba bul wiaa ari gberikee sii ven, ari nyulimaa siaa di ba bira suro, u ŋaaba wu-kpunkpere. Nii ne ba didenne Iziral tinŋaa Wia.

### *Yesu pi niaa bui banɛɛ kudiilee*

#### *Maak 8.1-10*

32 Nii ne Yesu yire u haritooro a bula piba a bul, “Mi si beŋ niaa deenba, nennige keŋmi ne. Ba he mi teen tapulaa batori ne ŋla aŋ bi kudiilee na di ba dii. Mi bi sei di ba viiri di ba ne bi kuŋ-kala die. Di mi ŋaa ŋii, ba jaŋ mu yiegi wonbiin le.”

<sup>33</sup> Nii ne u haritooroo piɛsu, “Eɛ ne la jaŋ ɲaa a na kudiilee di ni-dan-la kala dii girin deen tuon?”

<sup>34</sup> U piɛɛba, “Boroboro banmɛɛ ne he dime?” Ba si, “Kiaa balipe ne ari cheŋfili-biisin ma mua.”

<sup>35</sup> Nii ne u ɲaa nialin tuu hon tinteɛn.

<sup>36</sup> Ka u jon boroboroba-la balipe ari cheŋfilie-la a lolle Wia an kaa choge choge a pi u haritooroo di ba laa kpaa ni-dan-la. Ba laa kpaaba.

<sup>37</sup> Nuu-kala dii a voge. Ka ba paa ku-kaan-biisin a su siŋsin balipe.

<sup>38</sup> Nialin fa si dii kialin, ba yi baalaa bui banɛɛ, ka haalaa ari hanbiisin ma he dime.

<sup>39</sup> Nii ne u ta ni-dan-la an mu juu liin daboro an mu Magadan tinteɛn.

## 16

### *Nialin che di Yesu ɲaa wu-magilin Maak 8.11-13; Luuk 12.54-56*

<sup>1</sup> Nii ne Farisii tinɲaa ari Sadusii tinɲaa donsun ko Yesu teen di ba magisu. Ba bula pu duu ɲaa wu-magilin di ba na a jin ari u dol-la lii Wia ne.

<sup>2</sup> Nii ne u bula piba a bul, “Di wia nii juu, ka ma na wii-mulun siin duu fiesa, ma yie bul di lerin jaŋ fiele.

<sup>3</sup> Chichuo-fiele maa, di lerin ne bire, ma yie bul ari duonun jaŋ nii. Ma yie wuo ben wia nyun a wuo jin wii-la si jaŋ ɲaa, ama ma bi wuo jin wialin sii ɲaa dunia deen le lele.

<sup>4</sup> Jiniŋ niaa ŋaa ni-bomɔ nɛ, ba bi Wia ka fá. Ma si di mi ŋaa wu-magiliŋ. Ai, mi bi ŋaa. Wu-magil-la ma síi chɛ, ma bi jaŋ wuo nau, see Wia fa si ŋaa a tige Jona ɛ.” Nii nɛ Yesu lenba aŋ viiri.

*Yesu bul wiaa a tige Farisii tiŋŋaa ari Sadiusii tiŋŋaa wu-bulaa ɛ*  
*Maak 8.14-21*

<sup>5</sup> Yesu haritooro-la si juu liiŋ daboro a duoro chol fuoŋ cholo ŋii, ba yua ba bi kudiilee koro mu.

<sup>6</sup> Nii nɛ Yesu bula piba di ba pɔ ba titia ɛ woruŋ ari Farisii tiŋŋaa ari Sadiusii tiŋŋaa, di ba nage si-buruŋ ba si joŋo hɛ boroboro ɛ duu puɔɛ.

<sup>7</sup> Nii nɛ ba suomo bula pipi dɔŋɔ, “La bi kudiilee koro kɔ, ŋii nɛ tii u bul wiin deen.”

<sup>8</sup> Nii nɛ Yesu jiŋ wii-la ba síi bul a bula piba, “Ma yarida bi yuge. Bɛɛ nɛ tii ma hɔnɔ vuure ari ma bi kudiilee kenɛ? Ma ha bi wu-jimin kenɛɛ?”

<sup>9</sup> Ma ha bi wiaa bubuɔŋ jiŋ? Ma bi biina yi bua-la ɛ mi si joŋ boroboroba banɔŋ kaa chɔge a pi niaa bui banɔŋ ba dii? Ba si die a vɔge, siŋsiŋ baŋmɛɛ nɛ ma paa ku-kaanaa sɔ?

<sup>10</sup> Aŋ ka boroboro balipe-la mi si kaa chɔge a pi niaa bui banɛɛ-laa? Ku-kaanaa siŋsiŋ baŋmɛɛ nɛ ma paa sɔ?

<sup>11</sup> Bɛɛ nɛ ma biine ari ma teen nɛ mii bul kudiilee wiaa? Má pɔ ma titia ɛ ari Farisii tiŋŋaa ari Sadiusii tiŋŋaa ɛ. Ba nage si-buruŋ nɛ.”

12 Nii ne u haritooroo jin ari u bi si di ba po ba titia le ari si-buru-la ba si kaa hihe boroboro le ne, ama u si ba po ba titia le Farisii tinjaa ari Sadiusii tinjaa wu-bulaa le ne.

*Piita dage nii-la Yesu si nja*

*Maak 8.27-30; Luuk 9.18-21*

13 Nii ne Yesu sii mu Sizariya, Filipa tinteen. Nii ne u piese u haritooro-la a bul, "Kubee ne niaa si di mi-na Nuhuobiine Bie nja?"

14 Nii ne ba bul, "Donsun si di n ne nja Joon, Wia lii-foori-la. Donsun ma si n ne nja Ilaaja. Donsun ma si n nja Jerimaya, koo nii-la sii bul wiaa, Wia Din-zon-la dolun le donjo ne."

15 Nii ne Yesu bira piese u haritooro-la maa, "Ka ma maa, ma si mi nja kubee ne?"

16 Nii ne Saamon Piita bul, "N ne nja Kirisito, Wia-la si weye Bie."

17 Nii ne Yesu bul, "Saamon, Joon bie, Wia jan pen le, wu-jimin deen u bi naga nuhuobiine ne pin. Mi Nyimma si he Wia-jan ne pin.

18 Nii wiaa Piita, mi bulaa pin ari n nage bun ne. Bun-la nyun ne mi jan saa nialin si laa mi wiaa dii dia. Suun ma bi jan wuo yigi dia-la lo.

19 Mi jan jon Wia kuorii-la boribiee pin. Wii-la n si via dunia le, ba jan viau Wia-jan maa. Wii-la ma n si seye dunia le, ba ma jan seyu Wia-jan."

20 Nii ne Yesu bula pi u haritooro-la ari siifesiin di ba si bula pi nuu-kala ari u ne nja Kirisito, nii-la Wia si liisa.

*Yesu bul u heen nanin ari u suunun wiaa*

*Maak 8.31-9.1; Luuk 9.22-27*

21 A suomi bua-la le Yesu chaasa bula pi u haritooroo a bul, “U maga di mi mu Jerusalem a na heeŋ woruŋ Juu tinŋaa nihiasin ari nialin si kpu pusun pipi Wia kuhiasin ari Wia tenin kerichiba nisin le. Ba jan kpumi, ama mi jan sii suun le tapulaa batori cheeŋ.”

22 Nii ne Piita kenu kaa suusa lii a kpiau le a bul, “Wia bi jan sei, mi Tiina. Wii-la bi jan ko duu ŋaan le.”

23 Nii ne Yesu miira chaase Piita a bula pu a bul, “Sitaani, mu dime! Nŋ che ŋ nyisemi di mi juu haache le ne. Wialin ŋ sii bul, nuhuobiine wonbiin ne. Wia wonbiin dee.”

24 Nii ne u bula pi u haritooroo a bul, “Di nuu-kala nii che duu tomi, see duu via u titia wonbiin an jon u daa-geese baase tapulii-na kala a to mi harin.

25 Nii-la kala sii che duu laa u titia miisin, u jan jon u miisin ta, ama nii-la si via u miisin ta a tin mi wiaa, u jan sene laa u miisin.

26 Di ŋ ne dii dunia kala an bi miisin kene, bee kun nyuurii ne ŋ na? Dunia deen le, bee kun ne saa ŋ jan wuo kaa yoo ŋ miisin?

27 Mi-na Nuhuobiine Bie, mi jan ko a chaane ari mi Nyimma kuorun. La di Wia tinɗaaraa ne jan ko. Di la ne ko, Wia jan tin nuu-kala a mage ŋii u si tima.

28 Wutitii ne, mi bulaa pima ari niaa donsun he dime, ba bi jan suu see di ba na mi-na Nuhuobiine Bie di mi ko ari mi kuorii-la.”

*Yesu birima*  
*Maak 9.2-13; Luuk 9.28-36*

<sup>1</sup> Tapulaa balidu si ku bal, Yesu ken Piita ari Jeems ari u naanbie Joon, ba dunđuṅa a kaa mu peel-bal kubala nyuṅ.

<sup>2</sup> Ba beṅ ba sipaan a na Yesu duu birima. U siasa kala tutul a nage wii-posun sii tul nii. U gennin ma pulle a tutul.

<sup>3</sup> Nii ne Moosis ari Ilaaja ku lii ba sipaan. Ba china bubul wiaa Yesu teen.

<sup>4</sup> Nii ne Piita bula pi Yesu a bul, “La Tiina, u ṅaa wu-zon ne ari la si he daha. Di ṅ nii che la jan he lenṅee batori daha, di ṅ ken dono, di Moosis ma ken dono, di Ilaaja ma ken dono.”

<sup>5</sup> Piita ha fa sii bul wiaa nii di duonbilingbaanin ku toba, ka yiikoro kubala lii duonbilingbaani-la tuon a bubul, “Mi Bii-choolun ne ṅla. Mi tuon tore u nyuṅ. Má jegile nii u teen.”

<sup>6</sup> Yesu haritooro-la si nii nii-la yiikoro, fawullun kenba, ba tuu tel tinṅeen.

<sup>7</sup> Nii ne Yesu ko ba teen a digiba an bula piba di ba sii an si fawullun fá.

<sup>8</sup> Ba si sie, ba beṅ, ba bi nuu-kala na see Yesu dunđuṅa.

<sup>9</sup> Ba si lii peel-la nyuṅ ku tuu, Yesu bula piba a bul, “Mi bi che di ma bul wii-la ma si naa a pi nuu-kala, see tapulii-la mi-na Nuhuobiine Bie si sii suun le.”

<sup>10</sup> Nii ne Yesu haritooro-la piestu a bul, “Bee ne tii Wia tenin kerichiba bul di Ilaaja ne laa sipaan, an ka di Wia Bie-na ko?”

11 Nii ne Yesu bul, “Wutitii, Ilaaja jan sene laa sipaan ko a ken kun-kala wasa bil.

12 Ama mi bulaa pima ari Ilaaja paala ko ne, ama niaa bi wuo jimu. Ba naau nii kala ba sii che. Nii titia ne ba ma jan dogise mi-na Nuhuobiine Bie.”

13 Nii ne u haritooro-la jin ari Joon Wia lii-foori-la wiaa ne u bul nii.

*Yesu kiri jin-bon bie le*

*Maak 9.14-29; Luuk 9.37-43*

14 Nii ne Yesu ari u haritooro batori-la sii lii peel-la nyun a ku tuu ni-dan-la teen. Di baal kubala ko Yesu teen a kpirimi u sipaan

15 an bula pu a bul, “Mi Tiina, fa mi bie nennige, uu tel kpunkpusun ne. Nyanyalii-la kenu ne worun, u yie titel nyininj koo liinj le.

16 Mi kenu kaa ko n haritooro teen, ama ba bi wuo vaaru.”

17 Nii ne Yesu bul, “Ma lese niaa deenba, ma bi yarida kene, ma naa ni-bom ne. Ee ne mi jan nyalime a dieni ma teen?” Nii ne u bula pi baal-la duu ken u bile ko u teen.

18 Nii ne Yesu bul jin-bon-la le duu lii bile le. Nii ne u lii. Bile guu duori.

19 Nii ne Yesu haritooro-la ko u teen a luora piesu a bul, “Bee ne tii la-na bi jin-bon-la wuo kiri?”

20 Nii ne Yesu bula piba a bul, “Ma yarida bi yuge, nii ne tii. Wutitii, mi bulaa pima, di ma yarida ne fa mage kun biinj ba sii yire masitad, ma fa jan wuo bul peelinj le duu sii daha a mu seme donjo. U jan sii mu. Wii-kala tuo ma fa bi jan wuo naa. [

21 Ama Wia bi jaŋ pima doluŋ di ma wuo kikiri jiŋ-yiri deenba, see ma voo niin aŋ pe chuchuole Wia.]”

*Yesu bira bul u suuŋ wiaa*

*Maak 9.30-32; Luuk 9.43-45*

22 Nii ne Yesu ari u haritooroo kala ku hilimi Galilii le. Nii ne u bula piba di ba jaŋ keŋ u-na Nuhuobiine Bie a he niaa nisin le

23 di ba kpuu, ama u harin le u jaŋ sii suuŋ le tapulaa batori cheeŋ a keŋ miisin. Yesu si bul nii, u haritooroo tuon chei.

*Wia-dia time*

24 Yesu ari u haritooroo si ko Kapenam, nialin sii laa Wia-dia time ko Piita teen a piesu a bul, “Ma kuhian ka tin Wia-dia time nee?”

25 Nii ne Piita bul duu tin ne. Piita si bul nii aŋ miira juu dia, Yesu laa sipaan a piesu a bul, “Kubee ne tin moribiee koo lanpoo a pipi dunia deen kuoroo? U taŋ-la niaa koo nuhuora a nee? Bee ne ŋ biine?”

26 Nii ne Piita bul di nuhuora a ne. Yesu bira bul, “Nii-na u taŋ-la niaa bi kuŋ-kala tin.

27 Ama la-na bi che di la maase niaa deenba, nii wiaa keŋ gbian tuu he fuon le a keŋ cheŋfilee. Gbian-la si keŋ cheŋfili-buŋbuŋ-la, keŋ u niin suri. N jaŋ na moribiin u niin le. Jon moribie-la a tin ma ari mi nyuŋ time.”

## 18

*Yesu dage nii-la si yuga Wia kuorii-la tuon*

*Maak 9.33-37; Luuk 9.46-48*

<sup>1</sup> Yesu si bul ɲii a pi Piita dere, u haritooroo ko u teenj a ku piesu a bul, “La tuɔɲ kubɛɛ ne kii u dɔɲɔ tiina Wia kuorii-la tuɔɲ?”

<sup>2</sup> ɲii ne Yesu yire bii-bie kubala a kii ba tutuɔbaanin

<sup>3</sup> aɲ bula piba a bul, “Wutitii ne mi bulaa pima, see di ma keɲ ma titia muuri a nage hanɲiisin, di ɲii dee, ma bi jan wuo juu Wia kuorii-la tuɔɲ.

<sup>4</sup> Nii-la si keɲ u titia muuri a nage hanɲie, u ne ɲaa ma tuɔɲ kuhianj Wia kuorii-la tuɔɲ.

<sup>5</sup> Di nuu ne keɲ bii-bie dɔɲɔ woruɲ a tinj mi wiaa, mi ne u keɲ woruɲ ɲii.

*Yesu bul wiaa a tige niaa si jan len di niaa juu haache le*

*Maak 9.42-48; Luuk 17.1-2*

<sup>6</sup> Nii-la kala si na hanɲiisi-la sii tomi dɔɲɔ a nyisu duu ɲaa wu-bomuɲ, u maga di ba jonj nomuɲ a vɔɔ laale u banɲa le a jonu yuo he muga tuɔɲ uu nyua liin u suu. Di ba ne ɲaa ɲii, u ne jan kpia u si weye.

<sup>7</sup> U jan lore pi nialin si jan ɲaa di niaa juu haache le. U maga di wialin ku bal. Ama nii-la si ɲaa ba juu haache le, u jan na heɛɲ.

<sup>8</sup> Di ɲ nisin koo ɲ naan nii che duu kenin he haache le, kere ta. ɲ si juu Wia kuorii-la tuɔɲ ari naa-kuuɲ koo na-kuuɲ, u ne kpia ɲ si jan keɲ na-pilimee koo naa-pilimee a juu Wia nyinin.

<sup>9</sup> Di ɲ siin nii che duu kenin he haache le, liisa ta. ɲ si jan juu Wia kuorii-la tuɔɲ ari sii-togo, u

ne kpia ba si jonun yuo he Wia nyinin ari sii-pilimee.”

*Yesu mage namaga a mu tige pie-lelin le  
Luuk 15.3-7*

<sup>10</sup> Nii ne Yesu bira si, “Má fiεε di ma sí han̄biisin̄ deen̄ba kun̄-kala kaa gbesi. Mi bulaa pima di Wia ta u tin̄daaraa ne di ba biben̄ba. Ba he Wia-jaŋ bua-na kala le, mi Nyimma si he lee-la.[

<sup>11</sup> Mi-na Nuhuobiine Bie ko di mi che a laa nialin̄ si lele ne a ta.”]

<sup>12</sup> Nii ne Yesu mage namaga a bul, “Nuu ne fa he dime a ken̄ piesee zolo, nii ne ba tuon̄ don̄o lel.” Nii ne Yesu pieε, “Eε ne ma biine ari u jaŋ ŋaa? U bi jaŋ len̄ piesee mahin̄ banεε ari fii ari nibi-la a ta peelee nyun̄ aŋ lii gollo chiche pie-lelii-laa?

<sup>13</sup> Duu ne nau, mi jaŋ bula pima ari u tuon̄ jaŋ tɔre u pie-bala-la nyun̄ a kii piesee mahin̄ banεε ari fii ari nibi-la si bi lele.

<sup>14</sup> Nii titia ne saa mi Nyimma si he Wia-jaŋ bi che di han̄biisin̄ deen̄ba kun̄ lel.”

*Yesu dage nii la si jaŋ ŋaa di la naan̄bie ne ŋaa wii a cheila le*

<sup>15</sup> Nii ne Yesu si, “Di η naan̄bie ne ŋaa wii chein̄ le, mu a bula pu wii-la u si ŋaa chei, ama ŋaa nii ma duu dun̄dun̄a balia pege. Di u ne jegile nii wii-la η sii bul, ma di η naan̄bie bira sima ne.

<sup>16</sup> Ama duu ne bi jegile nii η teen̄, ken̄ nuu don̄ koo niaa balia pe η titia le di ma mu u teen̄ a bul wii-la u si ŋaa chei duu wasε. N̄ si ŋaa nii, η jaŋ ken̄ niaa di ba ŋaa η dan̄sia.

17 Ama di u ne via duu jegile nii ma teen, η-na bul wii-la pi nialin kala si laa Yesu wiaa dii aa hilimi. Duu ne via duu jegile nii ba teen maa, dogisu ari η buu jin a nage nii-la si bi Wia jin koo a nage lanpoo lilaaru ne.

*N si via wii-la ari η si sei wii-la*

18 Wutitii ne, mi bulaa pima ari wii-la ma si via dunia e, ba jan viau Wia-jan maa. Wii-la ma η si sei dunia e, ba ma jan seyu Wia-jan.

19 Mi jan wasa bula pima ari ma niaa balia ne he dime a ken nii-bala a chuchuele Wia a chiche kun, mi Nyimma si he Wia-jan, u jan jono pima.

20 Lee-la niaa balia koo batori si hilime mi dolun e, mi jan he ba teen."

*Tintinni-la si bi chimin jono che u dono tiina*

21 Nii ne Piita ko Yesu teen a piesu a bul, "Mi Tiina, di mi naanbie ne ηaa wii a cheimi e, naansiin bunmee ne mi jan jono cheu? Mi jono cheu naansiin bulipe koo?"

22 Nii ne Yesu bira bul, "Ai, naansiin bulipe dunduna dee. Jono cheu naansiin mahin batori ari fii leree bulipe."

23 Nii ne Yesu mage namaga a ken Wia kuorii-la a kaa mimagise kuoro ari u tintinnaa a bul, "Kuoru kubala ne sie a chiche duu piese u tintinnaa u chinnaa.

24 U si suomo duu piese, ba ken u tintinna dono ko u teen. U dii u chimin siidi bui bui bui ne.

25 U bi wuo tin. Nii ne u kuhian-la bul di ba kenu ari u haala ari u biirin ari kialin kala u si kene a kaa mu yalle a tin chin-la bua e.

<sup>26</sup> Nii ne tiñtinni-la tuu kpirimi u naadusun nyuñ a sulu, ‘Mi kuhian, ñaa kenyiri. Mi jañ tiñ ñ chimin kala.’

<sup>27</sup> U kuhian-la fáu nisusun woruñ a joñ chiñ-la cheu a ñaa u mu.

<sup>28</sup> Nii ne chiñ tiina-la kuoru-la si joñ chiñ-la cheu, u lii a ma na u tiñtinni dɔñɔ tiina si dii u chimin siidi bui. U keñ u gerin banja le a bul duu tiñ u chimin.

<sup>29</sup> U tiñtinni-dɔñ-la ma tuu kpirimi u naadusun nyuñ a sulu a bul, ‘Ñaa kenyiri, mi jañ timin.’

<sup>30</sup> U via añ kenu mu to dia, añ bul see duu tiñ chiñ-la.

<sup>31</sup> U tiñtinni-dɔñsun si na wii-la u si ñaa, ba tuɔñ kala chei. Ba mu bula pi ba kuhian wii-la kala si ñaa.

<sup>32</sup> Nii ne kuoru-la yiru a piesu a bul, ‘Ñ-na tiñtinna deen, ñ ñaa ni-bɔñ ne. Ñ si sulmi, mi joñ chiñ-la kala ñ si die a cheñ ne.

<sup>33</sup> Bɛɛ ne tii ñ-na bi wuo fá ñ dɔñɔ tiina-la nennige ari mi si fáñ nennige ñii?’

<sup>34</sup> Kuoru-la na baaniñ woruñ u nyuñ a ñaa ba kenu to dia see duu tiñ chiñ-la kala.”

<sup>35</sup> Nii ne Yesu si, “Di ma bi sei di ma joñ ma dɔñsun tiññaa haacheba cheba ari ma tuɔñ kala, mi Nyimma Wia si he Wia-jañ le ma jañ dɔgisema ñii.”

## 19

*Yesu dage niaa di ba sí ba haalaa via  
Maak 10.1-12*

<sup>1</sup> Yesu si bul wiaa deenba dεre, u lii Galilii tinteen a mu Judiya tinteen a chol Joodan fuo-la.

<sup>2</sup> Ni-dan bira to u harin. Nii ne u vaare nialin sii wiilu dime.

<sup>3</sup> Nii ne Farisii tinnaa donsun ma sii ko u teen a chiche di ba magisu a piesu a bul, “Di η ken wii a tige η haala le a chiche η viau, u ken wonbii neε?”

<sup>4</sup> Yesu miira pieseba, “Ma bi karima ari bua-la le Wia si bugumo naa dunia, nialin u si naa, ba fa naa baal ari haal neε?”

<sup>5</sup> Yesu bira si, “Nii ne tii baal-la jan len u nyimma ari u naan dia an ka ba di u haala mere dono le. Naa deenba balia jan ken chal-bala.

<sup>6</sup> Ba bira bi jan naa niaa balia, see kubala. Nialin saa Wia si kaa mere dono le, u bi maga di nuhuobiine kenba pore dono le.”

<sup>7</sup> Nii ne u haritooro-la bira piesu wiin deen a bul, “Beε ne tii saa Moosis fa si di baala nii che u via u haala, duu laa sipaan a ηmunse tenin a pi haal-la an-na viau?”

<sup>8</sup> Nii ne Yesu bira bula piba a bul, “Ma tuon dolie. Nii ne tii Moosis fa sei di ma via ma haalaa. Ama dunia di-suomon, ba fa bi nii naa.

<sup>9</sup> Mi bulaa pima, baala-na kala si via u haala an bira jaa dono, u tiina juu haal-la haache le ne, see di haal-la ka naa ha-choron wu-naalaa.”

<sup>10</sup> Nii ne Yesu haritooro-la bula pu ari nii-na ne he dime, u bi maga di nuu jaa haal.

<sup>11</sup> Nii ne Yesu miira bula piba a bul, “Wiin deen bi naga ari nuu-kala jan wuo naa. Nialin

Wia si jon dolon pa, ba dunɗunɗa ne jan wuo ɗaa ɗii.

<sup>12</sup> Wii-la si tii baalaa bi haalaa ka jaa, ba yuga ne. Ba lul donsun, ba paala bi haalaa wuo pin. Donsun ma, nuhuobiinee ne ɗaaba nii, donsun ma bi haalaa jaa a tin Wia kuorii-la wiaa. Nii-la si jan wuo laa wiin deen dii, u sei.”

*Yesu jon nisin dan hanbiisin le*

*Maak 10.13-16; Luuk 18.15-17*

<sup>13</sup> Nii ne niaa sii ko Yesu teen a ken ba hanbiisin kaa ko duu jon u nisin danba le a chuole Wia piba. Nii ne u haritooro-la kpiaba le.

<sup>14</sup> Yesu si na nii, u bula piba a bul, “Má len di hanbiisi-la ko mi teen. Ma síba kiru! Niaa deenba yiri ne he Wia kuorii-la tuon.”

<sup>15</sup> Nii ne u jon u nisin danba le an viiri.

*Ku-kenni-la ko Yesu teen*

*Maak 10.17-31; Luuk 18.18-30*

<sup>16</sup> Baal kubala ne ma sie a ko Yesu teen. Baal-la ken kaaa kinken. Nii ne u piɛɛ Yesu a bul, “Mi kuhian, wu-zon beɛ ne mi jan ɗaa a ken miisi-la si bi dɛɛ?”

<sup>17</sup> Nii ne Yesu piɛsu a bul, “Beɛ ne tii ɗ piɛsemi wu-zomɔ-la ɗ si jan ɗɗaa wiaa? Ni-bala dunɗunɗa ne zomɔ. Di ɗ níi che di ɗ ken miisi-la si bi dɛɛ, tuto wialin Wia si lenɗe ba ɗmunsa bil di maa to.”

<sup>18</sup> Nii ne baal-la piɛsu, “Wu-beɛba ne?” Nii ne Yesu si, “Sí niaa kpu, sí ɗ donɗo tiina haala che, sí gaa, di ɗ ɗaa dansia wii le, sí wiaa nyia pe.

<sup>19</sup> Fifá ɗ nyimma ari ɗ naan, a cho ɗ donɗo tiina ari ɗ si cho ɗ titia nii.”

20 Nii ne baal-la bula pi Yesu, “Mi kuhian, mi to wiaa deenba kala ne. Bee ne saa ka?”

21 Nii ne Yesu bula pu, “Di η nii che η ηaa ni-zon a si wii-kala ken, jon η kiaa kala yalle a jon moribie-la a pi summoo an ku tomi. N ne ηaa nii, η jan ken kiaa Wia-jan le.”

22 Yesu si bul nii, baal-la tuon chei, u sii viiri, bee wiaa u ken kiaa ne woron.

23 Nii ne Yesu bula pi u haritooro-la a bul, “Wutitii, mi bulaa pima, u ηaa wu-duo ne ari nii-la si ken kiaa si jan wuo juu Wia kuorii-la tuon.”

24 Mi bira bulaa pima, u bi hei ari buntanja si jan wuo to geri-hemin buon lii ari u si heyē ηii nii-la si ken kiaa si jan wuo juu Wia kuorii-la tuon.”

25 U haritooro-la si nii wiaa deenba, ba faasa hiriki a piese Yesu a bul, “U ne nage ηii, kubee ne saa Wia jan laa ta?”

26 Yesu miira benba an bul, “Wii-la si jan kperi nuhuobiine, u bi Wia wuo kperi. Wia wuo wii-kala ηaa ne.”

27 Nii ne Piita bula pu a bul, “Na, la-na len la kun-kala ne an tuto η harij. Bee ne saa la jan na?”

28 Nii ne Yesu bula pi u haritooro-la a bul, “Wutitii ne mi bulaa pima, di dunia falii-la ne yie, mi-na Nuhuobiine Bie jan hon mi kuori-kpasa nyun Wia pulumun tuon. Bua-la le, ma haritooro-la fii ari balia-la si to mi harij, ma ma jan hon kuori-kpasinnij fii ari balia nyun a biben Iziral ta-gentisinij fii ari balia-la a dii ba sariya.

<sup>29</sup> Bira nii-la kala si leŋ u diisiin koo u naanbiirin koo u nyimma koo u naan koo u biirin koo u bagisiin a tiŋ mi wiaa, u tiina jaŋ bira na kiaa deenba naanisiin zolo aŋ pe keŋ miisi-la si bi deɛ.

<sup>30</sup> Ama kuhiasin yuga si jaŋ birime hanbiisin. Hanbiisin ma yuga si jaŋ birime kuhiasin.”

## 20

### *Yesu mage namaga a tige бага тинтиннаа ле*

<sup>1</sup> Nii ne Yesu bira mage namaga a piba a bul di Wia kuorii-la nage baal kubala si keŋ u бага ne chichuo-fiela. U lii chiche niaa di ba mu pere u бага-la le.

<sup>2</sup> Ba sei ari ba jaŋ mu pere, ka u tinba che-bala time. Nii ne u leŋ ba mu u бага-la pipere.

<sup>3</sup> U ku mage kerifi nibi, u bira lii a na niaa doŋsuŋ di ba chin yobo tuon pei. Ba bi tintimii kala ka tin.

<sup>4</sup> Nii ne u bula piba di ba ma mu a pere u бага-la le, ka di u tinba, duu jaŋ piba nii kala si maga. Nii ne ba ma mu.

<sup>5</sup> Kerifi fii ari balia yi, u bira lii a na niaa doŋsuŋ a ŋaa ba ma mu u бага-la. U bira lii kerifi batori bua-la le a bira na niaa doŋsuŋ a ŋaa ba ma mu u бага-la.

<sup>6</sup> U bira ku kpage kerifi banon, u bira lii yobo tuon a na niaa doŋsuŋ ma di ba ha chin dime. Nii ne u pieseba, “Be ne tii ma chin daha pei chichuon ari wiheye kala, ma bi tintimii kala ka tin?”

<sup>7</sup> Nii ne ba bula pu ari ba bi tin̄tin̄naa na di ba tin̄. Nii ne u bula piba di ba ma mu a tin̄ u бага ле. Ba ma mu.

<sup>8</sup> Didaaniñ si yie, ñii ne бага-la tiina yire nii-la s̄ii beñ u бага-la duu yire nialiñ si tin̄ u бага-la ле a tin̄ba, duu suomi nialiñ si to hariñ mu бага-la a tin̄ba añ-na mu yi nialiñ si laa sipaan̄ mu бага-la.

<sup>9</sup> Nialiñ si to hariñ mu бага-la, u tin̄ba che-bala time.

<sup>10</sup> Nii ne u si, ka nialiñ si laa sipaan̄ mu бага-la, di ba ku laa ba time. Ba fa biina ari ba jañ laa kii haritooro-la, ama ba tin̄ba ma mage ñii ne.

<sup>11</sup> Ba ma laa moribie-la añ gugurime wiaa nii-la бага-la ле ba si pere teen̄.

<sup>12</sup> Nii ne ba bula pu a bul, “Niaa deen̄ba si to hariñ k̄o, ba tin̄ hawa kubala dun̄duñ ne, añ ka la-na tin̄ chichuon̄ ari wiiheye kala, añ ka ñ tin̄la kala maga don̄o.”

<sup>13</sup> Nii ne бага-la tiina bula pi ba don̄o a bul, “Jegile nii, mi bima gura. Ma seye ari ma jañ tin̄ di wia juu ne añ laa che-bala time.

<sup>14</sup> Má laa ma moribiee a viiri. Mii che di mi tin̄ baalaa deen̄ba si to hariñ k̄o ñii titia mi si tin̄ma ne.

<sup>15</sup> Mi bi won̄biin̄ kene di mi keñ mi moribiee tin̄ mi tuot̄ore wiaa? Koo ma yaraa bieru a tin̄ mi si keñ zile wiaa nee?”

<sup>16</sup> Nii ne Yesu bula dere, “Kuhiasin̄ jañ birime han̄biisin̄, han̄biisin̄ ma jañ birime kuhiasin̄.”

*Yesu bul u suunɔ wiaa  
Maak 10.32-34; Luuk 18.31-34*

<sup>17</sup> Yesu si bul ɲii di ba he wonɓiinj le ne aa mu Jerusalem. ɲii ne u keɲ u haritooro fii ari balia dunɗunɗa a suusa lii a bula piba wonɓiinj le,

<sup>18</sup> “Má jegili mi teenɗ. Laa mu Jerusalem ne. Di la ne yi dime, ba jan keɲ mi-na Nuhuobiine Bie a kaa mu pi nialinj si kpu pusunɗ pipi Wia kuhiasinj ari Wia teninj kerichiba. Ba jan dii mi sariya a ɲaa di ba kpumi

<sup>19</sup> aɲ keɲmi kaa mu he nialinj si bi Juu tinɲaa ɲaa nisinj le. Ba jan moɲmi. Ba jan viiremi maa aɲ kpaasemi mere daa-geese nyunɗ, ka di mi sii suunɗ le tapulaa batori cheɲ.”

*Zebidii haala sul Yesu a chiche di-honunɗ duu pi u  
biirinɗ balia  
Maak 10.35-45*

<sup>20</sup> ɲii ne Zebidii haala keɲ u biirinɗ balia ko Yesu teenɗ a kpirimi u sipaanɗ aɲ sulu duu pɛu le.

<sup>21</sup> ɲii ne Yesu piesu, “Wu-bee ne ɲɲ che di mi ɲaa pinɗ?” ɲii ne u bul, “ɲ si jan dii Wia kuorii-la a honɗ ɲ kuori-kpasa nyunɗ, lenɗ di mi biirinɗ balia ɲaa ɲ bubuɗɗ huhonnoo, di donɗo honɗ ɲ na-diinj, di donɗo ma honɗ ɲ na-gua.”

<sup>22</sup> ɲii ne Yesu bula pi u biirinɗ a bul, “Ma bi jinɗ ku-la ma sii che. Ma jan wuo nyalima na hee-la mi si jan na? Ma jan wuo fo Wii-chuole liinj ari ba si jan fomi ɲii, koo?” Ba si, “Oo, la jan wuo.”

<sup>23</sup> ɲii ne Yesu bula piba a bul, “Wutitii ne ma bul. Hee-la mi si jan na, u-na ma ma jan na. Ama mi na-diinj ari mi na-gua huhonnoo-la, mi

dee bi jaŋ tuɔseba. Wia ne jaŋ liiseba di ba hoŋ dime.”

<sup>24</sup> Yesu haritooroo fii-la si nii Jeems ari Joɔŋ si bul wii-la, ba na baaniŋ ba nyuŋ.

<sup>25</sup> Nii ne Yesu yire u haritooroo kala. Ba mu u teenŋ. U bula piba a bul, “Ma jiŋ nialiŋ si bi Juu tiŋŋaa ŋaa, ba hoŋ niaa nyuŋ ne. Ba kuhiasin ma keŋba doluŋ.

<sup>26</sup> Ama u bi maga di ma ŋiŋaa ŋii. Ma tuɔŋ nii-la sii che u ŋaa ma kuhianŋ, u maga duu ne tiŋ tiŋtiŋaa pipima.

<sup>27</sup> Ma tuɔŋ nii-la ma sii che u ŋaa ma tuɔŋ kuoro, u maga duu ne ŋaa ma tuɔŋ yomo.

<sup>28</sup> Mi-na Nuhuobiine Bie, mi bi ko di mi che niaa di ba tima pimi, mi ko di mi-na tima piba ne a suu a laa niaa miisaa yuge ta a piba.”

### *Yesu vaare nyulimaa balia*

#### *Maak 10.26-52; Luuk 18.35-43*

<sup>29</sup> Yesu ari u haritooroo si lii Jeriko le, ni-dan ne to ba hariŋ.

<sup>30</sup> Di nyulimaa balia hoŋ wonbiin niin a nii di Yesu nii bal. Nii ne ba faasa yire a bula pu a bul, “Yesu, Devit nihii, fala nennige.”

<sup>31</sup> Nii ne ni-dan-la kpiaba le di ba keŋ goŋ. Ama ba faasa yire a kii ŋii a bul, “La Tiina, Devit nihii, fala nennige.”

<sup>32</sup> Nii ne Yesu chin an yireba a pieseba, “Bee kuŋ ne ma che mi ŋaa pima?”

<sup>33</sup> Nii ne ba bul, “La Tiina, laa che di ŋ suri la siaa ne.”

<sup>34</sup> Nii ne Yesu fala nennige a digi ba siaa le. Ba siaa guu suri, ba tuto u hariŋ.

# 21

*Yesu juu Jerusalem*

*Maak 11.1-11; Luuk 19.28-40; Jooj 12.12-19*

<sup>1</sup> Njii ne Yesu ari u haritooroo sii mu Jerusalem. Ba ku yi Betifagi a ku yi peel kubala baa yire Oliv. Njii ne Yesu liise u haritooroo balia a tinba a bula piba a bul, “Má mu tan-la si he ma sipaanj.

<sup>2</sup> Di ma ne mua, ma jan na kakumo ari u bie di ba vobɔ a kii. Má puri a kaa kɔ pimi.

<sup>3</sup> Di nuu ne piesema, má bula pu ari ma Tiina níi che. U jan lej di ma kaa kɔ lima.”

<sup>4</sup> Wiinj deenj n̄aa di wii-la nii-la fa síi bul wiaa, Wia Din-zɔn-la dolunj le ku n̄aa wutitii ne.

<sup>5</sup> U fa si,  
 “Má bulaa pi Zaayɔn niaa  
 di ba bee na, di ba kuoro níi kɔ ba teenj.  
 U kenj u titia muuri ne a jil kakumo  
 a bira jil kakumo bie.”

<sup>6</sup> Njii ne Yesu haritooro-la mu a n̄aa wii-la Yesu si bula piba di ba n̄aa.

<sup>7</sup> Ba kenj kakumo-la ari u bie kaa kɔ a jonj ba genninj danj kakumo-la ari u bie nyunj, Yesu jil.

<sup>8</sup> Ni-danj-la jesinj jonj ba genninj a jere wonjbiinj le, ka dɔnsunj ma kerɔ pipaarij a ma kaa jere wonjbiinj le.

<sup>9</sup> Ni-danj-la si laa Yesu sipaanj ari nialinj síi to u harinj suomo nj̄naa gonj a bul, “Tabarikala Devit nihinj! Wia janj pe nii-la síi kɔ la Tiina dolunj le. Má lej di la denne Wia!”

<sup>10</sup> Yesu si muu juu Jerusalem, tan-la kala zigili. Njii ne niaa piese a bul, “Kubee ne n̄la?”

11 Nii ne ni-dan-la bul, “Yesu si lii Nazaret si he Galilii tinteen le, nii-la sii bul wiaa, Wia Din-zon-la dolun le, u ne nii.”

*Yesu juu Wia-dia*

*Maak 11.15-19; Luuk 19.45-48; Jɔɔɔ 2.13-22*

12 Nii ne Yesu juu Wia-dia. Nialin donsun he dime a yiyalle kiaa, donsun ma yuyɔɔ kiaa. Yesu kiriba kala ta ba lii. Baalaa ma he dime a yiyere moribiee. Yesu nmoo ba teebulba lo. Baalaa donsun ma yalle kokosun. U nmoo ba ma kpasinnin a lo.

13 Nii ne Yesu bula piba a bul, “Ba nmunsa di Wia si, u dia jan naa lee-la niaa si jan chuchuele Wia, an ka ma-na miira kaa birime gaari-dia.”

14 Nii ne nyulimaa ari gbegisin ko Yesu teen Wia-dia le. U vaareba.

15 Ama nialin si kpu pusun pipi Wia kuhiasin ari Wia tenin kerichiba si na wu-magila-la u sii naa a bira na hanbiisin sii naa gon nii Wia-dia le, ba na baanin. Hanbiisi-la fa yire, “Tabarikala Devit nihin.”

16 Nii ne nialin si kpu pusun pipi Wia ari Wia tenin kerichiba piese Yesu a bul, “Nii wialin ba sii bul nee?” Yesu bul, “Mi nia ne.” Nii ne Yesu ma pieseba, “Ma bi Wia tenin karimaa? Ba nmunse Wia tenin tuon a bul, ‘Wia jan len di bii-mullun didenne Wia.’ ”

17 Nii ne Yesu lenba an sii mu Betani a chua dime.

*Yesu kaliba he tutogo le*

*Maak 11.12-14, 20-24*

18 Tan si pula, Yesu miira mu Jerusalem. U sí mu, losun kenu won̄biin̄ le.

19 U na tutogo duu chin̄ u sipaan̄ won̄biin̄ niin̄. U mu yi tutogo-la bubuon̄ a wula ben̄ di nenε tuo, see pipaarin̄. Nii nε u bul tia-la le a bul, “A lii jinin̄ a kaa mumu, η bira bi jan̄ nen̄.” Tia-la guu suu.

20 U haritooro si na wiin̄ deen̄, u ηaaba wu-kpun̄kpere. Ba pipiεε don̄o a bul, “εε nε tia-la guu suu lima ηii?”

21 Nii nε Yesu bula piba a bul, “Wutitii nε mi bulaa pima, di ma nε ken̄ yarida a bi tuosaa balia kenε, ma ma jan̄ wuo ηaa wii-la si ηaa tutogo-la le. Nla ma dun̄dun̄a dee, ama ma jan̄ wuo paala bul peelin̄ deen̄ le duu sii a mu tel muga tuon̄. U jan̄ ηaa pima.

22 Kialin̄-na kala ma si chuolε Wia a susul, di ma nε ken̄ yarida, ma jan̄ naba.”

*Niaa piεε Yesu u dolun̄ wiaa  
Maak 11.27-33; Luuk 20.1-8*

23 Ba si mu Jerusalem, Yesu mu juu Wia-dia. U si juu Wia-dia-la ηii a didage niaa, nialin̄ si kpu pusun̄ pipi Wia kuhiasin̄ ari Wia tenin̄ kerichiba ari Juu tin̄ηaa kuhiasin̄, ba kala sii ko u teen̄ a piεu a bul, “Dol bεε nε η ken̄ a ηin̄aa wiaa deen̄ba? Kubεε nε pin̄ dolun̄ η kaa ηin̄aa ηii?”

24 Nii nε Yesu bula piba a bul, “Mi ma jan̄ piεema wu-bala. Di ma nε dagemi u bubuon̄, mi ma jan̄ dagema dol-la mi si kenε bubuon̄.”

25 Nii nε u piεεba a bul, “Joon̄, Wia lii-foori-la dolun̄, u lii nii nε? U lii Wia teen̄ nεε koo u lii nuhuobiine teen̄ nεε? Má dagemi.” Ba

suomo ken̄ wii-la lilere dɔŋɔ ɛ aa bul, “Wu-beɛ ne laa che di la bul? Di la ne bula pu a bul di Wia teen̄ ne u lii, u jaŋ piɛsɛla a bul, ‘Bee ne saa tii ma bi wialin̄ u si bula laa dii?’

<sup>26</sup> Di la ne saa si u lii nuhuobiine teen̄ ne, fawullun̄ jaŋ ken̄la a tin̄ ni-dan̄-la si chin̄ dime wiaa. Niaa bula ari Joɔŋ fa sene ŋaa nialin̄ sii bul wiaa, Wia Din̄-zɔŋ-la dolun̄ ɛ dɔŋɔ ne.”

<sup>27</sup> Nii ne ba bula pi Yesu a bul, “La bi jin̄.” Nii ne Yesu ma bula piba a bul, “Tɔɔ, mi ma bi jaŋ dagema dol-la mi si kene bubuɔŋ.”

<sup>28</sup> Nii ne Yesu mage namaga a pi nialin̄ si kpu pusun̄ pipi Wia kuhiasin̄ ari Juu tin̄ŋaa a bul, “Baal kubala ne he dime a ken̄ han̄bolibiisin̄ balia. U sii mu u bii-hian̄ teen̄ a bula pu a bul, ‘Mi bii, mu бага jinin̄ a tin̄.’

<sup>29</sup> Nii ne bile bul, ‘Mi bi jaŋ mu бага jinin̄.’ U ŋii harin̄ ɛ, u tuɔŋ chei wii-la u si bula pi u nyimma ɛ an̄ sii mu бага-la. Nii ne ba nyimma bira mu a bul u bii-bie-la ma ɛ a bul duu mu бага. Nii ne bile bul duu jaŋ mu an̄ via.

<sup>30-31</sup> Han̄biisin̄ deen̄ba balia tuɔŋ, kubee ne to ba nyimma niin̄ ɛ? Bee ne ma biine?” Nii ne ba bula pu di u bii-hian̄-la ne. Nii ne Yesu bula piba a bul, “Wutitii, mi bulaa pima ari lan̄poo lilaaraa ari jagumuloba jaŋ laa sipaan̄ ma ɛ a juu Wia kuorii-la tuɔŋ.

<sup>32</sup> Bee wiaa Joɔŋ Wia lii-foori-la ko a dagema won̄bii-titii-la ne ma si jaŋ to, an̄ ka ma bi u wiaa laa dii, ama lan̄poo lilaaraa ari jagumuloba, ba laa u wiaa dii. Ma si paala na ba si laa u wiaa dii ŋii, an̄ ka ma ha bi birima di ma laa u wiaa dii.”

*Yesu mage namaga a tige nialij síi tinj tintinḡaa  
baga le*

*Maak 12.1-12; Luuk 20.9-19*

<sup>33</sup> Nii ne Yesu bira mage namaga dḡḡo a bul, “Baal kubala ne bil бага a chḡḡse kiaa si ken nenene yuge a nage chichuḡḡ. Ba yiyire gireps. U saa lige бага-la golli ne. U lu bua бага-la tuḡḡ di ba chage tii-nene-la liḡḡ hihe. U ma saa lusun nyun dia a hḡḡḡ pḡ. Nii ne u paa niaa a he u бага-la tuḡḡ di ba titiḡ. Ka u mu taḡḡ dḡḡ.

<sup>34</sup> Tii-nene-la biiniḡ si yie, u tinj u dia tintinnaa di ba mu tintinna-la teenḡ di ba mu laa tii-nene-la kaa kḡ. Ba mu.

<sup>35</sup> Ba ken dḡḡo a ḡmḡbu, a kpu dḡḡo, a yage dḡḡo ari tabiaa a kpuu.

<sup>36</sup> Nii ne u tinj niaa dḡḡsun a wasa kii bunḡbun-la. Ba ḡaa ḡii titia nialij ma le.

<sup>37</sup> Nii hariḡ le ne u tinj u bie. U biina duu bie ne mua, ba jaḡḡ zilu. U ma bira mu.

<sup>38</sup> Tintinna-la si na bile, ba bula pi dḡḡo a bul, ‘Di бага-la tiina ne suba, bie deenḡ ne jaḡḡ dii u kiaa. Má kḡ di la kpuu. Di la ne kpuu, la ne jaḡḡ miira tii u kialij.’

<sup>39</sup> Ba ken bile a joḡḡu yuo ta бага-la hariḡ a kpuu.”

<sup>40</sup> Nii ne Yesu piḡḡeba, “Di бага-la tiina ne kḡ, ee ne u jaḡḡ ḡaa бага tintinna-la le?”

<sup>41</sup> Nii ne ba bula pu a bul, “U jaḡḡ kḡ a kpu ni-bḡḡḡ-la aḡḡ joḡḡ бага-la a pi ni-tania. Di tii-nene-la biiniḡ ne yi, ba jaḡḡ ken tii-nene-la kaa mu pu.”

<sup>42</sup> Nii ne Yesu piḡḡe nialij si nii namaga-la, “Ma bi Wia teḡḡ-la karimaa? a mu yi lee-la ba si

bul ɲla:

“Tiepii-la dii-saaraa si via,  
u ne miira ku ɲaa tiepii-duoŋ ba si joŋo bil  
dia gentine.

La Tiina Wia tiŋtiŋɲaa ne ɲii.

U ɲaala wu-kpuŋkpere ne.’ ”

<sup>43</sup> ɲii ne Yesu bula pi nialin a bul, “Wia jaŋ keŋ  
u kuorii-la laa ma teen, a joŋo pi nialin si jaŋ to  
Wia niin woruŋ a ɲiŋaa wialin si jaŋ dage ari  
ba birima lii ba haacheba le ne. [

<sup>44</sup> Nii-la si tel tiepii-la nyuŋ, u tiina jaŋ yere  
muno muno. Di tiepii-la ma ne tel nuu-kala  
nyuŋ, u jaŋ yere u tiina muno muno.]”

<sup>45</sup> Nialin si kpu pusun pipi Wia kuhiasin ari  
Farisii tiŋɲaa nii Yesu si mage namaga-la a jin  
ari ba wiaa ne u bubul ɲii.

<sup>46</sup> ɲii ne ba wiwalime di ba kenу kaa mu to  
dia. Ama ba faa fá ni-daŋ-la si he dime, bee  
wiaa ni-daŋ-la joŋ Yesu ari u ɲaa nialin sii bul  
wiaa, Wia Diŋ-zoŋ-la dolun le doŋo ne.

## 22

*Yesu mage namaga a tige ha-jaari gbiele kudiilee  
le*

*Luuk 14.15-24*

<sup>1</sup> ɲii ne Yesu bira mage namaga doŋo a didage  
niaa.

<sup>2</sup> U si, “Wia kuorii-la nage kuoru kubala ne. U  
bie jaa haala. ɲii ne u ɲaa ba gbigbieli ha-jaari  
gbiele a ɲaa ba yire niaa di ba ko gbiele-la.

<sup>3</sup> Ba si ɲaa kudiile-la dere, u tin u tiŋtinnaa di  
ba mu yire nialin u si yira, ari ba ɲaa siri di ba  
gbieli gbiele-la ne. Ba si mu yireba, ba via.

<sup>4</sup> Njii nε u bira tiŋ u tiŋtinnaa dɔŋsuŋ di ba mu bula pi nialin u si yira di ba kpu nε-bellin ari nε-niiniŋ kala nε a ŋaa kudiile-la dεrε, di ba kɔ ha-jaari gbiele-la.

<sup>5</sup> Njii nε nialin u si yira bira via di ba mu aŋ titin ba tiŋtiŋŋaa. Dɔŋɔ sii mu u бага, dɔŋɔ ma sii mu u kiaa di-yallin.

<sup>6</sup> Ka dɔŋsuŋ ma kεsε kuoro dia tiŋtinna-la a ŋmooba aŋ kpuba.

<sup>7</sup> Njii nε kuoru-la na baaniŋ a ta u laali-yuoroo. Ba mu kpu nialin si kpu u dia tiŋtinna-la aŋ nyigε ba taŋ kala.

<sup>8</sup> Njii nε u yirε u tiŋtinnaa dɔŋsuŋ a bira bula piba, ‘Mi gbiele kudiile-la ŋaa siri nε, ama nialin mi si yira bi maga di ba kɔ gbiele-la.

<sup>9</sup> Má saa lii mu wonbii-porunuŋ a yirε nialin kala ma si na dime a bula piba di ba kɔ a dii kudiile-la.’

<sup>10</sup> Njii nε tiŋtinna-la lii wonbii-porunu-la a yirε nialin kala ba si na lee-la, ni-zɔŋŋɔ ari ni-bɔŋŋɔ kala. Njii nε ba kala ku juu sɔ dia-la lε ba fa sii gbieli gbiele-la.

<sup>11</sup> Njii nε kuoru-la juu duu na nialin si kɔ a na baal kubala duu bi ha-jaari gbiele gerin laala.

<sup>12</sup> U piesu a bul, ‘Mi nanɔŋ, εε nε ŋ ŋaa ku juu daha aŋ bi ha-jaari gbiele gerin laala?’ Baal-la tore u niin.

<sup>13</sup> Njii nε kuoru-la bula pi u tiŋtinnaa a bul, ‘Má ken baala deen a vɔɔ u nisaa ari u naasiŋ a jonu yuo ta jeen hariŋ birimin tuɔŋ duu pina yiyel aŋ didin u nyilaa.’ ”

<sup>14</sup> Njii nε Yesu bula dεrε aŋ bul, “Ba yie yire niaa yugε nε, ama ba tuɔŋ ba yie tuɔsε niaa

ban̄m̄en̄e n̄e.”

*Ba bul lan̄poo t̄im̄iñ wiaa*

*Maak 12.13-17; Luuk 20.20-26*

<sup>15</sup> N̄ii n̄e Farisii tin̄ḡaa sii lii a vuure n̄ii ba si jañ magis̄e Yesu a b̄er̄e k̄enu ari wu-p̄iesaa. N̄ii n̄e ba tin̄ḡ ba haritooroo d̄oñsun̄ ari Her̄od̄ ma haritooroo d̄oñsun̄ di ba mu Yesu teen̄ḡ.

<sup>16</sup> N̄ii n̄e ba k̄o u teen̄ḡ a p̄iesu a bul, “La kuhian̄, la jima di ḡ k̄eñ wutitii n̄e a didage Wia tonun̄ woñbii-titii-la. ḡ sipaan̄ tuo nuu l̄e. ḡ bi ni-bal̄ s̄ii ka fá.

<sup>17</sup> Saa bula pila ari u ḡaa woñbii n̄e di la tin̄ḡ lan̄poo a pi Rom tin̄ḡteen̄ kuori-balin̄ ba s̄ii yire Siiza? Ēe n̄e ḡ ma biine?”

<sup>18</sup> Yesu fa jin̄ḡ ba tuobiin̄-b̄om̄o-la n̄e a bula piba a bul, “Ma kan̄fugi timma! B̄e n̄e tii maa magis̄emi?”

<sup>19</sup> Má k̄eñ ma lan̄po-la moribiin̄ kaa k̄o di mi bee na.”

<sup>20</sup> Ba k̄eñ d̄oñḡ kaa k̄o. N̄ii n̄e u pīes̄eba, “Kub̄e nyun̄ n̄e h̄e dime? Kub̄e yirin̄ ma n̄e ba tuuro h̄e moribii-la l̄e?”

<sup>21</sup> N̄ii n̄e ba bul di Siiza yirin̄ n̄e. U bula piba a bul, “T̄oo, má joñ Rom tin̄ḡteen̄ kuori-bal-la kiaa pu aḡ joñ Wia ma kiaa pu.”

<sup>22</sup> Yesu si bul n̄ii, u ḡaaba wu-kpun̄kp̄ere ba sii viiri.

*Ba pīes̄e Yesu a tige nialin̄ si suba l̄e.*

*Maak 12.18-27; Luuk 20.27-40*

<sup>23</sup> Ch̄ēe-la titia nialin̄ d̄oñsun̄ ba s̄ii yire Sadusii tin̄ḡaa, ba k̄o u teen̄ḡ. Sadusii tin̄ḡaa yie

si di nuu nε suba, u bira bi sii. Ba piesu wiaa a bul,

<sup>24</sup> “La kuhian, Moosis fa si di baala nε jaa haala, di haal-la ari baal-la nε bi bii lula, an ka di baal-la suu, u maga di u n̄aana jon yo-haal-la jaa nε. Di u lul biirin pi u maala-la si suba, biiri-la jan chin u nyun ε.

<sup>25</sup> Naanbiirin balipe nε fa hε dime. Ba kala n̄aa baalaa. Ba naan kubala, ba nyimma kubala. Ba kuhian jaa haala. Ba di haal-la bi bii lula, an ka u suu. U si suba, u ka haal-la a pi u n̄aana don̄o nε.

<sup>26</sup> Liamin ma suu. Torimun tiina ma jon haal-la jaa. U ma n̄ii titia nε. Naanbiiri-la balipe kala nε jaa haal-la. U bi lula.

<sup>27</sup> Nii harin ε nε haal-la ma titia suu.

<sup>28</sup> Tapulii-la niaa si jan sii suun ε, baalaa deenba balipe tuon, kubε nε jan tii haal-la? Ba kala balipe nε jaau.”

<sup>29</sup> Nii nε Yesu bula piba a bul, “Ma bi Wia tenin jin. Ma ma bi Wia dolun jin. Nii nε tii ma yen̄ji.

<sup>30</sup> Tapulii-la niaa si jan sii suun ε, baalaa bira bi jan jaa haalaa, haalaa ma bira bi jan jaa balaba. Ba kala jan nage Wia tin̄daaraa si hε Wia-jan ε.”

<sup>31</sup> Nii nε Yesu bula piba a bul, “Na ma piesemi nialin si jan sii suun ε wiaa nε. Ma bi karime wialin Wia fa si bula pi niaa u tenin lεε?

<sup>32</sup> U fa si duu nε n̄aa Abiraham Wia ari Aizik Wia ari Jekob kala Wia. (Bua-la ε u si bul nii di Abiraham ari Aizik ari Jekob fa suba nε.) Wiaa deenba u si bula, ba bubuon nε di Abiraham ari

Aizik ari Jekob bira sii suuŋ ɛ nɛ a hɛ Wia kuorii-la tuoŋ. Wia bi jaŋ wuo ŋaa nialin si suba Wia, u ŋaa ni-weyee Wia nɛ.”

<sup>33</sup> Ni-daŋ-la si nii nii u sii dage niaa, u ŋaaba wu-kpuŋkpere.

*Wialin si maga di la ŋiŋaa, ba tuoŋ wu-balin  
Maak 12.28-34; Luuk 10.25-28*

<sup>34</sup> Farisii tinŋaa si nia ari Yesu bul wiaa lo Sadusii tinŋaa ba ŋaa fuui, ba kala ku pɛ doŋo ɛ.

<sup>35</sup> Nii nɛ Wia tenin kerichiba doŋo wiwalime duu magise Yesu a pipiesu wiaa.

<sup>36</sup> U piese Yesu a bul, “Kuhian, wialin Wia si dage niaa baa to, kubɛɛ nɛ ŋaa ba tuoŋ siifian wiin?”

<sup>37</sup> Nii nɛ Yesu bul, “ ‘Keŋ ŋ tuoŋ kala ari ŋ tuobiinaa kala ari ŋ wii-wii-kala a cho ŋ Tiina Wia.’

<sup>38</sup> Wialin Wia si dage niaa baa to, ba tuoŋ wu-balin ari ba tuoŋ buŋbuŋ nɛ nii ari ba tuoŋ siifian wiin nɛ nii.

<sup>39</sup> Wu-liamin ma nɛ ŋla: ‘Cho ŋ doŋo tiina ari ŋ si cho ŋ titia nii.’

<sup>40</sup> Wialin Moosis fa si ŋmunsa bil di niaa tuto ari wialin kala nialin sii bul wiaa, Wia Diŋ-zoŋ-la doluŋ ɛ, ba kala lii wiaa deenba baliamin tuoŋ nɛ.”

*Ba piese nii-la Wia si liisa wiaa.  
Maak 12.35-37; Luuk 20.41-44*

<sup>41</sup> Farisii tinŋaa ha si hilimi nii, Yesu ma pieseba a bul,

<sup>42</sup> “Bεε nε ma biine Kirisito, nii-la Wia si liisa wiaa? Kubεε doho nuu nε u ηaa?” Nii nε ba bul duu ηaa Devit doho nuu nε.

<sup>43</sup> Nii nε Yesu bira pieεba a bul, “Bεε nε saa tii Wia Diη-zoη-la fa dage Devit duu kenu yire u Tiina?”

<sup>44</sup> Nla nε u bul:

‘Mi Tiina Wia bula pi mi Tiina  
duu hoη u semε, ni-duoη di-hoηuη,  
see duu yuo dii u diηdoηηoo kala dεrε.’

<sup>45</sup> Devit titia si yire nia deη u Tiina, εε nε saa u jaη wuo ηaa u nihiη duηduηa?”

<sup>46</sup> Yesu si bul ηii, nuu-kala bira bi wii wuo bul. A chiη tapulii-la kala a kaa mu, nuu-kala ma bira bi nyu-duoη keε duu pieεu wii-kala.

## 23

*Yesu bul wiaa, Wia teniη kerichiba ari Farisii  
tiniηaa teenj*

*Maak 12.38-40; Luuk 11.39-44, 46, 52; 20.45-47*

<sup>1</sup> Nii nε Yesu bula pi ni-darη-la ari u haritooro a bul,

<sup>2</sup> “Wia teniη kerichiba-la ari Farisii timma-la, ba nε ηaa nialiη sii dage wialiη Moosis fa si bile di niaa tuto.

<sup>3</sup> Nii wiaa ma maga di ma to wialiη kala ba si bula pima di ma ηaa, ama ma si ba wu-ηaalaa chesu, bεε wiaa ba titia bi wialiη ba sii dagu ka to.

<sup>4</sup> Ba yie voo chugi-yuηoo nε a kaa chuη niaa, ama ba titia bi che di ba peba le a laa chuga-la.

<sup>5</sup> Ba yie ηaa wii-kala di niaa naba nε. Ba yie ηmuηε Wia niη wiaa a he tenj-jalaa le a kaa

vuvoo ba gennin nisaa le ari ba nyuŋ-chuulun le an len ba gennin juosaa ma duomi duomi.

<sup>6</sup> Di niaa ne yireba di ba ku dii kiaa, ba cho di ba hon ni-balaa di-honoo. Ba ne juu Wii-chuole diisin maa, ba cho di ba hon ni-balaa di-honoo.

<sup>7</sup> Ba yie chiche di niaa chuchuoleba an jujonba jirima niaa tuon an yiyireba kerichiba.

<sup>8</sup> Ama ma-na si lenje di niaa kenma kaa yire kerichiba. Ma kala naa naanbiirin ne. Ma kala kerichi naa kubala ne.

<sup>9</sup> U saa bi maga di ma yire nuu-kala ma nyimma dunia deen le, bee wiaa ma Nyimma naa kubala ne a he Wia-jaŋ.

<sup>10</sup> Ma bira si nuu-kala yire ma kuhian, bee wiaa ma kuhian ne naa Kirisito, nii-la Wia si liisa.

<sup>11</sup> U maga di ma tuon kuhian ne birime hanbie a tin tintonnaa pipima.

<sup>12</sup> Nii-la kala sii bigisi u titia le, Wia jaŋ kenu muuri, ka nii-la ma si ken u titia muuri, Wia jaŋ naa duu yuge.

<sup>13</sup> Ma Wia tenin kerichiba ari ma Farisii tinnaa, ma kanfugi timma-la, ma jaŋ na heen. Ma ken Wia kuorii-la dia-boro yage ne di niaa si juu, bee wiaa ma titia bi che di ma juu, an bira po di nialin sii walime di ba juu, di ba ma si juu. [

<sup>14</sup> Ma Wia tenin kerichiba-la ari ma Farisii timma-la, ma kanfugi timma-la, ma jaŋ na heen. Ma yie ken yo-haalaa kiaa laa didii a yie fugo chuole Wia didieni. Bua-la le Wia si jaŋ dii ma sariya, ma ne jaŋ na heen a kii nuu-kala.]

15-16 Ma Wia teniŋ kerichiba ari ma Farisii tiŋŋaa, ma kaŋfugi timma-la, ma jaŋ na heeŋ. Ma yie sii a duori liiŋ a mu tiŋteyee doŋsuŋ a bul Wia wiaa dime. Di ni-bala ne laa dii, ma yie leŋ u wasa boŋ a nage ma si nage nii ne. Wia ma jaŋ joŋu he nyiniŋ le ari u si jaŋ joŋma he nii. Ma nyuluŋ sipaa-laaraa, ma jaŋ na heeŋ. Ma yie bul, 'Di nuu ne ŋmieŋe Wia-dia, u bi ŋmianŋ ŋaa, ama duu ne ŋmieŋe selime kialinŋ si he Wia-dia tuoŋ, u chaasa ŋmieŋe ŋmianŋ ne.'

17 Ma nyuluŋ-too ne! Selime kialinŋ si he Wia-dia tuoŋ ari dia-la si ŋaa selime-la bi disinniŋ keŋe, deenba balia tuoŋ kubee ne yuga?

18 Ma bira bula di nuu ne ŋmieŋe koru-la le ba si kpu pusunŋ pipi Wia, u bi chaasa ŋmieŋe ŋmianŋ, ama duu ne ŋmieŋe ku-la ba si yie joŋo danŋ koru-la nyunŋ a pi Wia, u chaasa ŋmieŋe ŋmianŋ ne.

19 Ma nyulimaa, ku-la ba si yie joŋo danŋ koru-la nyunŋ ari koru-la si ŋaa di ku-la bi disinniŋ keŋe, kiaa deenba balia tuoŋ kubee ne yuga?

20 Nii wiaa di nuu ne ŋmieŋe koru-la le ba si yie kpu pusunŋ pipi Wia, u yie ŋmieŋe ba di ku-la kala ne ba si yie joŋo danŋ u nyunŋ a pi Wia.

21 Di nuu ne bira ŋmieŋe Wia-dia, u ŋmieŋe Wia dia-la ari Wia kala ne, bee wiaa Wia he dia-la le ne.

22 Di nuu ne bira ŋmieŋe Wia-jaŋ, u ŋmieŋe Wia kuori-kpasa-la ari nii-la si hoŋ u le ma ne.

23 Ma Wia teniŋ kerichiba ari ma Farisii tiŋŋaa, ma kaŋfugi timma-la, ma jaŋ na heeŋ.

Di ma jaa pipaari-la suora si sima, ari pipaari-la si heyε, ari pipaa-diilee, ma yie keŋba kala kaa kpaaleree fii fii a jon ba kuŋ-kala lerin dɔŋɔ a pi Wia aŋ via di ma to siifian wialin Moosis fa si bile pima di ma tuto. Ba ne ŋla: Má to wutitii wonbiin a fá niaa nennige a laa Wia dii. U maga di ma kpaaleree kialin leree fii fii ne a jon kubala pi Wia, ama u bi maga di ma via wutitii wonbiin.

<sup>24</sup> Ma nyulun sipaa-laaraa! Ma yie chuori ma sinin a liise nanchuosun kala ta aŋ bi buntanaba na aŋ liliŋ.

<sup>25</sup> Ma Wia tenin kerichiba ari ma Farisii tinŋaa, ma kanfugi timma-la, ma jan na heŋ. Ma yie chese ma nyunyualusun ari ma gbanŋin hariŋ worun di ba zɔŋ aŋ bi ba tuɔŋ ka tiisi, ka ba tuɔŋ kala birisi. Ma nage nyunyualun ari gbanŋin deenba ne. Ma yaraa ne zomɔ, ama ma tuɔŋ le ma to ma tuɔɔrun le a gigaa niaa kiaa.

<sup>26</sup> Ma nyulun Farisii tinŋaa, má laa sipaan tiisi ma nyunyualun tuɔŋ aŋ-na tiisi hariŋ ma duu zɔŋ.

<sup>27</sup> Ma Wia tenin kerichiba ari ma Farisii tinŋaa, ma kanfugi timma-la, ma jan na heŋ. Ma nage vaamaa ba si keŋ tuɔrun buge ne. Ba hariŋ zɔŋ, aŋ ka ba tuɔŋ kala su ari hangbelee ari ni-suunun.

<sup>28</sup> Nii titia ne ma ma nage niaa teen. Di ba nama, ba yie biine di ma ŋaa ni-zomɔ ne, ka ma tuɔŋ su ari wu-bonɔɔ ari kanfugi wu-ŋaalaa.

*Yesu bul niaa dogisun wiaa.  
Luuk 11.47-51*

<sup>29</sup> Ma Wia tenin kerichiba ari ma Farisii tinɲaa, ma jaŋ na heɛɲ. Ma kpu nialin fa sii bul wiaa, Wia Diŋ-zɔŋ-la dolun ɛ, aŋ ka ma saa ba vaamaa.

<sup>30</sup> Ma si, 'Di la ne fa he dime bua-la ɛ la naabalimaba fa si he ba miisin ɛ, la fa bi jaŋ ɲaa ɲii ba si ɲaa a kpu nialin.'

<sup>31</sup> Ama ma si yireba ma naabalimaba ɲii, ma sene sei ari ma ɲaa nialin si kpu nialin fa sii bul wiaa, Wia Diŋ-zɔŋ-la dolun ɛ, ba doho niaa ne.

<sup>32</sup> Má saa mu a dere wialin ma naabalimaba fa si suomo a ɲɲaa.

<sup>33</sup> Ma ni-bɔŋɲɔɔ ari ma ni-bɔŋɲɔɔ biirin, ma biina ari ma jaŋ wuo fá kage Wia nyin-la lee? Ai.

<sup>34</sup> ɲii wiaa, mi jaŋ bira tin nialin sii bul wiaa, Wia Diŋ-zɔŋ-la dolun ɛ ari wu-jinnaa ari kerichiba. Ma jaŋ kpu dɔŋsun a keŋ dɔŋsun kpaasa mere daa-geese nyun, a viire dɔŋsun maa, ma Wii-chuɔle diisin ɛ, a to naasin dɔgise dɔŋsun maa tasin dɔŋsun ɛ.

<sup>35</sup> Wia jaŋ dɔgise jinin niaa a tin ba si kpu niaa, a chin bua-la ɛ ba si kpu nialin si bi wii cheye, a suomi Ebil ɛ a kaa ko bua-la ɛ ba si kpu Zekaraya, Berakia bie. Ba kpuu Wia-dia tuɔŋ a kpage koru-la nyun ba si yie nyige pusun pipi Wia ne. Ba cheerin jaŋ he ba nyun.

<sup>36</sup> Wutitii ne mi bulaa pima, dɔgisunu-la Wia si jaŋ dɔgise ni-kpuuraa deenba, u jaŋ joŋo dɔgise jinin niaa.

*Yesu bul wiaa a tige Jerusalem niaa le  
Luuk 13.34-35*

<sup>37</sup> Ma Jerusalem niaa, ma kpu nialin sii bul wiaa, Wia Diŋ-zoŋ-la doluŋ le a joŋ tabiaa a yage tinɗaara-la Wia si tima di ba ko ma teen. Naanŋiin yuga ne mi fa cho di mi chu to ma niaa kala ari jimin si yie chu to u biirin nii, ka ma bi seye.

<sup>38</sup> Bee na, Wia jan leŋ ma taŋ pima.

<sup>39</sup> Ma bira bi jan nami see bua-la le ma si jan chuolemi a bul, 'Wia jan pe nii-la sii ko la Tiina Wia doluŋ le.' "

## 24

*Yesu bul Wia-dia ŋmolonun wiaa*

*Maak 13.1-2; Luuk 21.5-6*

<sup>1</sup> Nii ne Yesu sii lii Wia-dia-la le a viiri. Nii ne u haritooro ko a bula pu duu bee na Wia-dia-la si zomo nii, u jan kala ma saa zomo nii ne.

<sup>2</sup> Nii ne Yesu si, "Oo, ma bee na u si zomo nii ne. Wutitii, mi bulaa pima, ba jan nmoo jan-la kala lo. Ba bi jan leŋ di tiebii-bala ma ka dan u dono le."

*Dogisuŋ ari wiwalimaa.*

*Maak 13.3-13; Luuk 21.7-19*

<sup>3</sup> Nii ne Yesu mu hoŋ Oliv peel-la nyuŋ. U haritooro luora ko u teen a bira piesu a bul, "Bua bee le ne wiaa deenba jan naa? Bee kiaa ne la jan na a jin bua-la le ŋ si jan ko, ari bua-la le dunia si jan dere?"

<sup>4</sup> Nii ne Yesu bula piba a bul, "Ma ken ma titia woruŋ di nuu-kala sima nyisu.

<sup>5</sup> Niaa jan yuge a ko a joŋ mi yirin he ari ba ne naa Kirisito, a nyise niaa yuge.

<sup>6</sup> Ma jaŋ nii ari laaliŋ he daha a he di-bolii. Di ma ne ku nii nii, ma sí leŋe di ma boye joŋ. Wiaa deenba kala jaŋ ŋaa bal, ama dunia dideriŋ ha dee nii.

<sup>7</sup> Tinteen doŋo niaa jaŋ sii a mu a yuo tinteen doŋo niaa. Taŋ kuoro ari u niaa jaŋ sii giri a mu yuo kuoro doŋo ari u niaa. Losuŋ ma jaŋ juu. Tinteen jaŋ zigili leree yuge.

<sup>8</sup> Heeŋ di-suomuŋ ne ŋla.

<sup>9</sup> Ba jaŋ keŋema a joŋma he niaa nisiŋ le di ba doŋisema aŋ kpu ma doŋsuŋ.

<sup>10</sup> Tintee doŋsuŋ niaa kala jaŋ beŋema a tin mi wiaa. Bua-la le niaa jaŋ yuge a joŋ ba yarida ta, ba jaŋ joŋ doŋo yiyalle, a beŋe doŋo maa.

<sup>11</sup> Nialiŋ si nyia wiaa a bul di baa bul wiaa, Wia Diŋ-zoŋ-la doluŋ le, ba jaŋ yuge a ko a nyise niaa yuge.

<sup>12</sup> Wu-boŋŋoo jaŋ purike. A tin nii wiaa niaa fa si cho niaa nii, ba chonu-la jaŋ deŋe.

<sup>13</sup> Ama nii-la kala si nyalime a mu deŋe, Wia jaŋ laau ta.

<sup>14</sup> Ba jaŋ laa sipaan bul Wia wu-zomo-la a tige Wia kuorii-la le lee-na kala di dunia nuu-kala nii, ka di dunia dideriŋ-na yi.

*Yesu bul wiaa a tige ku-loru-la si jaŋ he dime  
Maak 13.14-23; Luuk 21.20-24*

<sup>15</sup> Ma jaŋ na ku-loru-la, u wiaa Daniel fa si bula. Daniel fa ŋaa nii-la síi bul wiaa, Wia Diŋ-zoŋ-la doluŋ le ne. Ba jaŋ joŋ ku-la bil Wia-dia le, lee-la si bi disinniŋ keŋe (lee-la nii-la si keŋ disinniŋ si bi maga duu mu). Ma nialiŋ si karime wiaa deenba, ma jaŋ jin ba bubuosa.

16 Di ma na nii, má leŋ di nialin si he Judiya le, di ba fá jil peelee nyun a faa.

17 Di nuu ne he u lusun nyun a nii wiaa deenba, di u ne ku tuu, duu sí u dia juu a chiche duu paa u kiaa dia le.

18 Di nuu-kala ne he u baga le a nii wiaa deenba, duu sí miira mu dia a chiche duu paa u gennin.

19 Nialin si keŋ luoroo ari nialin si noge biirin, oi, ba jan na heen worun.

20 Má sul Wia di wiin deen sí yibiinin koo che-wiesin ŋaa.

21 Wia si ŋaa dunia a kuu lii jinin, nuu-kala ha bi hee-yiri deen na a nage nii, ba bira bi jan na heen nii a kaa mu wuu.

22 Di Wia fa bi tapulia-la kere ta, ni-bala ma fa bi jan ka. Ama nialin Wia si liisa di baa tou, ba wiaa ne tii u keru tapulia-la ta.

23 Di nuu-kala ne bula pin di ŋ beŋ daha a na Kirisito-la, koo di ŋ beŋ dime a nau, síu yarida ŋaa.

24 Niaa donsun jan sii fugo bul di ba ne ŋaa Kirisito, nii-la Wia si liisa. Donsun ma jan sii fugo bul di ba ŋaa nialin síi bul wiaa, Wia Din-zon-la dolun le ne. Ba jan ŋaa wu-magilaa ari wu-kpunƙperisin kala a chiche di ba nyise nialin Wia si liisa di baa toba.

25 Wiaa deenba kala mi laa sipaan bula pima ne, ka di bua-la-na yi.

26 Má bee na, di niaa ne bula pima ari nii-la Wia si liisa ne he giri-bine tuon, ma sí dime mu, koo di ba ne bula pima ari u ne faa daha, ma sí laa dii,

<sup>27</sup> бее wiaa bua-la ɛ mi-na Nuhuobiine Bie si jaŋ miira kɔ, u jaŋ nage duonuŋ si ligisa, pulumuŋ chaane wia nyuŋ ɲii a lii wii-pɔsuŋ a tuu wii-juuluŋ.

<sup>28</sup> Lee-la kala ku-pua si pina, duunoo ma yie hihilimi ne.”

*Nuhuobiine Bie kɔɔnuŋ wiaa  
Maak 13.24-27; Luuk 21.25-28*

<sup>29</sup> ɲii ne Yesu bira bula piba a bul, “Tapulia-la heeŋ deen si jaŋ deɛɛ, u bira bi jaŋ dieni, di taŋ ne pula maa, lerin jaŋ biri, chene ma bira bi jaŋ pɔse. Cheŋwulaa jaŋ lii wia nyuŋ ku tuu titel. Ba jaŋ kiri wia nyuŋ kialin kala si keŋ doluŋ di ba lii ba leree.

<sup>30</sup> ɲii ne ma jaŋ na mi-na Nuhuobiine Bie magilin wia nyuŋ. Di dunia niaa ne nau, ba kala jaŋ yel. ɲii ɛ ne ma jaŋ na mi-na Nuhuobiine Bie, di mi to duonɓilinbaanaa tuon ku tuu. Mi jaŋ keŋ doluŋ yuge a chaane.

<sup>31</sup> ɲii ne ba jaŋ ɲmuu nyil-balin, a tin Wia tinɗaaraa di ba mu dunia seme-na kala a keŋ nialin kala Wia si liisa di baa tou a hilimi.

*Yesu bul tutogo wiaa  
Maak 13.28-31; Luuk 21.29-33*

<sup>32</sup> Di ma na sojaamin ne kuu tose, ma jima ari linɓana yie ne.

<sup>33</sup> Namaga deen dagema wu-jimin ne. Di ma na wiaa deenba kala di baa ɲaa, ma jin di mi-na Nuhuobiine Bie kpaga ne.

<sup>34</sup> Wutitii mi bulaa pima, ma leele niaa deenba si he miisin ɛ bi jaŋ suu, ka wiaa deenba ɲaa bal.

<sup>35</sup> Wia nyun ari tinteen kala jan dɛrɛ, ama wialin mi si bula bi jan lɛl.

*Yesu bul duu jan kɔ bua-la ɛ la si buu yielɛ  
Maak 13.32-37; Luuk 17.26-30, 34-36*

<sup>36</sup> Ama nuu-kala bi jan jin chɛɛ-la wiaa deenba si jan ɲaa. Wia tinɲaaraa si hɛ Wia-jan ma paala bi jan jin, see mi Nyimma dunɲa.

<sup>37</sup> Bua-la ɛ mi-na Nuhuobiine Bie si jan miira kɔ, u jan nage bua-la ɛ Nowa fa si hɛ u miisin ɛ nɛ.

<sup>38</sup> Ka di duonun nii a su dunia, nialin dii kudiilee a nyunyua sinin. Baalaa ari haalaa ma jijaa dɔɲɔ a mu yi tapulii-la Nowa fa si juu liin daboro-la tuɔɲ.

<sup>39</sup> Ba fa bi jin wii-la kala si ɲaa see bua-la ɛ lii-la si ku pelle paa ba kala, ba suu. Nii titia nɛ jan ɲaa bua-la ɛ mi-na Nuhuobiine Bie si jan kɔ.

<sup>40</sup> Bua-la ɛ baalaa balia jan pipɛrɛ бага ɛ. Wia jan jon dɔɲɔ an len dɔɲɔ ta.

<sup>41</sup> Haalaa balia ma jan nunɔɲ munun nɔmun ɛ. Wia jan jon dɔɲɔ an len dɔɲɔ ta.

<sup>42</sup> Má saa keɲ ma titia worun, bɛɛ wiaa ma bi jin tapulii-la ma Tiina si jan kɔ.

<sup>43</sup> Di nuu nɛ fa jin bua-la ɛ gaara si jan ku gaa u kiaa u dia ɛ, u fa jan honɔ pɔ u dia. U fa bi jan pin don. U jan wei a pɔ di gaaru-la sí ku juu a gaa u kiaa.

<sup>44</sup> Má ma saa ɲaa siri, bɛɛ wiaa mi-na Nuhuobiine Bie jan kɔ bua-la ɛ ma si buu yielɛ.”

*Nii-la si n̄aa tiŋtinni-titii ari nii-la si bi  
tiŋtinni-titii n̄aa*

*Luuk 12.41-48*

<sup>45</sup> Nii n̄e la Tiina Yesu miira pīeseba a bul,  
“Kub̄e n̄e saa n̄aa tiŋtinni-titii-la si j̄iŋ wiaa? U  
n̄e nii-la u kuhian̄ si yie liise duu biben̄ u dia, aŋ  
pe pipi u tiŋtinni-d̄oŋsuŋ ma kudiilee.

<sup>46</sup> Di tiŋtinni-la n̄aa wialin̄ u kuhian̄ si dagu  
duu n̄aa, u tuon̄ jaŋ t̄ore bua-la ɛ u kuhian̄-la si  
jaŋ miira ko.

<sup>47</sup> Wutitii, mi bulaa pima, u kuhian̄-la jaŋ j̄oŋ  
u kiaa kala h̄e tiŋtinna deen̄ nis̄iŋ ɛ duu biben̄.

<sup>48</sup> Ama di tiŋtinni-b̄omo-la n̄e bula pi u titia  
ari u kuhian̄-la jaŋ dieni

<sup>49</sup> aŋ suomo ŋmuŋmoo u tiŋtinni-d̄oŋsu-la,  
baalaa ari haalaa, aŋ faasa didii kudiilee a nyua  
sin̄iŋ bubugi,

<sup>50</sup> duu n̄aa ŋii, u bi siri n̄aa gb̄ere u kuhian̄-la.  
U kuhian̄-la jaŋ ko tapulii-la ɛ u si bi yiela.

<sup>51</sup> U jaŋ d̄ogisu woruŋ aŋ ken̄u kaa mu h̄e  
lee-la kan̄fugi timma-la si h̄e. Lee-la n̄e n̄iaa jaŋ  
yel aŋ didiŋ ba nyilaa.”

## 25

*Yesu mage namaga a tige haalaa fii ɛ*

<sup>1</sup> Nii n̄e Yesu bira mage namaga. U si, “Bua  
kubala ɛ Wia kuorii-la jaŋ nage ŋla: Haalaa fii  
n̄e fa h̄e dime. Ba sii a paa ba chaanaa a mu di  
ba cheŋ ha-falin̄ bala, ha-jaari gbiele-la ɛ.

<sup>2</sup> Haala-la deen̄ba tuon̄ banon̄ yaare, ka  
banon̄ ma keŋ wu-jimin̄.

<sup>3</sup> Banon-la si yaara, ba bi nuun logo kori, di ba chaanaa ne disa, di ba joŋo he.

<sup>4</sup> Ama banon-la si ken wu-jimin, ba loge nuun kori.

<sup>5</sup> Ha-falin bala-la bi lima ko. Ba gberere gberere lol an joŋo pin don.

<sup>6</sup> Tita-siesee niaa yire, 'Ma bee na baal-la ni ko, ma ku lii chemu.'

<sup>7</sup> Nii ne haala-la kala sii a ken ba chaanaa milima ta di ba jil.

<sup>8</sup> Nii ne ni-yaara-la bula pi wu-jinna-la a bul, 'La chaanaa che di ba dise ne, ma pila nuun mua.'

<sup>9</sup> Nii ne wu-jinna-la bula piba a bul, 'Ai, n bi po nuu-la bi jan yi la kala. Ma mu yoo ma titia nuun.'

<sup>10</sup> Nii ne ba mu di ba yoo. Ba si mua di ba yoo nuu-la, ha-falin bala-la ko. Haala-la banon fa si na siri, ba to u hariŋ a juu ha-jaari gbiele-la lerin, ka ba ken boin to.

<sup>11</sup> U nii hariŋ le haalaa banon-la ku-kaanaa ma ko a bul, 'La Tiina, la Tiina, ken boro suro pila.'

<sup>12</sup> Nii ne u bul, 'Wutitii, mi bulaa pima, mi bima jin.'

<sup>13</sup> Nii wiaa ma po ma titia le worun. Ma bi jin tapulii-la la Tiina Yesu si jan ko."

*Yesu mage namaga a tige tintinnaa batori le.*

*Luuk 19.11-27*

<sup>14</sup> Nii ne Yesu bira mage namaga a tige Wia kuorii-la le. U si, "Bua kubala le Wia kuorii-la jan nage baal kubala si ken u tintinnaa ne. Tapulii kubala u sii duu ven wonbiin. Nii ne u

yire u tiŋtinna-la ba kɔ. U joŋ u kiaa he ba nisin le di ba biben.

<sup>15</sup> U ken kialiŋ kaa kpaaba nii nuu-kala si wuo biben. U joŋ siidi bui zo-balia a pi doŋo duu biben, a joŋ siidi bui mahin banese a pi doŋo maa an joŋ siidi bui mahin balia a pi doŋo-la maa. Nii ne ka u ven u wonbii-la.

<sup>16</sup> Tiŋtinni-la si laa siidi bui zo-balia-la, u kaa mu a yoo kiaa a yalle a na siidi bui zo-balia nyuurun.

<sup>17</sup> Tiŋtinni-la ma si laa siidi bui mahin banese-la, u ma ken u kiaa bibirimɛ, a ma na siidi bui mahin banese nyuurun.

<sup>18</sup> Ama tiŋtinni-la si laa siidi bui mahin balia-la, u-na kaa mu lu bua a joŋ moribie-la a hugi.

<sup>19</sup> U diene worun, ka tiŋtinna-la batori kuhian-la kɔ a yireba duu na ba kuŋ-kala si na nyuurun mage nii.

<sup>20</sup> Tiŋtinni-la si laa siidi bui zo-balia-la ken u kiaa ku juu an bula pi u kuhian a bul, 'N pimi siidi bui zo-balia ne, mi ma na siidi bui zo-balia ne pe.'

<sup>21</sup> Nii ne u kuhian-la bula pu a bul, 'N ŋaa tiŋtinni-titii ne. N he dolun ne a wuo ben kubii-bie-la nyun worun, mi jan len di n biben ku-kenɛɛ. Ku juu di la di n kala ninii sima.'

<sup>22</sup> Nii ne tiŋtinni-la ma si laa siidi bui mahin banese-la ma ken u kiaa kaa ku juu a bula pi u kuhian a bul, 'N pimi siidi bui mahin banese ne. Mi ma na siidi bui mahin banese ne a pe.'

<sup>23</sup> Nii ne u bula pu maa, 'N ma ŋaa tiŋtinni-titii ne, n ma he dolun ne a wuo ben

kubii-bie-la nyuŋ woruŋ, mi ma jaŋ leŋ di ɲ bibenŋ ku-kenɛɛ. Ku juu di la di ɲ kala nii sima.'

<sup>24</sup> Nii nɛ tiŋtinni-la u si joŋ siidi bui mahiŋ balia pa, u ma ku juu a bul, 'Mi kuhianŋ, mi jima ari ɲ ɲaa ni-tere nɛ, ɲ yie kukuŋ kialinŋ ɲ si bi duo nɛ aŋ pipaa kialinŋ lee-la ɲ si bi tima.

<sup>25</sup> Nii nɛ tii mi fifaŋ a joŋ moribie-la a hugi tiŋteenŋ di ɲ kɔ. Laa ɲ moribiee.'

<sup>26</sup> Nii nɛ u kuhianŋ-la bula pu a bul, 'N ɲaa tiŋtinni-bɔŋ nɛ a kenŋ yariwiinŋ. N jima ari mi yie kukuŋ kialinŋ mi si bi duo nɛ a paa kiaa lee-la mi si bi tima.

<sup>27</sup> N si jinŋ ɲla lɛ, u fa maga di ɲ joŋ mi moribiee bil lee-la ba sii bil moribiee nɛ. Mi fa si miira kɔ ɲla, mi fa jaŋ laa moribie-la ari mi nyuuruŋ kala.

<sup>28</sup> Nii-na má laa moribie-la u teenŋ a joŋo pi nii-la si kenŋ siidi bui zɔ-banɛɛ-la.' "

<sup>29</sup> Nii nɛ Yesu bula piba a bul, "Nii-la si paala kenŋ kiaa yuge nɛ, Wia jaŋ wasa che a pe pu duu kaa yuge kinŋkenŋ, ama nii-la si bi faasa kenŋ kiaa yuge, muapilii-la ma u si kenɛ, Wia jaŋ kaa laa u teenŋ.

<sup>30</sup> Má kenŋ tiŋtinni-bɔmɔ-la a joŋu yuo ta birimiŋ tuɔŋ. Lee-la nɛ nialinŋ jaŋ yel aŋ didinŋ ba nyilaa.

### *Sariya che-diili-la si jaŋ yi*

<sup>31</sup> Di mi-na Nuhuobiine Bie nɛ dii mi kuoruŋ a kɔ, mi di Wia tiŋdaaraa kala jaŋ kɔ. Nii nɛ mi jaŋ hoŋ mi kuori-kpasa nyuŋ a chaanɛ.

<sup>32</sup> Dunia nuu-kala jaŋ ku hilimi mi sipaanŋ. Mi jaŋ keŋba kaa kpa a leree balia, ari pie-daara si yie keŋ u piesee pɔɔɛ buunaa le ŋii.

<sup>33</sup> Mi jaŋ len di tuɔ-pul tiŋŋaa chin mi na-diin, ka di tuɔ-bɔŋ tiŋŋaa ma chin mi na-gua.

<sup>34</sup> Ŋii ne kuoro jaŋ bula pi nialin si chin u na-diin a bul, 'Má kɔ. Mi Nyimma Wia ne pema le. Má ku dii Wia kuorii-la ba si wasa bilma le dunia di-suomun.

<sup>35</sup> Bɛɛ wiaa, bua-la le losun fa si keŋmi, ma ŋaa kudiilee pimi mi dii, bua-la le lii-nyuasun ma fa si keŋmi, ma ŋaa liin pimi mi nyua ne. Bua-la le mi fa si ŋaa nuhuɔru, ma keŋmi worun ne.

<sup>36</sup> Bua-la le mi fa keŋ yaribiree ne, ma jon gerin laalemi. Bua-la le mi fa sí wiilu, ma beŋ mi nyun ne, bua-la le ba si keŋmi to dia, ma ku nami ne.'

<sup>37</sup> Tuɔ-pul timma-la jaŋ piesemi a bul, 'La Tiina, che bɛɛ ne la nan di losun kenin la jon kudiilee pin, che bɛɛ ne lii-nyuasun kenin la ŋaa liin pin?

<sup>38</sup> Che bɛɛ ne la nan di ŋ ŋaa nuhuɔru la kenin worun, koo che bɛɛ ne la ma nan di ŋ keŋ yaribiree la jon gerin laalin?

<sup>39</sup> Che bɛɛ ma ne la nan di ŋ wiilu, koo di ba kenin to dia la ku nan?'

<sup>40</sup> Kuoru-la jaŋ bula piba a bul, 'Wutitii ne mi bulaa pima, bua-la kala le ma si ŋaa wu-zomun a pi mi naanbiirin deenba tuɔŋ nii-la si bi lee kene, ma ŋaa ŋii pimi ne.'

<sup>41</sup> Ŋii ne u jaŋ bula pi nialin si he u na-gua a bul, 'Má surise mi seme, Wia via ma wiaa ne.

Má mu a juu nyiŋ-la si bi dise. Wia he nyiŋ-la bil Sitaani ari u tinɗaara-la ne di ba ku juu.

<sup>42</sup> Bɛɛ wiaa bua-la ɛ losuŋ fa si keŋmi, ma bi kudiilee ŋaa pimi, bua-la lii-nyuasun fa si keŋmi, ma bi liiŋ ŋaa pimi.

<sup>43</sup> Bua-la ɛ mi fa si ŋaa nuhuɔru, ma bimi keɛ woruŋ. Bua-la ɛ mi fa si keŋ yaribiree maa, ma bi gerin joŋo laalemi. Bua-la ɛ mi fa sii wiilu maa, ma bi ku nami. Bua-la ɛ ba si keŋmi to dia maa, ma bi ku nami.'

<sup>44</sup> Nii ne ba jaŋ piɛɛ kuoru-la a bul, 'La Tiina, che bɛɛ ne losuŋ keŋin koo lii-nyuasun keŋin koo ŋ fa ŋaa nuhuɔru koo, ŋ fa keŋ yaribiree koo, ŋ fa wiilu koo, ba keŋin to dia aŋ ka la bi ŋ ɛ pe?'

<sup>45</sup> Kuoru-la jaŋ bul, 'Wutitii ne, bua-la kala ɛ ma si via di ma pe nii-la si bi lee keɛ mi niaa tuuŋ, ma via di ma pemi ma ɛ ne ŋii.'

<sup>46</sup> Nii ne ba jaŋ juu lee-la heɛ-la si bi deɛ, aŋ ka di tuɔ-pul tinŋaa ma juu lee-la miisi-la si bi deɛ."

## 26

*Ba vuura di ba kpu Yesu  
Maak 14.1-2; Luuk 22.1-2; Jɔɔŋ 11.45-53*

<sup>1</sup> Yesu si dage niaa deɛ, u bula pi u haritooro a bul, "Ma jima,

<sup>2</sup> tapulaa balia ne ka, ka di diisin kieliŋ gbiele-la yi. Bua-la ɛ ba jaŋ keŋ mi-na Nuhuobiine Bie a jonmi he niaa nisin ɛ di ba kpaasemi daa-geɛɛ nyuŋ."

<sup>3</sup> Nii ne nialin si kpu pusun pipi Wia kuhiasin ari Juu tinnaa kuhiasin, ba hilimi Kayafas dia le. Bua-la le u fa naa nii-la si kpu pusun pipi Wia kuhian ne.

<sup>4</sup> Ba hilimi a vuvuure ba si jan to wonbii-la a luora ken Yesu a kpu.

<sup>5</sup> Ama ba bul di ba siu ken ba che-bal-la, di ba ne naa nii, niaa jan naa taawei.

### *Ba ken nuun tise Yesu*

#### *Maak 14.3-9; Jɔɔɔ 12.1-8*

<sup>6</sup> Yesu fa si he Betani le nii, u mu hon baal kubala dia le baa yire Saamon. Saamon fa naa gbege ne an duori.

<sup>7</sup> Yesu fa si dii kiaa Saamon dia le, haal kubala ko u teen a ken tulaali ari lon a jonjo bise he u nyun le. Tulaalii-la yallin heyɛ.

<sup>8</sup> U haritooro-la si na nii, ba baani sii. Ba gurima pipiese donjo a bul, "Bee ne tii haala deen ken nuu-la kaa chei na?"

<sup>9</sup> Ba fa jan wuo jon tulaalii-la a yalle a na moribee yuge a jonjo pi summoo."

<sup>10</sup> Ama Yesu fa jin wii-la ba sii bul. Nii ne u pieseba a bul, "Bee ne tii ma wiwalime haala deen? Wu-zon ne u naami le.

<sup>11</sup> Ma di summoo jan he dime bua-na kala le, ama la di ma bi jan he dime deen deen.

<sup>12</sup> U bise tulaalii-la hemi le a naa siri di mi ne suba, di ba jonmi hugi.

<sup>13</sup> Wutitii ne mi bulaa pima, dunia seme-na kala ba si jan wuo mu a bul Wia wu-zomɔ-la, ba jan liisi haala deen ma wiaa a bul."

*Judas seye duu jon Yesu yalle  
Maak 14.10-11; Luuk 22.3-6*

<sup>14</sup> Nii ne Yesu haritooro-la fii ari balia donjo mu nialin si kpu pusun pipi Wia kuhiasin teenj. U yirin ne fa Judas Isikarot. U pieseba a bul,

<sup>15</sup> “Di mi ne ken Yesu yalle a pima, bee ne ma jan pimi?” Nii ne ba diise moribii-biin mara ari fii a jonjo pu.

<sup>16</sup> A chin bua-la le Judas suomo chiche wonbii-la u si jan to a ken Yesu yalle a piba.

*Yesu ari u haritooroo dii diisin kielin gbiele-la  
kudiilee*

*Maak 14.12-21; Luuk 22.7-13, 21-23; Jooj  
13.21-30*

<sup>17</sup> Gbiele-la le ba si yie dii boroboro-la si bi si-burun kenε, ba che-bunbun, Yesu haritooro ko u teenj a piesu a bul, “Nii ne η cho di la mu ηaa diisin kielin gbiele-la kudiilee di η ku dii?”

<sup>18</sup> Nii ne Yesu bula piba a bul, “Ma mu juu tan-la tuonj. Ma mu baal kubala teenj. Ma mu bula pu a bul, ‘La kuhian si, bua-la le u sii che di ba di u haritooroo dii diisin kielin gbiele-la kudiilee yie ne, laa che di la dii kia-la η dia le ne.’ ”

<sup>19</sup> Nii ne Yesu haritooro-la ηaa nii ari Yesu si dageba a ηaa diisin kielin gbiele-la kudiilee ba dii.

<sup>20</sup> Wia si jua, Yesu ari u haritooro-la fii ari balia-la ku juu honj a didii kudiile-la.

<sup>21</sup> Ba sii dii kiasa nii, nii ne Yesu bula piba a bul, “Wutitii ne mi bulaa pima, ma donjo jan jonmi yalle.”

<sup>22</sup> Nii ne u haritooro-la tuonj chei. Ba suomo pipiesu, kunj kunj. Donjo yie piese, “Mi Tiina, mi nee?”

<sup>23</sup> Nii ne Yesu bula piba a bul, “La di nii-la si chala kenj boroboro tuu yuu gbanja tuonj ne jan jonmi yalle.

<sup>24</sup> Mi-na Nuhuobiine Bie jan suu ari ba si nmunse nii a tigemi le. Ama nii-la si jan jon mi-na Nuhuobiine Bie yalle, aa, u jan na heen yuge. Ba fa si buu lula ne kpia.”

<sup>25</sup> Nii ne Judas zenbe tiina-la piese Yesu a bul, “Mi ne n didagee?” Nii ne Yesu bula pu a bul, “Oo, n ne.”

*Kudiile-la Yesu si si di ba dii a liliisi u wiaa  
Maak 14.22-26; Luuk 22.14-20; 1 Kor. 11.23-25*

<sup>26</sup> Ba si hono didii kiasa, nii ne Yesu sii a jon boroboro a lolle Wia anj kaa choge choge a jonjo pi u haritooro a bula piba a bul, “Ma laa. Mi yaraa namia ne nii.”

<sup>27</sup> Nii ne u bira jon nyunyuala maa ari sininj. U lolle Wia anj jonjo piba a bul, “Ma kala nyua nyunyual-bala-la tuonj,

<sup>28</sup> bee wiaa mi chalinj ne nii. Chalinj deenj wiaa ne tii Wia ta niinj ma teenj. Mi chalinj jan jaase ni-kene wiaa, di Wia jon ba haacheba cheba.

<sup>29</sup> Mi bulaa pima, mi bira bi jan ko di mi nyua sininj deenj, see tapulii-la mi si jan ko, nii ne mi jan nyua si-falinj mi Nyimma Wia kuorii-la tuonj.”

<sup>30</sup> Nii ne ba yii Wii-chuole yiilinj anj sii lii a mu peel kubala baa yire Oliv.

<sup>31</sup> Nii ne Yesu bula piba a bul, “Titanin deen titia ma kala jan fá viiri a tin mi wiaa. Ba nmunse Wia tenin tuon di ba jan kpu pie-daara an ka piesee fá pise.

<sup>32</sup> Ama Wia jan chisemi suun le. U ne chisemi, mi jan laa ma sipaan a mu Galilii.”

*Yesu bula pi Piita ari u jan bul u buu jin.*

*Maak 14.27-31; Luuk 22.31-34; Joon 13.36-38*

<sup>33</sup> Nii ne Piita bula pi Yesu a bul, “Di ba kala fá maa an lenin, mi-na bi jan miire n harin da.”

<sup>34</sup> Nii ne Yesu bula pu a bul, “Wutitii ne, jinin titanin deen n-na Piita, n jan bul naansiin butori ari n bimi jin, ka di ji-bele-na yel.”

<sup>35</sup> Nii ne Piita bula pu a bul, “La din paala susuu maa, mi bi jan bul ari mi bin jin.”  
Ku-kaana-la ma kala bul nii.

*Yesu chuole Wia Getisemani le*

*Maak 14.32-42; Luuk 22.39-46*

<sup>36</sup> Nii ne Yesu ari u haritooro mu juu lee kubala baa yire Getisemani. Yesu bula pi u haritooro di ba hon daha, ka u mu chuole Wia an ko.

<sup>37</sup> U ken Piita ari Zebidii biirin balia a kaa mu dime. U tuon faasa chei worun. U tuon bi pina.

<sup>38</sup> U bula pi u haritooro a bul, “Mi tuon kala ne cheye a mage di mi suu. Má hon di la kala po na.”

<sup>39</sup> Ba hon. Ka u surisa mu sipaan mua a tuu pina chigi tinteen a sul Wia a bul duu ne ken wonbiin, duu sí leje di wii-la juu-u le a bira bul, “Mi Nyimma, di n ní che, liise hee-la sí ko

mi le. Ama mi-na nla tuutoruŋ le dee, η-na tuutoruŋ le ne.”

<sup>40</sup> U chuola dere aŋ sii ko u haritooro teen di ba piŋ doŋ. Nii ne u piɛɛ Piita a bul, “N pina neɛ? N bi doŋ muapilii ma wuo bereɛ a diene yi hawa kubalaa?

<sup>41</sup> Má chuole Wia a pupo di Sitaani sí wuo nyisema. Ma tuon le ma cho di ma ŋaa wu-zoŋŋoo, aŋ ka ma bi doluŋ keɛ.”

<sup>42</sup> U bira mu a chuole Wia liamin le a bira bul,

<sup>43</sup> “Mi Nyimma, di η ne bi sei di η laa heɛŋ deen mi nisin le, leŋ di wii-la η síi che, duu ŋaa.” U miira ko di ba bira piŋ doŋ, beɛ wiaa doŋ keŋba ne woruŋ.

<sup>44</sup> Nii ne Yesu mu chuole Wia torimuŋ le a bira bul nii titia.

<sup>45</sup> Nii ne u miira ko u haritooro teen a piɛɛba, “Ma ha pinaa wiesi neɛ? Má bee na, bua-la yie ne. Ba jaŋ keŋ mi-na, Nuhuobiine Bie a pi haache diiree.

<sup>46</sup> Má sii la mu. Nii-la si jaŋ joŋmi yalle ka ko ne.”

### *Ba keŋ Yesu*

*Maak 14.43-50; Luuk 22.47-53; Joŋ 18.3-12*

<sup>47</sup> Yesu ha bi wiaa bula dere, di Judas níi ko nii. U fa ŋaa Yesu haritooro-la fii ari balia doŋo ne. Niaa yuge a tuto u hariŋ. Doŋsuŋ kori tokobiee ari taŋgulo. Nialin si kpu pusun pipi Wia kuhiasin ari ba taŋ kuhiasin ne tinba, ba ko.

<sup>48</sup> Zenbe tiina-la fa pi nialin magil ne a bul, “Nii-la mi si mu guori, u ne nii. Má kenu.”

<sup>49</sup> Nii ne Judas venj tegi a mu Yesu teenj a bula pu, “Mi kuhian, mii chuɔɔɔɔ”, aɲ guoru.

<sup>50</sup> Nii ne Yesu bula pu a bul, “Mi nanɔɔɔɔ, beɛ ne tii ɲ he daha?” Nii ne ba kala guriku a kenu.

<sup>51</sup> Yesu haritooro-la dɔɔɔ liise u tokobii a ta nuu digilinj keri. Nii-la fa ɲaa nialinj si kpu pusunj pipi Wia kuhianj dia-yomo ne.

<sup>52</sup> Nii ne Yesu bula pu a bul, “Jonj ɲ tokobii a he u di-heɛlinj. Nii-la si liise tokobii, tokobii ne ba janj kaa kpuu.

<sup>53</sup> ɲ bi jinj ari mi fa janj wuo yire mi Nyimma duu pemi leɛ? Di mi ne fa yiru, u fa janj ta u tinɔaraa bui buiba di ba ku pemi le.

<sup>54</sup> Ama duu ne fa saa ɲaa ɲii, eɛ ne wialinj ba fa si ɲmunsa Wia teninj tuɔɔɔ janj ku ɲaa wutitiiba?”

<sup>55</sup> Nii ne Yesu piɛɛ ni-dan-la a bul, “Mi ɲaa gaaru neɛ? Ma si kenj tokobieɛ ari tanguloo a kuko di ma kenmii? Ma na tapulii-na kala la di ma ne yie hoɔ Wia-dia le mi didage wiaa a pipima. Aɲ ka ma bi walima di ma kenmi dime.

<sup>56</sup> Ama wiinj deenj kala ɲaa di wialinj nialinj fa si bula, Wia Diɲ-zɔɔɔ-la dolunj le ku ɲaa wutitii.” Nii ne Yesu haritooro-la kala viau aɲ fá.

*Yesu chinj nialinj si hilime vuvuure wiaa sipaan  
Maak 14.53-65; Luuk 22.54-55, 63-71; Joɔɔɔ  
18.13-14, 19-24*

<sup>57</sup> Nii ne nialinj si kenj Yesu, ba kenu kaa mu Kayafas dia. U ne fa ɲaa nialinj si kpu pusunj pipi Wia kuhianj. Di Wia teninj kerichiba ari ba taɲ kuhiasinj kala hilimi dime.

58 Piita daa tuto ba hariŋ a to juu nialin si kpu pusun pipi Wia kuhian kaala. U juu kaala-la a mu hoŋ nialin sii pɔ kaala-la teen duu na wii-la si jaŋ ŋaa Yesu le.

59 Nii ne nialin si kpu pusun pipi Wia kuhian ari nialin kala si yie hilime vuvuure wiaa chiche di ba nyia wiaa a tige Yesu le di ba kpuu. Ba che che wii ka.

60 Niaa paala yuge ne a ku nyia wiaa pu, ama ba fa bi wuo na wii-kala u si ŋaa chei.

61 Nii ne niaa balia ku lii a bul, “Baala deen, u si u jaŋ wuo ŋmoo Wia-dia-la lo aŋ bira saau tapulaa batori pege.”

62 Nii ne nialin si kpu pusun pipi Wia kuhian sii chin a piɛɛ Yesu a bul, “N bi nia niaa deenba si bul wialin a tigeŋ leɛ? N-na bi wii keɛɛ ŋ si jaŋ bul?”

63 Yesu tore u niin. Nii ne nialin si kpu pusun pipi Wia kuhian bula pu a bul, “Wia-la si weye yirin le, bula pila, ŋ ne ŋaa Kirisito, nii-la Wia si liisaa? N ne Wia Biee?”

64 Nii ne Yesu bula pu a bul, “Mi-na ne, ama mi bulaa pima kala, a lii bua deen le a kaa mu, ma jaŋ na mi-na Nuhuobiine Bie di mi hoŋ Wia seme, ni-duon di-honun a to duonbilingbaanaa tuon ku tuu.”

65 Yesu si bul nii, nialin si kpu pusun pipi Wia kuhian ken u gennin kiese aŋ bul, “N chei Wia yirin. U bi maga di la bira che danjiaba. Ma kala bi nia u si chei Wia yirin nii?”

66 Beɛ ne ma biine?” Nii ne ba bul, “U cheye ne. U maga di ba kpuu ne.”

<sup>67</sup> Nii ne ba tu nanṭuorun he u siaa le a ṅmobu. Nialin dorṣun sii ṅmobu ṅla ne, ba bula pu a bul,

<sup>68</sup> “ṅ-na Kirisito, nii-la sii bul wiaa, Wia Din-zon-la dolun le, dage nii-la si ṅmobun.”

*Piita si u bi Yesu jin*

*Maak 14.66-72; Luuk 22.56-62; Joon 18.15-18, 25-27*

<sup>69</sup> Piita si hon kaala-la le, nii ne nialin si kpu pusun pipi Wia kuhian dia tintinni-tolo kubala ku lii a bul, “ṅ ma faa to Yesu harin ne, baal-la si lii Galili.”

<sup>70</sup> Nii ne Piita nyia wiaa a bul ba kala nii, “Mi bi Yesu jin. Mi bi wii-la ṅ si paala bubul jin,” an sii lii chin zawura tuon.

<sup>71</sup> Piita si chin dime, nii ne tintinni-tolo don ma bira nau a bula pi nialin si china kpagu a bul, “Baala deen ma ṅaa Yesu si lii Nazaret haritooro-la don ne.”

<sup>72</sup> Piita bira nyia wiaa an ṅmiesa bul duu dee.

<sup>73</sup> Muasuaa nialin si chin dime ma bula pu a bul, “Wutitii ne, ṅ ma ṅaa ba don ne, ṅ yiikoro ne dage nii.”

<sup>74</sup> Nii ne Piita ṅmiese a bul, “Mi bi baala deen jin.” U si bul nii dere di ji-bele yele.

<sup>75</sup> Nii ne Piita liisi wii-la Yesu si bula pu ari u jan nyia wiaa a pu naansiin butori, nii ne u lii a faasa yel.

## 27

*Ba keṅ Yesu mu Paalit teen*

*Maak 15.1; Luuk 23.1-2; Joon 18.28-32*

<sup>1</sup> Taŋ-pul nialin si kpu pusun pipi Wia kuhiasin kala ari Juu tinŋaa kuhiasin hilimi a vuure. Ba kala vuura di ba kpu Yesu.

<sup>2</sup> Ba kenu a vɔbu a kenu kaa mu Paalit teen. U ne fa hon Rom kuori-balin nyun Judiya tinteen le.

### *Judas suba*

#### *Yesu nanz. tinŋinŋaa 1.18-19*

<sup>3</sup> Judas zenbe tiina-la si nia di baa che di ba kpu Yesu ne, u tuon chei ari u si yalle Yesu nii. U miira ken moribii-biin mara ari fii a kaa mu nialin si kpu pusun pipi Wia kuhiasin ari Juu tinŋaa kuhiasi-la teen a bul,

<sup>4</sup> “Mi ŋaa haache ne. Mi jon nii-la si bi wii cheye yalle di ba kpuu.” Nii ne nialin bul di ba sipaa kala tuo dime. Di u wii ne.

<sup>5</sup> Nii ne Judas jon moribie-la a yuo ta Wia-dia tinteen an lii a mu yuo nmenin.

<sup>6</sup> Nialin si kpu pusun pipi Wia kuhiasin paa moribie-la an bul, “Chalin moribiee ne ŋla. La kisin ne la jonba he Wia-dia moribiee le.”

<sup>7</sup> Nii ne ba vuure di ba jin wii-la ba si jan jon moribie-la a ŋaa. Ba jon moribie-la yoo tinteen. Lee-la ne ba huhugi nuhucraa. Ba laa tintee-la yoo pupoi-meere teen ne.

<sup>8</sup> Nii ne ba ken lee-la yiyire chalin tinteen ari jinin kala.

<sup>9</sup> Ba si ŋaa nii, wialin Jerimaya fa si bul, Wia Din-zon-la dolun le ku ŋaa wutitii. U fa si, “Iziral doho niaa donsun sei di ba tin moribii-biin mara ari fii an ken Wia Tuɔ-pul Tiina-la.

10 Ba jon moribie-la ba si miira laa  
a yoo tinteen pupoi-meere teen.  
Mi Tiina Wia ne fa bula di mi naa nii.”

*Paalit piessu Yesu wiaa*

*Maak 15.2-5; Luuk 23.3-5; Jooη 18.33-38*

11 Yesu si chin nii-la si hon kuori-balin nyun sipaan Judiya tinteen le, nii ne kuoru-la piessu a bul, “N ne naa Juu tinnaa kuoro koo?” Nii ne Yesu bula pu a bul, “Oo, mi ne.”

12 Ama nialin fa si kpu pusun pipi Wia kuhiasin ari Juu tinnaa kuhiasin si jon cheerin pu nii, u bi wii bula.

13 Nii ne Paalit piessu, “N bi wiaa deenba kala nia ba si bula a tigen le?”

14 Ama Yesu bi u niin suro, u bi wu-bala ma bula. Wii-la kperi Paalit worun.

*Ba si di ba kpu Yesu*

*Maak 15.6-15; Luuk 23.13-25; Jooη 18.39-19.16*

15 Di diisin kielin gbiele ne yie-na kala, Paalit fa yie len ba liise nialin ba si kaa to dia dono ne, nii-la niaa si cho.

16 Bua-la le di ba ken baal kubala baa yire Barabas a to dia.

17 Ni-dan-la si hilime, nii ne Paalit piessu, “Ni-bee ne ma cho di mi liisa pima? Barabas koo Kirisito, nii-la Wia si liisaa?”

18 Paalit fa jima worun ari Juu tinnaa kuhiasin yaraa faa bieru ne, nii ne tii ba ken Yesu kaa ko u teen.

19 Paalit fa si hon sariya didiilin nii, u haala tin tin daarin a len di ba bula pu a bul, “Si baala deen wii-kala naa. U naa tuo-pul tiina ne.

Di aminj titaninj mi duosi wiaa a tigeu le ne. U wiaa wiimi woruj ne.”

<sup>20</sup> Nii ne nialinj si kpu pusuj pipi Wia kuhiasinj ari juu tinjaa kuhiasi-la nyise ni-danj-la he di ba bul di Paalit liise Barabas ta anj ka di ba kpu Yesu.

<sup>21</sup> Nii ne Paalit piese ni-danj-la a bul, “Niaa deenba bali aminj tuonj, kubee ne ma che di mi liisa pima?” Nii ne ba bul, “Barabas!”

<sup>22</sup> Nii ne Paalit piese nialinj a bul, “Anj ka Yesu ba sii yiru Kirisito, bee ne ma si mi kenu kaa njaa?” Nii ne ba kala bul, “Lenj di ba kenu kpaasa mere daa-gesee nyuj.”

<sup>23</sup> Nii ne Paalit pieseba a bul, “Wu-bonj bee ne u njaa?” Nii ne ba kpia a kii bunbun-la a bul, “Lenj di ba kenu kpaase daa-gesee nyuj.”

<sup>24</sup> Nii ne Paalit na ari gonj-la yuga kinkenj, ari yuosuj jan juu. Nii wiaa u bi wii-kala wuo njaa. Di liinj chinj u seme. U njaa a sonj u nisaa nialinj sipaanj anj bul, “Mi sipaa tuo baala deenj suunuj le. U he ma teenj.”

<sup>25</sup> Nii ne ni-danj-la kala bul, “Di la ne cheye wiinj deenj le, lenj di Wia dogisela ari la biirinj a tinj la si kpuu.”

<sup>26</sup> Nii ne Paalit liise Barabas ta a piba anj njaa ba viire Yesu anj jonj piba di ba kaa mu kpaasa mere daa-gesee nyuj.

*Laali-yuoroo mɔŋ Yesu le  
Maak 15.16-20; Jɔɔŋ 19.2-3*

<sup>27</sup> Nii ne Paalit laali-yuoroo donsunj kenj Yesu kaa juu Paalit dia kaala tuonj. Laali-yuoro-la ku-kaanaa kala ma ku peba le a hilimi.

28 Ba wuri Yesu genninƙa kala aƙa jona ƙeri-fian laalu

29 a che sɔsun a kaa sua nyun-chuulo a nage kuoro nyun-chuulo a jona chuu a jona daantiga he u na-diin le aƙa tuu kpirimi u sipaan a momu le a bul, "Juu tinnaa kuoro, laa chuolun."

30 Ba tu nanturun a heu le a laa daa-la a nmoo u nyun le.

31 Ba si momu le dere, ba wuri ƙeri-fian-la aƙa paa u titia genninƙa laalu aƙa kenu kaa lii wonbiin di ba kpaasu mere daa-geese nyun.

*Ba kpaase Yesu daa-geese nyun*

*Maak 15.21-32; Luuk 23.26-43; Jɔɔɔ 19.17-27*

32 Ba si kenu kaa lili di ba kpaasu daa-geese nyun nii, ba cheƙa baal kubala baa yiru Saamon. U jana yirin ne Sariini. Nii ne laali-yuoro-la fugu u laa Yesu daa-geese-la a baase.

33 Nii ne ba ku yi lee kubala baa yire Goligota. Yiri-la bubun ne nyu-kunkogulo.

34 Ba si yi dime, ba jona sinin a guoli ku-harin le a jona pi Yesu duu nyua. U si lenne di u heye, u via.

35 Nii ne ba kpaasu mere daa-geese nyun aƙa tonse Yesu genninƙa wiaa, di ba paa kpa dɔɔɔ a jin ƙeri be ne nuu-kala jan laa.

36 Nii ne ba hon dime a bibenu.

37 Ba si si Yesu naa walin chei, ba nmunsa he daa-geese-la le a bul, "Juu tinnaa kuoro Yesu ne na." "

38 Nii ne ba kpaase gaaraa balia ma a pe Yesu le. Dɔɔɔ he u na-diin, dɔɔɔ ma he u na-gua.

<sup>39</sup> Ba si kpaasu mɛrɛ daa-gɛsɛ-la nyun̄ n̄ii, nialin̄ si to dime bibal, ba tutuusu an̄ ken̄ ba nyun̄ chuchugisi

<sup>40</sup> a bul, “Oi, n̄ nɛ n̄aa nii-la si si n̄ jan̄ n̄moo la Wia-dia lo an̄ bira wuo saau tapulaa batori pɛgɛ. N̄ si n̄aa Wia Bie, lii daa-gɛsɛ-la nyun̄ a laa n̄ titia ta.”

<sup>41</sup> Nialin̄ si kpu pusun̄ pipi Wia kuhiasi-la ari Wia tenin̄ kerichiba ari tan̄-la kuhiasin̄ ma sisieri Yesu lɛ a bula pipi dɔn̄ɔ,

<sup>42</sup> “U wuo niaa laa tita nɛ an̄ bi u titia wuo laa ta. U si si u nɛ n̄aa Kirisito, Juu tin̄naa kuoro, leŋ duu lii daa-gɛsɛ-la nyun̄ ku tuu di la na a laa u wiaa dii.

<sup>43</sup> U laa Wia dii nɛ a bula duu n̄aa Wia Bie nɛ. Tɔɔ, má leŋ di la na di Wia nɛ jan̄ laau ta lɛlɛ.”

<sup>44</sup> Gaara-la balia ma ba si kpaasa a pɛ Yesu lɛ, ba ma tuusu n̄ii titia.

### *Yesu suba*

*Maak 15.33-41; Luuk 23.44-49; Jɔɔŋ 19.28-30*

<sup>45</sup> Wia ku mage nyu-gbaŋa, lerin̄ kala biri lim a mu yi didaanin̄, ka lerin̄ bira pullɛ.

<sup>46</sup> N̄ii nɛ Yesu faasa yirɛ u yiikoro lɛ a bul, “Eloi, Eloi, lama sabakitani.” U bubuɔŋ nɛ: “Mi Tiina Wia, bɛɛ nɛ tii n̄ jon̄mi ta?”

<sup>47</sup> Di niaa dɔnsun̄ chin̄ dime a jegile nii wialin̄ u si bula. N̄ii nɛ ba bula pi dɔn̄ɔ a bul, “Ilaaja nɛ baal-la yiyirɛ n̄ii.”

<sup>48</sup> Nialin̄ dɔn̄ɔ fa si chin̄ dime fá mu jon̄ suosuo a kaa mu yuu sinin̄ si nyala a jon̄ɔ tuu sakelin̄ lɛ a kaa mu hɛ u niin̄ lɛ duu nyua.

<sup>49</sup> Nii ne nialin donsun fa si he dime bul, “Má len la gberɛ a na ari Ilaaja jan ku soru daa-gɛsɛ-la nyun koo.”

<sup>50</sup> Nii ne Yesu faasa yel an wiesi u wiesi kati.

<sup>51</sup> Patiisa ne fa he Wia-dia tuon. Ba kaa kere. U kiesɛ balia a chin nyu-gbana a kiesa ku tuu. Nii ne tinteen zigili, busun ma yere a kpa kpa.

<sup>52</sup> Vaamaa ma suri suri. Nialin Wia si liisa, ba yuga a sii suun le a lii vaama-la le.

<sup>53</sup> Yesu si sii suun le, ba mu Jerusalem. Niaa yuga a naba lee-la.

<sup>54</sup> Laali-yuoroo zolo kuhian ari laali-yuoro-la fa si chin dime a biben Yesu a na tinteen si zigili nii ari wialin kala si naa, fawullun kenba. Nii ne ba bul, “Wutitii, baala deen sene naa Wia Bii ne.”

<sup>55</sup> Haalaa yuga a ma fa chin di-bolii a bibenu. Haala-la fa to Yesu harin ne a lii Galilii tinteen a pipeu le.

<sup>56</sup> Ba tuon Meeri Magidalin ari Meeri dono. U fa naa Jeems ari Josef naan ne. Zebidii haala ma peba le.

### *Ba hugi Yesu*

*Maak 15.42-47; Luuk 23.50-56; Joon 19.38-42*

<sup>57</sup> Didaanin si yie, baal kubala a lii tan kubala baa yire Arimatiya ma ko. U fa naa kiaa tiina ne. U yirin ne fa Josef. U ma fa naa Yesu haritooro-la dono ne.

<sup>58</sup> U mu Paalit teen a sul Yesu ku-suun. Nii ne Paalit bul di ba mu jono pu.

<sup>59</sup> Nii ne Josef laa a ken geripe-pul-falin a beu

<sup>60</sup> a jono hugi u titia bua falii-la le u fa si loso buŋ nyuŋ. U bilimi tabii-baliŋ kaa ko to bua-la niin aŋ viiri.

<sup>61</sup> Ka Mæeri Magidaliŋ ari Mæeri doŋo-la faa hoŋ a chaase bua-la leriŋ.

### *Laali-yuoroo po vaan-la*

<sup>62</sup> U tan si pula, che-wiesii-la cheeŋ, nialiŋ si kpu pusun pipi Wia kuhiasiŋ ari Farisii tinŋa-la, ba mu Paalit teen a bula pu a bul,

<sup>63</sup> “Kuhianŋ, la liisi wii ne. Bua-la le wu-nyiaru-la si he u miisiŋ le, u fa bula ari u ne suba, u jan sii suun le tapulaa batori cheeŋ.

<sup>64</sup> Nii wiaa len di niaa mu a po u vaan-la woruŋ di tapulaa batori-la yi, di u haritooroo si wuo mu a gaa kuusi aŋ bula pi niaa ari u sii suun le ne. Di ba ne naa wiin deen, u ne jan paala kii wialiŋ kala u si nya.”

<sup>65</sup> Nii ne Paalit bula piba di ba ken laali-yuoroo mu di ba po vaan-la niin woruŋ.

<sup>66</sup> Nii ne ba laali-yuoro-la mu a jon buŋ a to bua-la niin aŋ len niaa po lee-la.

## 28

### *Yesu sii suun le*

#### *Maak 16.1-10; Luuk 24.1-12; Joŋŋ 20.1-10*

<sup>1</sup> Ba che-wiesii-la cheeŋ si dere, Lahadi cheeŋ siipuuraa, Mæeri Magidaliŋ ari Mæeri-la doŋo mu bua-la niin di ba na lee-la ba si hugi Yesu.

<sup>2</sup> Ba si yi lee-la, muasuaa di leriŋ guu zigili. Di Wia tinɗaara lii wia nyuŋ ku tuu a bilimi tabii-la ta aŋ hoŋ u nyuŋ.

<sup>3</sup> U siaa nage duonun si ligisa ne, an ka u gennin pulle kpul kpul.

<sup>4</sup> Laali-yuoro-la fa si po bua-la, fawullun kenba. Ba chichel a nage di ba suba.

<sup>5</sup> Nii ne Wia tinɗaari-la bula pi haala-la si he dime a bul, “Ma sí fawullun fá. Mi jima ari Yesu ne maa che, nii-la ba si kpaasa mere daa-geɗe nyun.

<sup>6</sup> U tuo daha, u sie ne ari u fa si bul nii pima. Má ku na lee-la ba fa si jonu hugi.

<sup>7</sup> Má mu lima lima a bula pi u haritooro ari u sii suun le ne. Má bee na, u laa ma sipaan a mu Galilii. Di ma ne mu dime, ma jan nau. Mi paala bula pima.”

<sup>8</sup> Nii ne ba lii vaan-la lerin aa tuosi. Fawullun fa kenba ne, ama ba tuon ma tɔre. Ba fá mu di ba bula pi Yesu haritooro wii-la si naa.

<sup>9</sup> Nii ne Yesu guu chenba a bula piba a bul, “Ma jan hon ari yarifiɗaa.” Ba mu u teen a ken u naan le a chuolu.

<sup>10</sup> Nii ne Yesu bula piba a bul, “Ma sí leje di fawullun kenma. Má mu bula pi mi haritooro di ba mu Galilii. Ba jan nami dime.”

### *Nialin si po vaan-la nya wiaa a tige Yesu le*

<sup>11</sup> Haala-la si miira viiri, laali-yuoro-la fa si po bua-la, ba donsun miira mu tan tuon a bula pi nialin si kpu pusun pipi Wia kuhiasin wii-la si naa.

<sup>12</sup> Nii ne nialin si kpu pusun pipi Wia kuhiasin ari juu tinnaa kuhiasin hon a vuure wii-la ba si jan naa. Ba vuura di ba jan jon

moribii-dan a kpal laali-yuoro-la fa si pɔ bua-la an bula piba a bul,

<sup>13</sup> “Má bula pi niaa ari ma pin don nɛ, an ka u haritooro ku gaa a kuusi Yesu.

<sup>14</sup> Di nii-la si hɔn kuori-balin nyun nɛ nii wiin deen, la jan bula pɛma ɛ ari ma bi wii cheye. Wii-kala bi jan walimema.”

<sup>15</sup> Nii nɛ laali-yuoro-la fa si pɔ vaan-la laa moribie-la an nyia wiaa ari nialin si kpu pusun pipi Wia kuhiasin fa si bula piba di ba naa. Wii-la Juu tinnaa fa si nyia teeli lerin kala a kaa ko ari jinin.

*Yesu ken u titia ku dage u haritooro*

*Maak 16.14-18; Luuk 24.36-49; Jɔɔn 20.19-23;*

*Yesu nanɔ. tintinnaa 1.6-8*

<sup>16</sup> Nii nɛ Yesu haritooro-la fii ari kubala-la mu Galili tinteen a jil peel-la nyun, ari Yesu fa si bul nii piba.

<sup>17</sup> Nii nɛ ba nau dime a chuolu, ama donsun bi laa dii.

<sup>18</sup> Nii nɛ Yesu ku kpageba a bula piba a bul, “Wia jon dolun kala a pimi nɛ Wia-jan ari dunia kala ɛ.

<sup>19</sup> Má saa mu dunia sɛmɛ-na kala a bul mi wiaa pi niaa a len di ba naa mi haritooro a foba Wii-chuole liin mi Nyimma ari u Bie ari u Din-zon-la dolun ɛ.

<sup>20</sup> Má dageba a len di ba to wialin kala mi si bula pima di ma to. Mi jan he ma teen bua-na kala ɛ a kaa mumu dunia diderin.”

**Yesu Kiristito Wu-Zɔŋŋɔɔ (Ghana)  
Sisaala-Tumulung NT Ghana**

copyright © 2014 Wycliffe Bible Translators, Inc.

Language: (Sisaala, Tumulung)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 11 Jun 2026 from source  
files dated 29 Jan 2022

b3eb8618-120f-5a96-8c1c-1dbc16914330